

# MAALU ÀDÌ ÈNZEKÀ LEELÙ

## MMATÒÒKESHA KÙDÌ CIPRÒFETÀ



Twinyikaayi mitu yetu. Taatù wa mu Dyulu munanga, tudi tuKusakidila diloolo edi bwalu Wèwè utu wandamuna ku disambila dyetu. Mukaji munanga mukwate ne bya luse udi mulaadika kwaka wawa, dimupanda ndyedi dipangile. Kadi, Èyì Nzambi wa yaaya, tudi tuvuluka dipandangana dya nzànzànzà dyàkenjiibwà pa buloba apa, ng'Wèwè Nkaayeebe wàkadyènzèladi. Wàkangata mu luseke lwa Adama, lubadi, kukanga mwaba uvwa mupanda awu, e kwenza mukaji. Èyì Taatù, nyewu ndomba diloolo edi bwa cyanza Cyebe cipweke mpindyewu ne cyènzè cintu cinene citudi tulomba eci. Ne bakwabo aba, Mukalenge, mukaji udi usaama mutu mumuneeme bujitu ewu, bakwabo bònsò bàdì ne malomba aba, nyewu tubalambula anu kùdì Wèwè, Taatù, ne myoyi yetu yònsò. Mu Dìnà dya Yesu Kilisto. Amen.

Bushuwa ndyèsè bwa kwikala kaaba aka diloolo edi ne kwikala ne bateeleji balenga aba kumpala kwanyi. Ne misambu bulengayi, kaakorale kakese kalenga kaa dikema. Mvwa mèmè ngeela anu meeji ku dishiilangana adi, pa kumona nsongaalume yivwa miimane mwaba wawa yaya miikale ne. . . nsongaalume ne mmwenekelu wa mankenda, ne nsuki mikosa ne mankenda ònsò. Mvwa ngeela meeji, makeelela diloolo awu, bwa—bwa mwaba wùndì musòmbèle; musùmbà wa bangondavi mmubwele anu muntwamu kadi kuswa bwa kushipa mwànà wa balume kampanda mu ciinà cya mâyì a dyowela's; kukengelabi bwa balombe dikwacisha kampanda bwa kubapatula muntwamu. Ndishiilangana kaayi, pa kumona bânà biimane, bimba misambu ya Evanjeeliyo; dishiilangana kaayipu's we.

<sup>2</sup> Ndyambidila, pavwa Mwaneetu Henry wamba mwaba wawa ne, “balume baba bàvwà ne nsuki bu yivwa yikengela bwa bakaji kwikalabo bôbò naayi,” nudi numona's. Ncya—ncya—ncya bushuwa. Ne mmwenekelu mwenze bu. . . Ntu mmona nsongaalume eyi yiteeta kucyenza, bwa kwikala ne nsuki ya nanku awu, badi mene beelamu ne bikùdì byetu ebi, binyunguluke too ne mu mpala. Kadi ncyèna mumanye to, misangu mikwabo ntu ngumvwa too ne mu maboko munteketa's. Mbimweke anu bu ne cikaadi—cikaadi cikondo cya dinyangakaja dya maalu cyetu cya bushuwa eci. Balume bakeba kwikala bavwala bilàmbà bya bakaji, ne bakaji bavwala bilàmbà bya balume. Ne balume balekela nsuki yabo myenze bu ya bakaji, ne bakaji biikale ne nsuki bu balume. Ncilumbu kaayi

ciine eci ne cisamba eci's, twamb'eku twamb'eku? Mu bushuwa bwa bwalu, meeji a nsòmbelu mulenga miine ne a diditwa dya mushinga aa, akaadi muumuke mu ditunga edi ne kudi bantu aba anyi, pa buloba apa?

<sup>3</sup> Eci cikondo's ncyá cyenza bwôwà's, kadi paaci's ncikondo cidi citambe kwikala cya butumbi pa buloba, bwa kuyiisha Evanjeeliyo. Bu ne mwá mwa kwikala mwimane ku mubangubangu wa cikondo kumpala kwa kulwaci ku diikalaku aku, ne Taatù muntangile, mwambe ne: "Mmu cikondo kaayi ku bikondo byònsò ebi mùdì mufwanyine kujinga bwa kuyiisha?" Mwá mufwanyine kujinga bwa kucyenza mpindyewu mene, ncyá bushuwa, anu pabwípì menemene ne Dilwa Dyende.

<sup>4</sup> Pàndì ntuma mèsù pa bateeleji, kumpala kwetu eku nkusòmbe. . . Mulunda wanyi kampanda mwambi, mu Tucson makeelela awu, ùvwa mubànde pa kabalu. (Ngeela meeji ku muntu ewu udi ne ewu. . . mukaji udi ne dikokò mu nyima wende ewu.) Kabalu aku kumwimanshaku panshi. Muntu wa cyanaana kumbiikilaye pa dîbà umwe mu dinda emu, ku nzubu wa cilaala-beenyi kùndì aku, wamba ne: "Muntu awu udi usanganyiibwa ku Lupitaadi lwa Bankolomu, ne mèsù ende mmashaale bu mmwenu, nyima wende muzaaza, twonyi twende tutuntamane, ne mwoyi wende udi wamba kwimana." Nenku mwômò amu mèmè kudyela panshi, kutwa binù; ku telefone, mèmè kumupeta ku nshinga, ne kumusambidila. Nenku's ki yèyè ewu musòmbe mwaba ewu diloolo edi, musòmbe anu mwaba wawa. Aci ncyenzeke diloolo dya makeelela. Bob, udiku mwa kuswa bwa ujuukileku kuulu mwaba awu anyi? Muntu awu nyèyè wawa, mwaba wawa mene. Nzambi utu wandamuna ku masambila, mu dinda, bufuku, mu nkankala, mundankulu, anyi dîbà kana dyònsò.

<sup>5</sup> Mpindyewu, mèmè ntu—ntu muyiishi wa muleebuluku, mutubo bacinyike's. Ndi ngumvwa bingenzaku bibi ku mwoyi bwa kubanga pa dîbà edi dya diloolo, kadi—kadi mwá mudyàmbidile ne nêndwe anu kunumwenekela cyanaana. Diloolo dikwabo, mona's, tuvwa twakula muneemu emu mu mwaba kampanda, nenku. . . tusunsa dikumi ne tutaanu paanyima paa mèmè mubange kwakula, bantu bakaavwa benda bangata malongo ne banga byanza ne: "Imanyika! Bwikila mukana, bikengela upatuke mwaba ewu," benda banwa mfwanka, ne benza bintu bya mushindu awu. Kacivwa cilema cya—cya uvwa mulongolole didya awu to, ciwá ncilema cya beena mwaba utuvwa bafucile awu. Ki mukaji wa—wa mulongolodi was didya adi kuya e kwambilaye uvwa ne maalu awu mu byanza awu, kwambaye. . .

<sup>6</sup> Yèyè kwamba ne: "Ee, bidi bikengela nwênù kupatuka mu mwaba ewu pa dîbà 9 ne tusunsa 30."

7 Awu ne: “Kacya kanuvwaku bafunde aci mu mukanda wa dyumvwangana to.”

8 Inābànzà ewu, diloolo edi, mmulwe apa (inābànzà wa maalu malenga wa dikema’s) kwamba ne: “Tudi bumvwe ne ki cyùdi muswe,” yèyè ne, “shaala wèwè naaci anu ntanta yònsò wùdi muswe awu.” Pa nanku aci’s civwa cilenga cya dikema. Pa nanku ndi ne kusakidila kwàbûngì bwa bwalu abu. Abi’s mbilenga be.

9 Mwaneetu Henry, ncyà bushuwa ne ndi ngaanyisha musangeelu webe—webe bwa dimbiikila dyebe mwab’ewu, wèwè ne dyâpà edi.

10 Mwua mupete dyèsè makeelela diloolo awu dya kwikala ku beena Assemblées de Dieu eku kùndì ngeela meeji ne Mwaneetu Boone utu mpaasata. Ndi mupicishe kuntwaku cikondo cya dikema cya dicyonkomoka ne kasumbu kaa bantu aku. Ne maalaba diloolo netuye mu mwaba kampanda muneemu emu, ncyèna mumanye ne ndwà penyi to, kadi ndyâpà dikwabo. Bôbò mbadi batangila bwalu abu; mêmè ndi ntungunuka anu ne kusambila, ne kubala, ne ntungunuka ngenda anu nya, ne ki cyònsò cîndì mêmè mwa kutungunuka ne dyanza.

11 Kadi, mpindyewu, tudi tumona bintu bya pabwabi mu dituku edi. Mpindyewu ndi muvuluke musangu wa ndekeelu wûmvwà muneemu emu, muvwa mmu disangisha dya mu ntenta. Ndi mvuluka ne mvwa mucyâmbè makeelela diloolo, bwa babaka babidi bavwa balwemu ne mwanaabo wa mu diboko mufwe. Ndwà—ndwà mu mwaba kampanda kumutu eku, bavwa bendeshe mashinyi mundaamuunya mujima ne bufuku bujima. Maamù mutekete awu musòmbe, mubungame, kacya wambula mwânà mukese awu mu maboko. Mpindyewu, yèyè udi mwa kwikala musòmbe mwab’ewu mene patudi twakulangana apa, bwa ku dyanyi paanyi dimanya dyònsò. Nenku yèyè. . . bayende mutekete awu, ne babaka bakwabo mékù abidi biikale naabo, nenku bavwa. . . Ki mukaji kwambaye. . . kunkonkaye ní mvwa mufwanyineku kulwa (mulume ngwâkakonka awu) ku mashinyi aku. Mêmè kupatula mwânà mukese awu ne kushaala kacya anu ngâmwambula; mubidi mukese, mufwe, muuminyine, mukwate mashika; ki mêmè kubanga kusambila. Nenku ndi mwenze anu nsambila nunku, mubidi awu kubangawu kuumvwika bu ne ùkaavwa wènda ùkwàta luuya. Ki mêmè anu. . . Mêmè kutungunuka ne kusambila. Yèyè kubanga kusuba mikolo ne kunyunga, wenza anu nanku, ki mêmè. . . kubangaye kudila. Mêmè kumwalujila mamwëndè, kwalukilaye nende kumbelu. Pa nanku, bavwa bafwanyine kwikala kabayi nansha beena Kilisto to, bwa ku dyanyi paanyi dimanya dyònsò. Nwamonu anyi? Abi’s bivwa bilenga bya dikema.

12 Kadi cîndì ngeela meeji, diloolo edi, ndi mumanye kabidi, ekeleeziya udi munkaci mwa kupûnga ne lufu, mbeena Mpenta beetu aba. Bidi bikengela tudinyukulule bwa kupatuka mu

cyôci eci, uh-huh, ki cyônsò cìdiku. Ne mushindu umwepele unwikala mwa kucyenza udi ndisambila ne dishaala mu njila wa Dìyì dya Nzambi. Ki mushindu umwepele utwikala mwa kucyenza. Kudi njila wa kupatukamu anu umwepele, Yèyè ngudi Njila awu, Yesu Kilisto umwèumwè awu makeelela, leelu, too ne kashidi. Tudiku bafwanyine kuswa bwa wetu ekeleeziya kubwelaye mu ngiikadilu wa bwena uvwaye mwambe kuntu kwaka, bu wa mu Angleterre mwamwa awu anyi? Ki bwa cinyi ndi, munudi nudyambidila ne, ntu mupange kaneemu amu, nnutandisha. Kadi ncyèna ne meeji a kwenza nanku to, kadi ncyèna muswe kumona ekeleeziya ubwela mu ngiikadilu wa mushindu awu to. Nwènù kanwena baswe kwikala mu mushindu awu to. Bidi bikengela anu bwa wèwè—wèwè kuCibweja bikole menemene too ne pawaCipoopela ne musonso bwa kuCikwacisha ndendende. Bikengela cyenjiibwe.

<sup>13</sup> Nanku mpindyewu, diloolo edi, ndi anu ne... ndambu wa Mifundu ne cyena-bwalu kaaba aka bîndì njinga kwakulapu bwa ndambu wa dîbà. Ncyèna ngamba ne ndîbà bule kampanda to. Wèwè muumwve ne wacyoku, mona's... ndi mwa kujikija mu tusunsa makumi asatu, kadi mbilondeshile anu ku... Ntu misangu yônsò ncishiilaku anu Nyuma Mwîmpè, anu mushindu wônsò walombolaYe awu.

<sup>14</sup> Twinyikaayi mitu bwa kakwabo katanca kakese cyanaana, twakule ne Mwena Mukanda Wende kumpala kwa twètù kuwubuulula.

<sup>15</sup> Nzambi wa Bukole bwônsò, Mwena Mukanda ewu, mu Yesu Kilisto mmutudi tulombela emu. Tudi ne kusakidila bwa bitukaadi bamane kuumvwa diloolo edi. Piikalabi bikengela—bikengela bwa twètù kutwa cikemu ku disangisha edi pa kwamba ne, “Amen,” kadi kwalukila mu mèètu, bivwa anu bîmpè bwa kwikala apa, bwalu tudi bamanye ne Wèwè uvwa neetu. Nenku, Taatù, patudi tubuulula Dìyì edi mpindyewu apa, wakuleku neetu byumukila buludi mu Dìyì edi, bwa twamona mwa kumanya dîbà ditudi ne mwoyi. Twètù bamanye dîbà ditudi ne mwoyi, nenku tudiku mwa kudilongolola bwa diine dîbà adi; kadi twètù tubwelamu bu mpofo katuyi bamanye ne *ncinyi* anyi ne *mpenyi* to, dîbà adi katwena tumanya mwa kudilongolola to. Pa nanku, Taatù, tudi tulomba bwa Wèwè kutulekela tumona Bwâtù abu, ne Ciibi, cyunzulula, ne Mukenjà mwikale utubiikila bwa kubwelamu. Enzaku nanku mu Dîna dya Yesu Kilisto. Amen.

<sup>16</sup> Mu Mifundu Minsantu, ndi muswe kubalaku mwaba kampanda kaaba aka, ùdì úsanganyiibwà mu Mukanda wa Luuka Munsantu, ku nshapita wa 24, ku... Nèmbangilè ku mvensa wa 13, nenku nêmbalè citupa cya Wôwò awu.

*Nenku, monaayi, babidi baa kudibo bavwa bafumina diine dituku dimwedimwe adi ku musoko uwwabo*

*babiikila ne Emawuse, ùwà ùsanganyibwà mu ntanta wa kilòmèètà mitwe ku dikumi ne yibidi— ne yibidi.*

*Nenku bavwa bayiikilangana . . . pa maalu miine avwa menzeke aa.*

*Ki kwenzekabi, ne, pavwabo bayiikilangana munkaci mwabo apu . . . Yesu yèyè mwine kuseemenaye pabwipi, ne kwikalaye wenda uya naabo.*

*Kadi mèsù abo avwa mapangisha bwa kabiiikadi baalwa kumumanya to.*

*Ki yèyè kubambila ne: Mmuyiiki wa mushindu kaayi ewu unudi nwènù nuyiikilangana munkaci mwenu nunku, panudi nwenda nwenda, ne biikale babungame nunku?*

*Ki umwe wa kudibo, dìnà dyende Keleopa, wakandamuna ne wakamwambila ne: Wèwè udi anu mwenyi mu Yelusalema, ne udi wèwè kuyi mumanye maalu ònsò aa adi menzeke . . . mu matuku aa anyi?*

*Ki yèyè kubambila ne: Maalu kaayi awu? Ki bòbò kumwambila ne: Àdì àtàngilà Yesu wa mu Nazaleeta, uwu muprofeta wa bukole mu byenzedi ne mu dîyi kumpala kwa Nzambi ne kwa bantu bònsò;*

*Ne mùdì baakwidi banene ne balombodi abu bamufile bwa ba . . . bwa kumukoselabo cibawu cya lufu, ne bamupopele pa nkuruse.*

*Kadi peetu's tuvwa ne dyeyemena ne yèyè awu nguwuwa ne cya kwikala mupikule Izaleela; ne pa kuumusha byònsò ebi, leelu ewu ndituku diisâtù kacya maalu aa enzeka.*

*Eyowa, ne bamwe baa ku bakaji kabidi baa munkaci mwetu mbatukemeshe, bàvwà . . . ku majambu.*

*. . . paapangibo kusangana mubidi wende, mbalwe, bamba ne, bòbò paabu mbamone cikeena-kumona cya banjelo, bàdì babàmbile bòbò . . . bàdì bambe ne yèyè udi ne mwoyi.*

*Ne bamwe baa kudibo bàvwà neetu mbaye ku majambu aku, ne mbakasangane anu muvwa bakaji abu bambe amu, kadi yèyè bòbò . . . kadi yèyè kì mbamumone to.*

*Ki yèyè kubambila ne: Éyi bakutakane nwê, ne beena myoyi mineeme bujitu bwa kwitabuujja (kupanga mwa kwitabuujja's) byònsò bidi baprofeta bambe:*

*Kabivwa bikengela bwa Kilisto kwikalaye mukenge maalu aa, ne . . . mubwele mu butumbi bwende anyi?*

*Nenku ubangila ku Mòsà ne baprofeta bònsò, yèyè kubumvwiijaye kantu ne kantu . . . mifundu yònsò pa bidi bimitangila yèyè mwine.*

Mukalenge asweku asakidile mabenesha Ende ku kubala kwa Mèyi Ende.

<sup>17</sup> Mpindyewu ndi ngangata...bu mêmè mwa kucibiikila ne ncyena-bwalu, ndi muswe kwangata eci nunku: Maalu àdi ènzekà...*Maalu Àdi Ènzekà Leelù Mmatòòkesha Kùdì Cipròfetà*. Mpindyewu, citu misangu yònsò anu mushindu wa Nzambi...wa Nzambi utu kayi ushintuluka awu bwa kudyanjil-...kupeesha bantu Bende mushindu wa kudyanjila kumanya kumpala kwa maalu kampanda kwenzekawu.

<sup>18</sup> Bu ne bantu baa mu matuku a Mukalenge Yesu bavwaku nanshà bakebe Nzambi ne bamanye ne civwa pabwîpi menemene ne kwenzeka ncinyi, nunku kî mbakosele Yesu cibawu cya lufu to. Kadi cyàkènzà ne biikale nanku, mbwalu bivwa bikengela Mifundu kuulayi, bwalu bivwa bikengela bwa beena Yuda bafofomijiibwe. Twètù bònsò tudi bamanye aci.

<sup>19</sup> Nudiku nufika ku dimona ne cyôcì aci ncilayiibwe cyakabidi mu cikondo mene citudi ne mwoyi eci anyi? Cikondo cya Ekeleeziya wa Laodikiya, cikondo cya mwandamutekete cya ekeleeziya citudi ne mwoyi eci, cidi butaka, cyena dikenga, mpofu, kadi kacyi cimanye to. Bya mwomumwe anu mwakabafomijaYe kale wawa mu kiipacila kaa kufikisha Mukenji Wende kudi basungula amu, Yèyè mmulaye bwa kwenza cintu cimwecimwe aci leelu ewu.

<sup>20</sup> Nenku bu mêmè mwa kwamba eci ne kaneemu, bwa bâna beetu bònsò baa balume ne baa bakaji mu Kilisto: Dimwe dya ku matuku adi panshi aa muntu kampanda neâmbè ne: “Kî mbifundiibwe ne bivwa bikengela bwa maalu aa kwenzekawu dyambedi anyi?”

<sup>21</sup> Nenku neciikale mushindu anu umweumwe wakadibi musangu awu awu ne: “Bulelela, Ndi nnwambila ne, yèyè ukaadi mumane kulwa, kadi mbenze cikaavwabo bamulongolwele.”

<sup>22</sup> PaakaMukonkabo, ne: “Mona’s, bafundi’s badi bamba, ne Mifundu yidi yamba ne—ne ‘Eliya udi ne cya kwanji kulwa dyambedi.’” Ki cyakambilabo Yesu ncyôcì aci.

<sup>23</sup> Yèyè wakamba ne: “Yèyè ukaadi mumane kulwa, kadi kanwakamumanya to.” Nwamonu anyi? Nenku pâmwâpa ki mushindu wajikabi cyakabidi.

<sup>24</sup> Mpindyewu tudi baswe kwikala bamanyishiibwe bwalu ne bwalu bwònsò bùdì bùpitakanà, bwa kumanya ne ncinyi cidi ne cya kwenzeka bwa cikondo citudi ne mwoyi eci. Nzambi mmwabanye Dìyì Dyende ku cikondo ne cikondo cyònsò, bùngì kampanda ku cikondo ne cikondo, ne butudi naabu mbwa kumanya ne cikondo kampanda kaciyena mwa kutungunuka too ne mu cikondo cikwabo to. Kabyakukumbanaku to. Cileejilu, bu mûngâmbì, ngeela meeji uvwa mmakeelela diloolo anyi... Ndi anu ngaakula munanukile, ku diloolo ne ku diloolo dyònsò, mu myaba kampanda, ne misangu mikwabo ndi ngamba

díyì kampanda ndyambulula musangu mwibìdì. Meeji aanyi kî ngaa kwikala kwamba maalu kwambulula to, kadi...ndi ngamba nunku: Bivwa bifwanyine...bifwanyine kwikala ne dikwacisha kaayi kudi Mòsà bwa kuteeta kuyiisha mukenji wa Noa? Anyi bivwa bifwanyine kwikala ne dikwacisha kaayi... dikwacisha kaayi kudi Yesu bwa kuteeta kuyiisha mukenji wa Mòsà? Anyi bivwa bifwanyine kwikala ne dikwacisha kaayi kudi Martin Luther bwa kutungunuka ne mukenji wa Katolike? Bivwa bifwanyine kwikala ne dikwacisha kaayi kudi Wesley bwa kutungunuka ne mukenji wa ba-Luthériens? Bivwa bifwanyine kwikala ne dikwacisha kaayi kudi beena Mpenta bwa kutungunuka ne mukenji wa ba-Méthodistes? Anyi nebiikale ne dikwacisha kaayi kudi beena Mpenta bwa kwikalabo anu kacya baatungunuka pakaadi Mukaji musela ubiikidiibwa apa? Nwamonu's, twètù tukaadi bakabwele buludi mu cikondo cya dimiinu, tukaadi mwab'ewu mu cikondo cya nshikidilu. Mpindyewu, lutete lwa blé lwòlò kaluyi lumate mu buloba to, ludi lushaala nkaayaalu.

<sup>25</sup> Bu mudyudyanganyi awu, bu múnkaadì mwambambe mēyì kampanda kacya mukanda awu wapatuka, pàmwápa nukaadi bawupete muneemu mu cimenga cyenu—cyenu eci, cya mufundi wa beena Allemagne wákafúnda kamwe kaa ku tuumaalu tuvwa tütàmba kudyulangana atu awu. Yēyè awu's mmwena dyabulu. Mu bushuwa bwa bwalu kayi...Ncyèna mmupiisha ne bwalu yēyè mmumpiishe mēmè mushindu awu to; kadi, bwalu, bu mudiye mmwena dyabulu, kabivwa bikengelaku bwa mukanda awu kwikalawu mu biteekedi byenu bya mikanda to. Nenu yēyè mmwambe ne: “Nzambi wa mufwanyine kwikala anu kacya wàsomba kadi kwamba muvwaYe ne bukole bwa kukangula Mbú Mukunze ne kusungila cisamba Cyende, ne pashiishe Ûshaala musòmbe muvungile maboko mu difu mwikale Ûmona munda mwa Bikondo bya Mìdimà abi muvwa beena Kilisto abu babasunsulula kudi nyama ya ntambwe; baamaamù abu ne nsuki milaabakaja kaabudimbwa, ne babakudika ku nkuruse baboosha; ne bânà baabo balela baa mu maboko...baamaamù bàkaavwà pa kulela abu, bavwa mwa kubapanda mafu biikale badya lupiku bwa ne mwànà awu ngwa balume anyi ngwa bakaji; kadi kushaala musòmbe ulekela biine abi byenzeka; bantu biine bavwa ne mbasadidi baa mwine Nzambi awu abu.”

<sup>26</sup> Nudi numona, Mufundu ndisonsodiibwa. Kwakufikaku ku dimanya Mufundu anu ku disòmba cyanaana ne kuWubala ku mmwenenu wa teoloji, ku mmwenenu wa dilonga dya tulaasa to; kacyakacya kabituku bikumbane to.

<sup>27</sup> Mwva nyiikilangana ne mwambi kampanda wa ba-Baptistes anu abidi adi panshi aa, ùvwa wamba ne: “Bwa twètù katuyi anu bayiile cyena Ngelika cya cijaalame to, bwa twètù katuyi...”

28 Mémè kwamba ne: “Mu Nsangilu wa Nicée, kumpala kwa ciine aci, s’bavwa anu bakokangana pa myaku ya mu Bible ya cyena Ngelika ciine aci.” KanwadyakuMumanyaku to.

29 Bikengela Bible abuludiiibwe ku disonsola. Ki cintu cimwepele ncyôci aci, dibuulula. Yesu wakambila Peetelo ne: “Pa lubwebwe elu.” Lubwebwe lwa dibuulula elu ndudi lubuulula ne Yêyè udi Nganyi. “Udi mubeneshiibwe wêwê Simona, mwânà wa Yona, kî mmusunya ne mashi bidi bikubuulwile eci to, kadi Taatù Wanyi udi mu Dyulu ngudi mukubuulwileci; pa lubwebwe elu ki pâNgiiibakilà Ekeleeziya Wanyi.” Kî mpa Peetelo to, kî mpa Yêyè mwine to, kadi mpa dibuulula dya nyuma dya ne Yêyè uvwa Nganyi.

30 Ne Yêyè udi Dîyì! Yone Munsantu 1: “Ku cibangidilu kwakadi Dîyì, ne Dîyì dyakadi ne Nzambi, ne Dîyì dyakadi Nzambi. Ne Dîyì dyakavwijiibwa mubidi ne dyâkasòmbela munkaci mwetu.” Ebelu 13.8: “Yêyè udi umwèumwè awu makeelela, leelu, too ne kashidi.”

31 Bwa bwalu abu twètù tudi ne mwoyi mu dituku didibi bikengela ne dimweneshiibwa dya Dîyì dya Nzambi difike mu cikondo cishiilangane ne cikondo cya beena Mpenta. Aci ncyà bushuwa. Vulukaayi ne, nenwikale. . . Mémè ndi muntu udi kayi mulonge kalaasa to; kadi kwêna mwa kutamba bufuki bukole to, bwalu Nzambi udi ukwacila mudimu mu ntungunukilu wa bufuki. Bidi anu, bu mûngâmbi ne, dîbà didi dipatuka ne dibwela; ne diikale diya dituku dijima, byenze bu cikondo cya kalaasa; ne diikale difwa ku diloolo, bwa kupatuka cyakabidi mu dinda didi dilondà. Mici yitu yipwekesha mâyi ààyì mu buloba mu cikondo cya movù wa mashika, akabwela mu miji, ne àalukila mu movù wa bintu bitoloka.

32 Monaayi, Yêyè wakaMufwanyikija ne lutete lwa blé, Mukaji musela, kabingila kavwa kenza ne bivwa bikengela bwa Nzambi kulekelaye cyôci aci ciya mushindu awu. Ekeleeziya mulenga, mulelela, mushuwashuwale wâkajaadikiibwa mu Dituku dya Mpenta awu, wakaya anu wenda ukola wenda ukola kubangila anu ku Dituku dya Mpenta aku, kushaalaye ekeleeziya munene, bivwa bikengela bwa yêyè kupona ne kubwela mu buloba mu Cikondo cya Mîdimà ne kujiikiibwa anu bu mùtù dimiinu dyônsò dijiikiibwa amu. Bivwa bikengela kufwaye bwa kupatukaye cyakabidi mu Dilongolola. Wakapatuka mu muntu wa Dilongolola kampanda, Martin Luther. Nenu kuumukila apu, anu mùtù cicolakola cya blé cibànda amu. Cintu cya kumpala cidì cipàtukà, kudi tubeji tukese tubidi, pashiishe cidì citungunuka ne kwenda kusakidila tukwabo tubeji. Kujuukaku Martin Luther, ne pashiishe Zwingli, anu nanku, Calvin, ne pavwabo benda baya kumpala apu.



33 Ndekeelu wa byônsò cikabwela mu mwepu. Mpindyewu, aci civwa n' John Wesley mu cikondo cya Wesley. Civwa ne bungungu bwa bilôngò bupone.

34 Kuumukila apu ki kulwaku cikondo cya Mpenta, cifwanangane anu menemene, anu bu lutete lwa bushuwa lwa blé alu menemene bu wêwè mwa kutangila cicolakola aci. Kadi wêwè mwangate mwine blé awu mumuuvule, kamwenaku lutete nansha lumwe munda amu to nansha lwa kânà, cidi anu ncizubu pa cizubu mu *mmwenekelu* wa lutete. Kadi nciteekiibwe mwaba awu mu kiipacila kampanda, bwa kubwikila lutete too ne. . . Bu dîbà mwa kululenga mushindu *ewu*, ndifwanyine kulushipa.

35 Bikengela lushaale mwômò amu too ne ku cikondo kampanda, nenku Mwoyi wônsò awu udi wumuka mu cizubu (mukaavwaWu muumuke mu cicolakola, muumuke mu bungungu bwa bilôngò amu), wumuka mu cizubu ukabwela mu blé, ne wangata cyakabidi mmwenekelu anu uvwawu nende mwinshi mu buloba awu.

36 Mpindyewu, twêtù bônsò tudi bamanye ne dîbà dyônsò didi mukenji kampanda ufidiibwa, munda mwa bidimu bisatu badi benza bulongolodi. Padibo benza aci, cidi ciwushipa anu mwaba awu; cyakenza nanku mu matuku a Luther, bwalu, cyakenza nanku mu matuku a Wesley, ne cyakenza nanku mu matuku a Alexandre Campbell, ne bakwabo bônsò, ne cyakenza nanku mu matuku a Mpenta. Mmwômò menemene! Nwamonu anyi? Nudi nukafika kaaba kampanda kaa ne, muntu ne muntu ushaala muumakane, ne upambuka, ne kabaciyi mwa kwakidila dibuulula dipyadiya to. Baamanyi kujaalama; kadi's ki bôbò abu, s'ki bôbò bâfwafwà abu. Kadi Mwoyi udi upicila anu buludi mwômò amu, ne udi utungunuka too ne ku dikenza dya blé. Nenku padi blé ulwa, Mwoyi udi mwenzu lwendu lwa dipicila mu blé awu awu, dibiika dya ku lufu adi, udi upatula cintu cyônsò mu kaabujima; eyowa's, ùcibândisha bwa Dyambwibwa.

37 Mpindyewu, vulukaayi ne, Mukenji ewu wakabanga ku ntwadijilu ne dyondopa dya kudi Nzambi, wenza bishima. Mpindyewu, bu Nzambi mulekele aci cyenzekela mu ekeleeziya wetu wa patupu ewu, anu mutukaadi babipetepete emu, dîbà adi aci kacivwa Nzambi to. Nzambi katu ne bwalu bwa kudileeja to; Yêyè katu—Yêyè katu ne bwalu bwa kwenza bintu ebi, bwa kutucyonkomoja, mutudi twêtù beena Amerike aba biibidile naabi emu to (dicyonkomojangana), kadi Yêyè utu ubyenza mbwa kukoka ntema ya bantu, bwa ne Yêyè udi munkaci mwa kudilongolola bwa kwenza cintu kampanda.

38 Anji Mutangilaayi Yêyè mwine paakalwaYe. “Muprofeta mulenga wa dikema wa citende awu, laabi, muprofeta wa mu Ngalela.” Mona's, mudimu Wende wa bwambi uvwa mulenga wa dikema, bavwa baMwakidila mu ekeleeziya ne ekeleeziya yônsò.

39 Kadi dīngà dituku Wàkasòmbela panshi, kwamba ne: “Mèmè ne Taatù Wanyi tudi Umwe.”

40 “Kaa, ekelekele!” Aci’s civwa cya cyanaana. “Tùmùkilaayi apa ne muntu wa mushindu awu!”

41 “Nwènù kanuyi badye munyiinyi wa Mwànà wa muntu, ne kanuyi banwe Mashi Ende to, kanwena ne Mwoyi munda mwenu amu to.”

42 “Mona’s, muntu’s mmukishi munwanganyi wa mashi! Umukaayi kudi muntu wa mushindu awu!” Nwamonu anyi?

43 Nwamonu’s, kuvwa cintu kampanda civwa ne cya kulonda cimanyinu aci. Nwamonu’s, cintu kampanda civwa cilonda.

44 Cizubu neivwa cicilame, kadi mpindyewu cizubu cikaadi cidikoka ciya kule; cidi ne cya kudikoka. Nenku vulukaayi ne, bidimu makumi abidi bikaadi bipite kadi kakuyiku mangumba makwabo mapatukilemu to, ne dyôdi diine kadyakupatukamu to. Tukaadi kundekeelu kwa mangumba, blé ukaadi mumane kwangata mbungakeenu. Kadi budi naabu blé mpindyewu, kanwena mwa . . . budiye naabu mbwa kushaala mwanika mu Bwikadi bwa Mwànà, bwa kubobaye, kumpala kwa katumba kaa dinowa naaku kumupoolaku.

45 Mpindyewu, maalu atudi tumona ènzeka aa, kakuyi mpatà to mmaleejibwe mu Bible, a cikondo ne cikondo cyònsò. Twètù tudi tudyelela meeji ne tudi mu cincyòmpanyòmpa, kabyena nanku to, kantu ne kantu kadi kenda kaya anu menemene bilondeshile Dìyì dya Nzambi.

46 Mpindyewu, Bible mmukanda mushiilangane ne mukanda mukwabo munsantu kana wònsò ewu. Kakwenaku mukanda bu Bible to, bwalu Bible n’Nzambi mu mmwenekelu wa Dìyì. Nwamonu anyi? Ùdi . . . Dìyì mmeeji meela patooke. Dyela dya meeji dya Nzambi ndidi diDyèlè patooke, Méyi Ende kupicila kudi baprofeta; ne bôbò mbaakafunda Bible, udi mu mmwenekelu wa Dìyì ewu. Ne Yesu wakaDibiikila ne, “n’Dimiinu.” Ne dimiinu kana dyònsò edi nedivulangana bilondeshile mushindu wadi piikaladi mu ngiikadilu mujaalame, mu cyuyüya cijaalame. Mpindyewu, Mukanda ewu wa . . . ùdi . . . Mukanda wa ciprofeta ewu, Ùdi—Ùdi uduyanjila kwamba maalu a matuku àcivwavwà. Mpindyewu, Mukanda ewu udi munda mwawu ne dibuuludiibwa mu kaabujima dya Yesu Kilisto. Kwèna uKusakidila anyi uKuumushila to, ne dibuulula dyònsò didi ne cya kuvwila anu ku Wòwò. Nwamonu’s, cidi ne cya kwikala Dìyì.

47 Pa nanku bantu batu bamba ne: “Ndi mupete dibuulula.” Eyowa, tudi bamanye ne Joseph Smith ne bààbùngi baakapeta mabuulula ne bikwabo, kadi bivwa bibengangane ne Dìyì.

48 Bidi bikengela cilwe bilondeshile Dìyì piikalaci cifumina kudi Nzambi, bwalu bùdici naabu mbwa kushindika

anyi kujaadika Bwikadi bwa Nzambi. Nenku Yèyè uvwa mudyanjile kumanya bintu byònsò ebi, biikàle. . . Ku didyanjila-kumanya Dyende Yèyè wakateeka, wakadyanjila kuteeka (cidi cibiikidiibwa mu Bible ne, “cidyanjila-kulongolola”) cikondo ne cikondo cyònsò pa kaaba kaaci, ne muntu ne muntu yònsò pa kaaba kende, ne musanjeela ne musanjeela yònsò pa kaaba kende. Yèyè udi Nzambi, dyabulu kèna mwa kuMukutakaja mu kantu nansha kamwe to. Ne Yèyè udi Nzambi, ne Yèyè mmuteeke bwa kantu ne kantu kònsò kwenzekaku, ne kadi kenzeka menemene anu mu njila wa Dìyì Dyende.

<sup>49</sup> Pa nanku bu twètù mwa kumona, ku Dìyì Dyende, ne mmu cikondo kaayi ne mmu dîbà kaayi mutudi ne mwoyi, nenucimone anu mwaba ewu mu Bible, bwa cikondo eci, citudi twètù ne cya. . . cidi ne cya kwenzeka pa dîbà edi.

<sup>50</sup> Mpindyewu, mi—mikwabo mikanda yôyì, tudi tusangana mikanda bûngì cyanaana yidibo babiikila ne “mikanda minsantu” ayi, ne bikwabo. Kadi mêmè nkaadiku mubale Koran ne mikwabo yâbûngì. Kadi, nudi numona’s, yabo—yabo mikanda minsantu miine ayi yidi anu mmêyì malongolola a nsòmbelu wa bukalanga, a maalu mîmpè a mu nsòmbelu, anyi a teoloji.

<sup>51</sup> Kadi ewu Mukanda udi m’Muprofeta, Wòwò mmushiilangane ne mukanda mukwabo kana wònsò ewu. Bible n’Dìyì dya Nzambi diikale didyanjila kwamba maalu a matuku àcivwawwà. Ùdi udyanjila kwamba bwalu mmudyanjila kudimwijiibwa.

<sup>52</sup> Nzambi Yèyè mutume cintu kampanda, Ùdi wamba ne Ùtu mulaye mu Bible ne Yèyè kaakwenza cintu nansha cimwe pa buloba Kayi mucibuulwile dyambedi basadidi Bende baprofeta to. Awu ng’Amosa 3.7. Yèyè. . . ne Nzambi kèna mwa kushimaku to. Yèyè udi uCibuulula, ki citu mushindu Wende wa kucyenza munda mwa bikondo byònsò ngwòwò awu. Kacya Yèyè katuku mwanji kupangila bwa kucyenza to.

<sup>53</sup> Mpindyewu, tudi balayiibwe, mu matuku a ndekeelu ne, cyòcì eci necyalujuludiibwe. Kakwakwikala ekeleeziya nansha umwe—nansha umwe, dingumba nansha dimwe, dya ba-Méthodistes, ba-Baptistes, ba-Presbytériens, beena Mpenta, kabaakwikalaku mwa kwangata (mu ngiikadilu yabo ya cyena leelu eyi) ewu ekeleeziya bwa kumuvwija Mukaji musela to. Kabeena mwa kucyenzaku to, badi bapangila. Mbatambe kukwatangana mu mabodi ewu ne ewu, ne maalu a pa buloba akaadi madifindemu, ne bikwabo, ne—ne bakaadi badifwile mu mipwa yabo. Ne pa nanku Nzambi’s mmumanye ciine aci.

<sup>54</sup> Nenku bwa kubuulula Dìyì edi, umwe udi wamba ne: “Ee, mêmè ndi ne *cikampanda*. Nenku Nzambi abeneshiibwe, Cidi mushindu *kansanga*.” Ki mushindu awu menemene uvwabi paakalwa Yesu musangu wa kumpala; muntu ne muntu udi ne dilongesha, muntu ne muntu udi ne *cikampanda*.

Nebikengele bwa kwikalaci cintu kampanda citutumina kudi Nzambi. Ne Nzambi ngudi mucilaye. Ne mushindu umwepele wenzaYe, ngwa—ngwa kulama citembelu Cyende cimwecimwe aci. Yèyè mmulaye bwa kututumina, mu matuku a ndekeelu aa, bilondeshile Maalaki 4, muprofeta pa buloba, “Wíkala mwa kukudimuna myoyi ya bantu ne kuyaaluja, myoyi ya bânà ne kuyaaluja cyakabidi kudi baataatù bapostolo baa ku cibangidilu.” Yèyè ngudi mulaye aci mu Dìyì Dyende. Luuka 17 ne mu myaba mikwabo yàbùngì mudiYe mucilaye, cidiYe. . . ciikalaYe mwa kwenza mu matuku a ndekeelu aa bwa kufikisha cintu eci ku Dìyì kampanda dishindika.

<sup>55</sup> Nwamonu’s, muntu udi mwa kwamba cintu kampanda, kadi Nzambi Yèyè kayi muumvwije Dìyì adi to. . . Nwamonu’s, mpindyewu, twètù tudi ne dyumvwija dyetu twètù biine, biikale twamba ne Didi dyamba *cikampanda*. Kadi ewu nunku, Méthodiste ewu, wamba *cikansanga*, Baptiste ewu wamba *cikankenga*, mwena Mpenta pende mwambe *cikansanga*, Unitaire wamba *cikankenga*, Binitaire wamba *cikansanga*. Nenku, kaa, ekelekele, kadi’s ki bwalu mbwòbù abu. Kadi Nzambi katu dijinga ne muumvwiji kampanda to, Yèyè m’Mudyumvwijidi wa Yèyè mwine. Ùdi umvwija Dìyì Dyende Yèyè mwine pa kuDishindika mu cikondo cidi ciDilongolwela, cikondo cidiDi difidila.

<sup>56</sup> Twètù katwena ne mwoyi mu cikondo cya beena Mpenta to, tudi ne mwoyi mu cikondo cya cyanaana. Nwamonu’s, katwena ne mwoyi mu cikondo cya ba-Méthodistes to, tudi ne mwoyi mu cikondo cya cyanaana. Tukaadi ne mwoyi mu mwaba mutumbuke ewu ku cikondo cya Mukaji musela, dibikiila dya Ekeleeziya bwa kupatuka ne diMusangisha bwa Dyambwibwa. Ki cikondo citudi twètù ne mwoyi mpindyewu ncyôcì aci. Bwa ku dyanyi paanyi dimona dya meeji matooke aci ki Bulelela anu bwetu bwa menemene ebu mbwòbù abu.

<sup>57</sup> Nenku Mukanda ewu mmukanda wa ciprofeta. Beena kwitabuuja baaWu mbabatumine dîyì bwa kuWutwa musinga ne kwikala kuWubala, ne kwitabuuja MwenaWu, bwalu Dìyì dyònsò didi difundamu didi ne cya kwenzeka. Byònsò bitù bilayiyibwe bidi ne cya kwenzeka, bwalu Ùdi n’Yesu Kilisto mu cikondo ne cikondo cyònsò. Umwèumwè awu makeelela, uvwa n’Yesu Kilisto, uvwa mu Noa; ùvwa n’Yesu Kilisto mu Mòsà, ùvwa n’Yesu Kilisto mu Davidi, ùvwa n’Yesu Kilisto mu Yozefu; n’Yesu Kilisto, umwèumwè awu makeelela, leelu, too ne kashidi. Ne n’Yesu Kilisto munkaci mwa bantu Bende leelu ewu, wenza bintu byakalayaYe ne Neënzè mu cikondo eci abi. N’Yesu Kilisto.

<sup>58</sup> Kadi ekeleeziya ukaadi mushaale muumakane be, mwikale usanganyibwa kule kwa dikema, anu mwàmbì mwaneetu kaaba aka emu. Ne—ne ekeleeziya yetu yikaadi yenda yishaala mushindu umweumwe awu, mu mushindu wa ne bikaadi

bikengela bwa twètù kupeta cintu kampanda cya citunyukusha bwa twètù kwalukila ku Diyì. Mmunyi mutudi tumanya ne necyènzè nanku awu? Bidi bikengela bwa cilwe bilondeshile ndongamu wa Nzambi Yèyè mwine. Kacyena mwa kulwila kudi mwena kwitabuuja yònsò naka to, kacyakulwila kudi mwena kantu-ku-byanza kampanda to, kacyena mwa kulwila kudi maekeleeziya to. Nzambi mmwadije ndongamu Wende Yèyè.

<sup>59</sup> Mwva mwakule mwab'ewu mu Shreveport emu dituku adi, ku tudyomba twa ditunga ngaakula ne ditunga dijima, ne, *Kuteeta Bwà Kwenzela Nzambi Mudimu Kaciyi Diswa Dyà Nzambi To*. Davidi wakateeta kwaluja musheete wa cipungidi wa Nzambi mu nzubu mwende. Ùvwa mfumu mwela maanyi. Mona's, yèyè—yèyè wakakonka baaminyampala bende—bende, baakapiteena bende baa binunu, ne baa binunu dikumi, ne bikwabo. Ki kwambabo bònsò ne: “Aci n'Diyì dya Mukalenge.” Ki kukonkabo mwakwidi: “Aci's ncilenga cya dikema.” Ki bòbò bònsò kulwabo basonsodiibwe, mu mushindu wa beela mbila, benza cyenzi cyònsò cya butendeleedi civwàku aci. Kadi paabi kakuji mpatà to bivwa bibengangane ne diswa dya Nzambi, bwalu kuvwa muprofeta mu ditunga amu dìnà dyende Natana kadi kabayiku nansha bamukonke bwa bwalu abu to. Nwamonu anyi? Nenku tudi basangane ne kacyakakumbanaku to nansha muvwabo ne meeji matooke, bateeta bwa kwenzela Nzambi mudimu amu.

<sup>60</sup> Nenku nudi mwa kwikala anu ne meeji matooke etu a menemene aa; kadi, patudi katuyi bamanye citudi twenza to, nudi nulwangana ne lupeepele. Alukilaayi mu Diyì dya Nzambi nuditeeke mu njila, ne pashiishe nwàsè lwendu nuye; pa dībà adi nudi numanya. Bu—bu mudi musalaayi, kī mmumanye cya dyenza to padiye kayi mupete mēyì mamutumina bwa kucyenzaye. Tudi ne cya kwikala basalaayi beena Kilisto, biikale tupetela mēyì matutumina mu Bible bwa dībà mpindyewu; kaciyi dibundulangana dya makeelela, dibundulangana dya dituku dīdī didyānjīle to, kadi dibundulangana dya leelu (njila mwine utudi ne cya kuyiila). Kujandula ne mmu dībà kaayi mutudi ne mwoyi.

<sup>61</sup> Maalu àdì ènzekà leelu aa adi atupicila ku luseke lukasa-lukasa lwa menemene, nenku dīngà dituku twadyakujandula ne nebiikale batushiye paanyima katuyi ne kantu nansha kamwe to, ne batùbùcikīle, batwībwe cimanyinu cya nyama wa lwonji kumpala kwa twètù kucimanya.

<sup>62</sup> Mpindyewu, ne lutuulu lwònsò bikengela twindile cyòcì eci, bwalu biprofeta bitù bilayiibwe abi, cyònsò cya ku byòbì abi cidi ne cya kuula mu cikondo cyaci. Bwalu Cidi cidyanjila kutwambila ne, MwenaCi ukaadiku mwenzenze cyòcì eci kumpala kwònsò eku, nenku tudi bindile bwa kuMumona ucyenza cyakabidi. Ncikondo kaayipu citudi ne mwoyi eci's we! Cintu bu mudi—kabala-matuku; nutu nutangila ku kabala-

matuku bwa kujandula ne mmu dituku kaayi dya cidimu dinudi ne mwoyi, ne nudi nutangila mu Bible wa Nzambi bwa kumona ne mmu cikondo kaayi citudi ne mwoyi. Twêtù katwena ne mwoyi mu cikondo cya ba-Méthodistes, cikondo cya ba-Baptistes to. Tudi ne mwoyi mu cikondo cya Mukaji musela, dibiikila, dyalujiibwa kudi Nzambi mu kajila kavwaYe mulaye bwa kwalukidilamu. Yêyè ngwâkalaya bwa kucyenza.

<sup>63</sup> Kadi bu muvwabi mu cikondo ne cikondo cyônsò, bantu batu balekele bantu beelaKu dyumvwija dyabo bôbò ku teoloji, ne kabayi baswe kwitabuuja dishindika dyaCi dya Bunzambi dya kudi Nzambi to. Aci's ki dyumvwija dya Nzambi. Kî ncîndî mêmè ngamba, kî nciidi muntu kampanda mukwabo wamba to; kadi cidi Nzambi mulaye; ne cidi Nzambi wenza, cidi cijaadika ne Nzambi ngudi wenza dyumvwija Dyende Yêyè mwine dya Dîyî Dyende.

<sup>64</sup> Baakanwambila nwênù beena Mpenta aba, kukaadi bidimu makumi anaayi ne bitaanu, anyi makumi ataanu, baamamwênù ne baatatwênù, bāvwa beena Mpenta bashûwashûwâlè, baakapatuka mu bulongolodi ne kwelabo cintakanyi aci mulawu ne kupatukamu: Pashiishe anu mudi mbwa walukila ku bilushi byende, nukaadi bamwâlùkile cyakabidi, benze cintu cimwecimwe cyâkashipà ekeleeziya awu aci, nwênù kushipa wenu nwênù biine ku cintu cimwecimwe aci. Ncyêna cilumbu ne bantu bàdimu abu to, ncyêna naaci cilumbu to, ndongolwelu ya cintakanyi aci nyidi yicyenza.

<sup>65</sup> Kwanyi mêmè, ndi . . . ngaalukila kwanyi . . . Ncitu nyiisha eci mu disangisha dya mukwabo muntu to. Nênyiiishè *Cikòkà Cyà Nyòka*, nenku nwaciteelejaayi panwikala bangate mikaba ya mêtî ayi.

<sup>66</sup> Nenku, monaayi, bôbò baakapanga kumona dishindika dya biprofeta bya Dîyî dya Nzambi biikale byula. Bu baakwidi abu . . . Bavwa badîmànyikile anu menemene mushindu uvwa Maasiya ne cya kulwa, bavwa bôbò bamanye civwà ne cya kwenzeka. Bafaal- . . . Bafaalesa bavwa ne wabo mmwenenu, Basadoka, beena Heloede, ne bônsò, bavwa ne yabo mmwenenu. Kadi Yêyè kaakalwa . . . Wakalwa bibengangane ne yônsò wa ku yôyî ayi, kadi bikumbanangane menemene anu ne Dîyî. Yesu wakamba cintu cimwecimwe aci mwab'ewu: "Bu ne nuvwa baMmanyè Mêmè, nunku nudi bamanye dituku Dyanyi. Bu ne nuvwa bamanye, nunku nudi . . . Nudi nwamba ne: 'Ee, Mòsà! Twêtù tudi ne Mòsà.'" Yêyè ne: "Mona's, bu nwênù nwiitabuuja Mòsà, s'nuvwa mwa kuNgiitabuuja Mêmè; bwalu yêyè ngwâkafùnda bwa bwalu Bwanyi."

<sup>67</sup> Kadi, nudi numona's, pavwa Nzambi munkaci mwa kushindika anu menemene civwaYe mulaye, baakacyangata bôbò mu mushindu kampanda wa mudyundisha uvwa Yesu ne cya kulwa, nenku . . . Ndi njinga kwamba Maasiya. Bivwa

bikengela bwa Maasiya kulwaye buludi ku kasumbu kaabo bôbô patupu Kavwa Maasiya to. Ee, mushindu awu ki udibi, pamwe ne cyôci aci's, leelu ewu: "Nwênù kanuyi numwena mu binete byanyi mêmè to, kanwena nutangilaku to nansha kakese." Nwamonu's, ne pa nanku aci's—aci's cidi anu mushindu udici—udici's. Twêtù. . . Ki bulelela mbwôbô abu. Tudi tuumvwa bitutacisha patudi twela meeji awu, kadi's m'Bulelela bwa kabuyi dyela mpatà.

<sup>68</sup> Mu Ebelu 1.1, Nzambi mu bikondo bya kale wakafunda Bible mu mushindu Wende Yêyè mwine musungula. Kacya Yêyè kaakaMufundishaku kudi beena teoloji to, anyi Yêyè katuku umvwijila kudi beena teoloji to. Kacya kakutuku kwanji kwikala cikondo nansha cimwe cikaadiku—cikaadiku beena teoloji bapete dyumvwija dya Dîyì dya Nzambi to. Dyumvwija ditu dilwa anu kudi muprofeta nkaayende. Nenku mushindu umwepele utwikalaku mwa kupatuka mu cimvundu eci ngwa ne Nzambi atutumine muprofeta awu, anu menemene, mushindu umwepele wikalaci mwa kwenjiibwa. Cyôci aci cikaadiku ciitabuujibwe, bacîndile, ne—ne dyula dyaci.

<sup>69</sup> Nwamonu's, Yêyè kaakafundiibwaku kudi muntu to, kadi Wakafundiibwa kudi Nzambi. Kî mmukanda wa muntu to, Kî mmukanda wa beena teoloji to. M'Mukanda wa Nzambi, bwalu m'Mukanda wa ciprofeta mufunda kudi baprofeta ne muumvwija kudi baprofeta. Bible mmwambe ne: "Dîyì dya Mukalenge didi dilwa kudi baprofeta." Mmwômò!

<sup>70</sup> Mushindu mwine udibi bifwanyikijiibwe bilenga bya dikema, anyi, bileejiibwe bitooke tòò paakalwa Yesu pa buloba, ne Yone nguvwa muprofeta wa dituku adi, ne yêyè—yêyè uvwa munkaci mwa kwamba ciprofeta. Kwambabo ne: "Kaa, udi muswe kwamba ne Nzambi neapandulule bisumbu byetu binene ebi ne bintu byônsò ebi anyi? Ne nekulwe cikondo, ciikalà yetu—yetu ntempelu eyi kabaciyi bakuukwilamu kabidi anyi?"

<sup>71</sup> Yêyè kwamba ne kuvwa kulwa cikondo ciywa Nzambi mwa kufila mulambu wa Mwânà wa mukooko wa Nzambi, Muntu. Ki kwambaye ne—ne yêyè uvwa mwa kuMumanya pavwaYe mwa kulwa. Ki yêyè kwamba. . . Yêyè uvwa mutwishiibwe menemene bwa mukenji wende, mu mushindu wa wamba ne: "Yêyè awu mmwimane munkaci mwenu patudi twakulangana neenu apa kadi nwênù kanwena bacimanye to." Yêyè awu's mmwimane munkaci mwenu kadi nwênù kanuyi bacimanye to.

<sup>72</sup> Nenku dituku dikwabo paakapatuka Yesu, Yone mmwenze anu ubanduluka nunku e kumonaye cimanyinu aci kumutu Kwende, kwambaye ne: "Monaayi Mwânà wa mukooko wa Nzambi udi uumusha mpekaatu ya baa pa buloba." Pa kasunsa kamwekamwe aku Yesu wakamanya ne Wakashindikiibwa kumpala kwa bantu. Mpindyewu, Yêyè uvwa Dîyì, tudiku bafwanyine kwela aci mpatà anyi? Bible ngudi mwambe ne

Yèyè uvwa Dìyì: “Ku cibangidilu kwakadi Dìyì, ne Dìyì dyakadi ne Nzambi, ne Dìyì dyakadi Nzambi. Ne Dìyì dyakavwijiibwa mubidi ne dyàkasòmbela munkaci mwetu.” Nenku’s ki Yèyè ewu, kudi. . . S’ki Dìyì edi pa buloba (monaayi! Anu menemene’s!) dipatuka dikabwela buludi mu mâyi kudi muprofeta.

<sup>73</sup> Neya bushuwa, Dìyì dilwalwa misangu yònsò anu kudi muprofeta Wende. Pa nanku katwena mwa kutekemenaku ne Didi mwa kulwa kudi beena teoloji to. Katwena mwa kutekemenaku ne Didi mwa kulwa kudi mangumba to. Bidi bikengela bwa kulwilaDi mu kajila kaa Nzambi kadiYe mudyanjile kutwambila, ne ki mushindu umwepele wawwilaDi. NeDikinyiibwe, nedidyombodiibwe, nedibengiibwe. PaalwaDi cya bushuwa, neDiimanshiibwe pambelu ku luseke, ne bikwabo byònsò, kadi Nzambi neàcyènzè nansha bishi. Dyakabengiibwa mu Yesu Kilisto, Dyakabengiibwa mu Yone, Dyakabengiibwa paakakwadi kudi Yelemya, Dyakabengiibwa paakakwadi kudi Mòsà. Bitu misangu yònsò anu mushindu awu. Kadi Nzambi udi wenda uya anu kumpala mu mushindu udiYe mulaye ne Yèyè neàcyènzè awu. Eyowa’s, mukalenge, Yèyè kacya katuku upangila kucyenza mushindu umweumwe awu to.

<sup>74</sup> Muntu wâkamòna cikeena-kumona aci anyi wâkumvwa dîyi Dyende adi awu, kaakaDyumvwaku mu kaabujima to. Misangu yàbûngì yèyè mwine kavwa umanya to, bwalu yèyè udi anu cyamu cya mudimu cya Nzambi. Mmeeji a Nzambi meelega patooke ku mishiku ya muntu; meeji, mu bushuwa bwa bwalu, ndîyi dyamba patooke. Nzambi ngudi wenza Yèyè mwine disungula Dyende ku disungula Dyende—Dyende didyanjila kulongolola. Ūkaadi mudyènzènze mu cikondo ne cikondo cyònsò, Yèyè ukaavwa muteeketeke muntu bwa cikondo cyònsò. Byenze bu Mòsà, pakaavwabi bikengela bwa kuujaYe civwaYe mwambile Abraham. Mòsà wakalediibwa mwânà mwakanyine, kavwa pende mwa kudipangisha kwikala mushindu awu to. Wakalediibwa mushindu awu bwalu wakalediibwa mmu kiipacila aku.

<sup>75</sup> Nenku tudi tusangana ne Nzambi utu wenza cyôci aci mu cikondo cyònsò. Nzambi utu wenza disungula Dyende Yèyè mwine ku disungula didyanjila kulongolola Dyende Yèyè mwine, usungula baprofeta Bende ne bikwabo bwa cikondo aci; ulongolola—ulongolola ngiikadilu wende, ngiikadilu wa mwine muntu awu, mushindu wa nyiishilu wa muntu awu bwa. . . pa mapà ende ne byònsò bidiye wenza, bidi bikumbanangana ne kadyombo kaa diine dituku adi. Nzambi ngudi mufuke muntu awu ne mumutume. Kadi mu meeji Ende Yèyè mwine, anu mûmvwà muiishepu makeelela diloolo, twètù tudi mutoloku wa ndelanganyi ya Nzambi. Yèyè uvwa mumanye ne muntu awu neikaleku mu ciine cikondo aci, kumpala mene kwa nansha kapwishipwishi, anyi bukènkè kampanda, anyi nî ncinyi cikwabo kwikalaci pa buloba.



<sup>76</sup> Bwalu wêwè udi mutoloku wa tatwèbè, ne uvwa munda mwa tatwèbè, kadi tatwèbè kavwa neebe mu bwobumwe to bwalu yêyè. . . Wêwè uvwamu, kadi kuvwa mucimanye to ne yêyè kavwa mucimanye to, kadi udi mumweneshiibwe bwa wamona mwa. . . bwa yêyè wamona mwa kubwela neebe mu bwobumwe. Kadi paudi ulediibwa cyakabidi, udi ulediibwa ku Mwoyi wa Cyendeleele. Nenku aci ki mushindu umwepele wa Mwoyi wa Cyendeleele, ne cyòci aci ki Mwoyi wa Nzambi. *Zoe*, mwâkù wa mu cyena Ngelika udi *Zoe*, mushindu umwepele wa Mwoyi wa Cyendeleele.

<sup>77</sup> Nenku pawikala mwânà wa balume wa Nzambi anyi mwânà wa bakaji wa Nzambi, uvwa munda mwa Nzambi dîbà dyònsò edi. Kadi Yêyè uvwa mumanye ne mpa dibuula kaayi dya buloba ne mmu cikondo kaayi mûvwà mwa kukunyiibwa. Pa nanku mpindyewu udi mwenjiibwe cifukiibwa, mwânà wa balume wa Nzambi, mumweneshiibwe mwânà wa balume anyi mwânà wa bakaji wa Nzambi bwa kukumbanangana ne kadyombo kaa dîbà edi bwa kushindika Nzambi mulelela ne udi mwoyi wa diine dîbà edi, Mukenji ùdi ùpàtukà mu cikondo eci. Neya bushuwa! Wêwè uvwa mwenjiibwe kuntwaku kumpala kwa difuka dya dyulu ne buloba. Piikalabi ne kabivwa. . . Piikalabi ne kuvwa musungudiibwe mushindu awu to, nansha wêwè muteete bishi bwa kuCitentula, wêwè kwadyakwangulaku mpasu to. Mmunyi mùdi mwa kupetela mashi mu tuunèpà padimu kamuyi mashi?

<sup>78</sup> Ki bwa cinyi ntu nteeta kwamba bwa bantu batu beela meeji ne twètù tuvwa. . . tudi twelela bakaji mbila pa bidi bitangila nsuki mîpì, ne bantu bangambila bwa dyamba dya miine maalu awu ne: “Wêwè’s neunyangakaje mudimu webe wa bwambi.” Nyangakaja mudimu wa bwambi ukaavwa Nzambi Yêyè mwine muteeke? Abu buyiile anu kule! Kadi padi bantu bateeleja Dîyì dya Nzambi. . . Padi mwânà wimiciibwa mu difu dya mamwëndè, padi kabulu kaa mashi kamwepele aku kabwelamu, kabulu kakwabo kaa mashi kadi kalwa kadisakidila pamutu paa kòkò aku. Kì nkabulu kaa mashi kamwepele kaa muntu, kàdi kàlondà kiikàle kaa mbwa, ne kàdi kàlondà kiikàle kaa mpuusu, ne kàdi kàlondà kiikàle kaa cintu kampanda cikwabo to; kakuyi mpatà to, mmuntu, buludi. Ne padi muntu ulediibwa ku Nyuma wa Nzambi, kèna wela cintu kampanda mu nsòmbelu wende amu to, Cidi n’Dîyì dya Nzambi didi kadiyi disambakaja dishindika bwa dîbà adi. Yêyè udi wangata Dîyì dya Nzambi mu kaabujima, kayi welaMu twitabaayi, anyi cintu cikwabo nansha cimwe to. N’Dîyì dya Nzambi dikezuke kadiyi disambakaja to, dimweneshiibwe munkaci mwetu.

<sup>79</sup> Tangilaayi mu Bible, nudi numona ne mpenyi, mmu cikondo kaayi citudi ne mwoyi pa dîbà adi, panudi numona bintu binene ebi munkaci mwa kumweneshiibwa. Padi Nzambi mulaye bwa kucyenza, Yêyè utu misangu yònsò anu ucyenza. Kundekeelu kwa cikondo cyònsò padi ekeleeziya ufika pa mwaba wa cibèndà,

ne ukudimuka uumuka ku Dìyì walukila ku mpekaatu ne ngiikadilu ya maalu a pa buloba . . . Ngiikadilu ya maalu a pa buloba mmpekaatu. Bible mmwambe ne: “Wêwè munange maalu a pa buloba anyi bintu bya pa buloba, dinanga dya Nzambi kadyena nansha munda mwebe to.”

<sup>80</sup> Pâmvwà ngaakula makeelela diloolo, mvwa ngaakula pa—pa mulambu wàkafidiibwà, Mwânà wa mukooko. Bivwa bikengela bwa kwikalabi matuku mwandamutekete, cileeja bikondo mwandamutekete bya ekeleeziya. Kabivwa bikengela bwa kusanganyibwaku lwevenya nansha lukese munkaci mwa bantu to, lwevenya nansha lukese munda mwa matuku mwandamutekete. Mbwenà kwamba ne kakwena cintu nansha cimwe cisambakajaMu to, KaCyena ne lwevenya to, ku musangu ne ku musangu. Ne twètù katwena baswe twitabaayi, maalwevenya ne bintu bisambakaja ku twètù to. Katwena baswe maalu a pa buloba masambakaja ku twètù to. Bidi bikengela ciikalè anu Dyâmpà dya Nzambi kadiyi dyela lwevenya to, Dìyì dya Nzambi, Dìyì dya Nzambi kadiyi disambakaja to, bwalu: “Muntu neikale ne mwoyi ku Dìyì dyònsò didi dipatuka mukana mwa Nzambi.”

<sup>81</sup> Ndongolwelu yetu ya cyena mangumba eyi, ne tuumaalu tudi tutapululangana etu ne bikwabo, ki bidi byele lwevenya mu twètù, ne *bikampanda* ne *bikansanga* ne maalu a pa buloba ne myòdelè ya mvwadilu. Nenku, kaa, bikaadi mu mushindu wa ne cikaadi anu Hollywood myaba yònsò’s. Kumanakumana byòbì ne bikafike anu mùkaadi Angleterre amu, dibiikila dya ku dyoshelu nedibange kwenzangana bundu. Ekelekele! Mùvwà mwaneetu wa balume wamba ne: “Mmunyi mùdì mwa kufikisha mishipa mu bwâtù?” S’ncyà bushuwa’s.

<sup>82</sup> Bidi bikengela twikale ne Evanjeeliyo muyiisha mu kaabujima Kende, mwikale ne bukole bwa Nzambi bwa kushindika nanku bilondeshile mulayi wa cikondo aci ne kujaadika ne ndiswa dya Nzambi menemene. Pa kuumusha Aci wêwè udi anu cidimba cya ekeleeziya cyetu eci, nansha wêwè uteeta munyi, uteeta bwa kwenzela Nzambi mudimu. Udi mufwanyine kuya ku fètè wa ditela dya bilàmbà, udi mufwanyine kwikala ne lulamatu lwònsò kudi ekeleeziya; kadi mutoloku wa Mwoyi wa Cyendeleele awu kawuyi mudyanjila kuteeka munda mwebe to, bwa kwikala mwânà wa balume anyi wa bakaji wa Nzambi, neukole mwikale cintu kampanda cya cikonyangale; kadi kuyiku mwânà wa balume anyi wa bakaji mushuwashuwale, mulelela wa Nzambi to.

<sup>83</sup> Misangu yàbùngì ntu anu ndonda kaabwalu kaanyi kakese kaa kânà kaa mukanku aku. Mushindu wakateeka cidime kampanda nzoolo wa cikuka musangu kampanda, ne yêyè uvwa ne. . . Ndi ntekemena ne kaciyena cyumvwika kunudi bu cya cinyangakaja cijila to. Kadi cidime kampanda wakateeka nzoolo wa cikuka, ne nzoolo wa cikuka awu uvwa. . . kuvwa

kumushaadile diyi dimwepele bwa kukumbajayi bûngì bwa kulaadila. Ndi ngeela mpatà ne kudi muntu mwaba ewu udi mumanye bûngì bwa mayi adi nzoolo wela bwa kulaadila, bwa ne bidi bikengela mayi bûngì kaayi. Kadi, nansha nanku, kuvwa kumupangike diyi dimwepele, bwa kukumbaja bûngì. Ki cidime ewu kwibaye mu diswa dya mukanku, ùvwa ne mayi abidi. Ki kwelaye diyi adi mwinshi mwa nzoolo wa cikuka awu.

<sup>84</sup> Mukanku awu paakatooyikawu munkaci mwa tuzoolo twònsò atu, yêyè uvwa nyuunyi wa wèndè mushindu. Kavwaku yêyè mwa kuumvwa dituuta dya cyokòcyokò dya nzoolo wa cikuka adi to, kavwa wakula muvwa bende. . . muvwaye mujinge kuumvwa babyakula amu to. Nenu cikuka aci civwa cyenda cikala mu lupangu lwa nzoolo amu, ne cidya bya mù lupangu lwa nzoolo abi, aci kacivwa cyakudya bwende yêyè to. Ùvwa yêyè bu kaadibata kabi kumona munkaci mwatu amu. Cikuka aci civwa mwa kutuuta cyokòcyokò kadi yêyè kayiku mwa kubyumvwa to. Civwa mwa kuya mu nunku ne kudya *bikampanda* ne kudya *bikansanga*, yêyè kayi ubyumvwaku to. Nenu ki dîngà dituku, maawu wende, anyi maamù, eyowa's we, bwenu nwênù. Mémè ndi. . . Mu Sud tutu twamba “Maawu.”

<sup>85</sup> Pa nanku, byôbì biine, yêyè. . . wende—wende—wende mamwèndè uvwa mumanye ne ùvwa ne mayi abidi, kadi anu dimwepele ndivwàmu, ki kuyaye wenda ukebangana ne dikwabo adi. Yêyè kunyunguluka mu ditunga dijima, ki ndekeelu wa byònsò kupaapalaye too ne kuulu kwa lupangu kampanda lwa nzoolo. Kumumonaye panshi apu wenda ulonda nzoolo mukole wa cikuka awu muunyima. Kwelaye lubila lukole ne: “Junior! Wèwè kwèna nzoolo to, udi mukanku!” Aci kuumvwikaci anu cijaalame bwende yêyè. Bwa cinyi? Yêyè uvwa mukanku anu kwine kwònsò aku.

<sup>86</sup> Kadi padi mulume anyi mukaji mukasòmbe mwinshi mwa twitabaayi ne ntendeleelu wa mashika, wa kwîsùkwîsù, piikalabi ne yêyè uvwa mulongolola bwa kwikalaye mwànà wa balume wa Nzambi, ne yêyè mumone Dìyì dya Nzambi diyishiibwa mu bukole bwaDi, ne Nzambi uDishindika; yêyè mwikale mukanku kwine kwònsò aku, neanyeemeneKu lubilu anu mudibi cya bushuwa ne ibidi ne ibidi mmwomumwe ne inaayi amu. Kèna pende mwa kupanga kucyenza to, bwalu wende ngiikadilu mwine mmunange Dìyì dya Nzambi. Nansha nî nganyi nî nganyi mukwabo mwambe cinyi, padiye yêyè anu umona Dìyì dya Nzambi dimweneshiibwe anyi, udi ubuuka mutangileKu bwalu ùvwa kânà kaa mukanku.

<sup>87</sup> Muvwabo batungunuka ne kulonda ne, yêyè kwamba ne: “Maman, kadi nêngùùmukè mwab'ewu mbande bishi's?”

<sup>88</sup> Ki Yêyè ne: “Tupika wèwè anu cyanaana, Mémè nênkubàkùlè.”

<sup>89</sup> Ki cintu cimwepele cidi cikengela wêwè kwenza ncyôci aci, ncyã kutupika anu musangu umwepele ne makàsà ebe awu wimane, kutupika musangu umwepele kudi Nzambi, mulayi umwepele ne: “Mukalenge Yesu, ndi muKwitabuuje ne mwoyi wanyi wònsò. Ndi mwitabuuje Mukenji wa dîbà. Ndi muWumone mushindika, ne ndi mumanye ne Wòwò mmulelela.” Tupika ne makàsà ebe awu wìmana, Maman neakubakule. Kutaci to, wêwè udi mukanku, yèyè neikaleku dyakamwe bwa kukubakula.

<sup>90</sup> Mpindyewu, tudi tufika ku dimona ne tudi ne mwoyi mu cikondo cinenaanelaale ne cikondo cinene, kadi malelela a Bible ewu aa, padi beena kwitabuuja bamona aci cishindika, dishindika diine dyaCi’s ki cileeki mene cya ne Nzambi udiMu. Kakuyi mpatà to! Mpa dîbà adi padi Dìyì dilaya, didi Nzambi mulaye adi, dimanyishiibwa. Dimiinu dyápàtuku, ne bôbò badi baCimona ne baCiitabuuja. Bakwabo kabeeana anu mwa kuCimona to, mu mushindu kampanda nebiikale anu basòmbe ne kushaala kacya baaCitangila.

<sup>91</sup> Nudi bamanye’s, ndi muyiishe bikole bikumbane bwa ne—bwa ne. . . mu ditunga edi dijima, bwa ne kabivwa bikengela kwikale mukaji wa nsuki mîpì mu ditunga emu to. Kadi, musangu wònsò, pândi ngaalukila, badiku bavule kupita pavwabo apu. Mbwalu kaayi abu? Kudi cintu cipampalamuke! S’nudi bamanye ne Dìyì ndidi dyambe cyôci aci! Nudi nwamba ne: “Ee, kabyena byenza bwalu to.” S’bidi byenza bwalu!

<sup>92</sup> Kudi mwaneetu mulenga kampanda, wâkamba ne: “Ndi muswe nkutentekeleku byanza, Mwaneetu Branham. Ntu mukunange. Udi munkaci mwa kunyangakaja mudimu webe wa bwambi.” Yèyè ne: “Kî ncikutangile bwa kwambila bakaji abu cyôci aci to.” Yèyè ne: “Lekela bampaasata bàcyènzè bôbò.”

<sup>93</sup> Mémè kwamba ne: “Kadi bôbò nyawu kabayi bacyenza.” Mémè ne: “Mpindyewu. . .”

<sup>94</sup> Yèyè ne: “Ee, abu kî mbwalu bwebe wêwè to, ikala usambidila wêwè anu babeedi cyanaana.”

<sup>95</sup> Mémè ne: “Ncitangile nganyi, pa dîbà adi? Mémè’s ntu mubiikidiibwe bwa kuyiisha Evanjeeliyo.”

<sup>96</sup> Yèyè ne: “Nênkutentèkèlè byanza ndombe Nzambi bwa kukuuumushaci.”

<sup>97</sup> Mémè ne: “Pawikala mwa kwanyisha—kwanyisha bwa nkutentekele mémè paanyi byanza.” Nwamonu anyi? Ki mémè ne: “Mémè nêndombè Nzambi bwa akutabaje mèsù nenku neuCimone.” Pa nanku, aci’s ncyã bushuwa!

<sup>98</sup> Yèyè ne: “Bivwa bikengela wêwè kuyiisha. . . Bantu badi biitabuuja ne wêwè udi musadidi, muprofeta wa Nzambi.” Yèyè ne: “Bivwa bikengela bwa wêwè kwikala ulongesha bakaji abu mushindu wa ku—kupeta mapà manene ne kwamba kwa biprofeta ne bikwabo.”

99 Mémè kwamba ne: “Mmunyi mûndi mwa kubalongesha makumi makole padibo kabayi baswe nansha kwanji kwitabuuja ABC, dyambedi?” Nwamonu anyi? Ncya bushuwa’s. Pa nanku kwêna mwa kucyenzaku to. Aci cidi anu mu cyônsò . . . Ncya bushuwa’s. Pawikala kuyi mwa kwenza bintu byetu bya patupu ebi, mmunyi muwikala mwa kwenza bintu bya nyuma? Bintu bya mubidi. Cya bushuwa’s! Mwaneetu wa balume, mwaneetu wa bakaji, mbifwanyine kuumvwika bu bilele ngeela, kadi’s Ng’Evanjeeliyo! M–M’Bulelela bwa Evanjeeliyo. Ncya bushuwa!

100 Monaayi, tudi tusangana leelu ewu ne bantu . . . Kudi bantu bààbûngì badi kabayi anu mwa kuCiitabuujuaku to, nansha mene bantu badi bûle tente ne Nyuma. Nênnùpè bwalu bumwepele bwikala mwa kunupapula. Dibatiiza dya Nyuma Mwîmpè kî mbwena kwamba ne neubwele to, nansha kakese, kî mpa aci to, kacyenaku ne dipetangana ne musuuka webe to. Aci ndibatiiza, wamonu’s. Musuuka wa munda ngwôwò ewu, munda *emu*, ùdì ne cya kufumina kudi Nzambi. Kadi pashiishe pambelu wêwè udi ne byumvwilu bitaanu, ne bitaanu pambelu . . . bibweledi bidì bifila ku byebe . . . kubwela mu dipetangana ne cisòmbedi cyebe cya pa buloba. Munda, udi ne nyuma, ne mwômò amu udi ne bipatukidi bitaanu: kondo keebe kaa mwoyi, ne dinanga, ne bikwabo, bipatukidi bitaanu bya nyuma awu. Vulukaayi ne, mu nyuma awu wêwè udi mwa kwikala mubatiijibwe ne Nyuma mushuwashuwale wa Nzambi kadi mwikale anu mujimine. Musuuka ngudi ne mwoyi, wôwò nguvwa mulongolola kudi Nzambi.

101 Yesu kaakambaku ne: “Bààbûngì nebalwe kûNdì mu dituku adi, bamba ne: ‘Mukalenge, mémè ewu ncyênàku mwipate baadémons, mwenze byenzedi binene, bya bukole, mwambe biprofeta, mapà manene a Nzambi anyi?’” Yèyè kwamba ne: “Nguumukilaayi apa, nwênù benji baa bubi, kacya Ncituku nansha munumanye to.’ Baabûngì nebalwe mu dituku adi.”

102 Kaayifa kaakamba ciprofeta anyi? S’ùvwa démon. Tudi tusangana kwaka . . . Ne baakwidi abu, bantu banene abu, bàvwà ne cya kwikala balombodi banene mu matuku awu abu, biikàle ne kudipwekesha ne bikwabo byônsò, kadi’s baakapanga kumona Dîyì dya Nzambi Dyôdì diine dimweneshiibwe kumpala kwabo.

103 Tudi bafwanyine anu kwangata musùmbà wa bôbò abu bândi mufunde kaaba aka. Kadi netwămbè bishi bwa Baalama? Yèyè’s uvwa . . . Nudi nwamba ne: “Nzambi utu ushintulula mmwenenu Wende.” Katu ushintulula mmwenenu Wende to!

104 Paakapatuka Baalama bu muprofeta, ne paakapwekaye kuntu kwaka, mwepiskopo, muyiishi, cyônsò cinudi baswe kumwinyika aci, s’ùvwa muntu munene. Kadi paakakonkaye Nzambi pa bidì bitangila dipweka dya kuntu kwaka bwa

kuya keela Izaleela mulawu, yêyè kavwa mubanangeku to anu kwine kwònsò aku, pa nanku paakalombaye bwa kuya, Nzambi wakamba ne: “Kuyi to!”

<sup>105</sup> Pashiishe kutumabo muntu wa mwânzù mutumbuke, musùmbà mujima, pàmwäpa bamwe baa ku beepiskopo anyi bakulu batangidi, anyi cintu kampanda, kuntwaku, kwambabo, biikale ne dilonga ditambidile dya tulaasa, bwa kumuswishabo. Yêyè kwalukila e kukonkaye cyakabidi Nzambi. Kabyena bikengela bwa wêwè kukonka Nzambi bwa musangu mwibìdi to! Padi Nzambi ucyamba bwa musangu wa kumpala, n’Cyòci aci! Kabyena bikengela bwa wêwè kwindila cintu ní ncinyi ní ncinyi to.

<sup>106</sup> Rebekah kaakindila bwa kupetaye dîyi dimutumina diibìdi to. Baakamukonka, kwamba ne: “Uyaaya anyi?”

<sup>107</sup> “Mulekelaayi yêyè ämbè.”

<sup>108</sup> Kwambaye ne: “Nyaaya!” Yêyè uvwa musonsodiibwe kudi Nzambi anu ne mwoyi umwe. Wakashaala umwe wa ku baamukalenge-mukaji baa mu Bible bwa dyenza dya bwalu mwimanyine pa dimutùtusha dya Nyuma wa Nzambi uvwa mumusake bwa kupetaye civwa bulelela bwa kabuyi dyela mpatà abu, ne yêyè wakaciitabuja.

<sup>109</sup> Mpindyewu tudi tusangana ne, Baalama, mu bushuwa bwa bwalu, kavwa mwa kumonaku to. Wakapatuka e kutangila pa cisamba aci, kwambaye ne: “Mpindyewu, anji indila kakese! Twêtù tudi cisamba cinene, cyalabale muneemu emu, wênù nudi anu musùmbà mutangalakangane cyanaana.” Nudi numona anyi? “Ne twêtù bònsò—twêtù bònsò tudi twitabuua Nzambi umwe.”

<sup>110</sup> Aci’s ncya bushuwa. Bavwa bònsò biitabuua Nzambi umwe. Badi bònsò bakuukwila Yehowah. Tangilaayi mulambu wa Baalama: byoshelu mwandamutekete, nomba mupwangane wa Nzambi’s; ekeleeziya mwandamutekete, nwamonu’s; bimpanga bya mikooko mwandamutekete, biikale byamba bwa dilwa dya Mukalenge. Bilondeshile maalu mudiwu menemene, yêyè uvwa mwitabi wa maalu mudiwu mafundiibwe anu muvwa Mòsà; kadi, nudi numona’s, kakuvwa dishindika dya kudi Nzambi to. Mwômò amu, bònsò babidi bavwa baprofeta.

<sup>111</sup> Kadi mu mudimu wa bwambi wa Mòsà, muvwa Dikunji dya Kapyä dya ditambe-mfukilu, Bukênkè bùvwà bulebelele mu mwaba uvwa cituudilu awu. Muvwa dyondopa dya kudi Nzambi, muvwa lubila lwa Mfumu mu cituudilu, bimanyinu binene, dyondopa dya kudi Nzambi, ne maalu a kukema ne bikwabo biikale byenzeka munkaci mwabo. Civwa ncimanyinu cya Nzambi udi ne mwoyi munkaci mwa cisamba Cyende.

<sup>112</sup> Bilondeshile maalu mudiwu menemene, bònsò babidi bavwa mu bulelela. Kadi Baalama wakateeta kuswisha bantu, ne wakabalowa kadi kubabwejaye mu cintu. Dìbà kaayi adi?

Anu pabwìpì menemene ne kudyatabo mu buloba bulaya. Mu dituku dimwe anyi abidi, bavwa bafwanyine kwikala mu buloba bulaya.

113 Kadi mpindyewu ndi nciina ne nkweṣi... Ebu mbwalu bukolàkòlàayi bwa dyamba, dimwe dya ku matuku adi panshi aa nebangaase cingoma bwa Cyôci aci. Kadi vulukaayi eci, ne, bakaadi munkaci mwa kulowa maekeleeziya kudi Nsangilu wa Bukwântèdeleelu, yèyè awu ngudi unubwejamu buludi, bwa kwambaye ne: “Nudi cisumbu cimwe.” Kanwena cisumbu cimwe to! Patukaayi munkaci mwa cintakanyi aci nwikale batapuluke! Ncya bushuwa ne, n’Cilelela. Bidi bikengela twikale baditole ne cintakanyi aci, nwikale anu kule kwa menemene naaci.

114 Baalama kwambaye ne: “Tudi... tulekelaayi bânà beetu balela baselangane bwalu, twamb’eku twamb’eku, s’tudi twitabuuya Nzambi umwe.”

115 “Mmunyi mudi babidi mwa kwendela pamwe piikalabo kabayi bapunge dîyì?” Mmunyi munudi mwa kwenda ne Nzambi panudi kanuyi biitabangane ne Dîyì Dyende? Mmunyi munudi mwa kusakidilaKu twitabaayi ne bikwabo, panudi balongolwela dibenga kucyenza, anyi, bapete dîyì dinutumina bwa kubenga kucyenza? Kanwena mwa kucyenzaku to. Kakwena mushindu wa kucyenza to, mwaneetu wa balume, mwaneetu wa bakaji. Kanwenaku mwa kusambakaja lwevenya alu ne cidi kaciyi cyela lwevenya to. Mâyì ne mafuta kabyenaku mwa kusambakana to. Mîdimà ne bukênkè kabyakusambakanaku to. Bukênkè budi ne bukole menemene, mu mushindu wa bwipata mîdimà musangu umwe.

116 Pa nanku katwenaku mwa kubisanga to. Nansha mpekaatu kabidi ne maalu a pa buloba kanwenaku mwa kubisambakaja to. Kanwenaku mwa kusanga Ekeleeziya ne dingumba to. Kanwena mwa kusanga Ekeleeziya ne twitabaayi to. Kanwenaku mwa kusambakaja maalu a pa buloba ne Evanjeeliyo to. Kabyakusambakanaku to! “Patukaayi munkaci mwabo, ikalaayi batapuluke,” mudi Nzambi wamba, “Nênnwākìdìlè Kùndì. Nenwikale bânà Baanyi baa balume ne baa bakaji, Mèmè nêngìkalè Nzambi kunudi.” Katwenaku mwa kucyenza to pacidi maalu aa kaayi mamweshiibwe, ne Dîyì dya Nzambi bwa dîbà edi kadiyi dijaadikiibwe ne m’Bulelela. Ikalaayi nwenda nulonda mu dikàsà.

117 Mpenta, s’ki bwa cinyi Luther wakajimija mukenji wende. Mushindu awu ngwākajìmijà Wesley mukenji wende. Nwamonu’s, bu ekeleeziya wa ba-Weslèyens mutungunuke, nunku’s mbashaale beena Mpenta. Bu ba-Luthériens batungunuke, nunku’s mbashaale ba-Méthodistes. Nwamonu anyi? Mpindyewu beena Mpenta bôbò batungunuke, neciikale Mukaji musela. Nwènù bashaale paanyima ne batungunuke ne kwenda kwalukila cyanyima mu maalu a pa buloba mushindu

unuyaaya mpindyewu awu, nenujimine! Neciikale anu cizubu pa cizubu, ne cikolakola cidi ne cya kwoshiibwa. Aci tudi bamanye. Yèyè neasangishe Blé Wende mu diyeeba. Kadi tuzubuzubu atu Yèyè neätwòshè ne kapyà kadibo kabayiku mwa kujima to, nansha byôbi ne civwa nciwadi. Ncya bushuwa ne civwa ciCitwale. Kadi Mwoyi wakacishiya paakenzaci anu ne cyâshààdi dibèji apu, wakatungunuka ne kupatuka bwa kwenza cintu cya cyanaana too ne mwakalwaci kufika mu cipidi cyaci mu kaabujima.

118 Ki mwapicila kabidi Ekeleeziya mu Dibingishiibwa, Dijidiibwa, ne Dibatiiza dya Nyuma Mwîmpè (dyalujulula dya mapà), utungunuka ukabwela buludi mu dyenjiibwa dya mu cimfwanyi cya Kilisto. Kilisto m’Mubaki, Ekeleeziya m’Mukaji musela, ne Mukaji musela nciwapa cya Mubaki. Nebikengele bwa kwikalaYe Ekeleeziya Dìyì, kî ng’ekeleeziya wa cyena mangumba to. Yèyè neikale Ekeleeziya Dìyì, Dìyì didi dimanyishiibwe adi, ne ku Dìyì dya Nzambi dishindika.

119 Baalama, kavwa yèyè mwa kumona dishiilangana to. Bàbûngi kabeenaku mwa kudimona to.

120 Pâlò kavwa mwa kuCimonaku to, nansha muvwaCi cishindikiibwe anu kumpala kwende mene.

121 Datana kavwa mwa kuCimona to. Datana wakapatuka kwaka, kumonaye Mòsà ne kumanyaye. Kupatukaye kwaka, kwambaye ne: “Wèwè udi uteeta kudyambidila mùdi umwepele mu musumbà ewu. Disangisha dijima ndya cijila!” Nzambi kacya katuku mwanji kukwata mudimu mushindu awu nansha. Bivwa bikengela bwa yèyè kwikala mumanye civwa cîmpè kutamba aci. Ki kwambaye ne: “Ee, disangisha dijima’s ndya cijila. Wèwè ukaadi uteeta kudyenza...” Bu twètù mwa kucyamba leelu ewu, mu ngaakwilu wa mu mùsèèsù: “Èhelè.”

122 Kadi Mòsà uvwa mumanye ne Nzambi nguvwa mumutume kuntwaku bwa ciine aci. Kwambaye anu ne: “Mukalenge...” kudyupwilaye panshi mu—mu mushiku wa mbelu wa ntenta wa kusambakeena.

123 Ki Nzambi kwambaye ne: “Tapuluka nende.” Ki Yèyè kubamina nzwi.

124 Nenku vulukaayi ne, mpekaatu wâkenzabò kudi Izaleela awu (ku cyakamba Baalama ne, “Badi bônso bamwe” aci.), mpekaatu awu kacya kabatuku bamufwile Izaleela luse to. Nenku tangilaayi, lekelaayi nnupe cimfwanyi ciikalà mwa kunulenga; mu bantu miliyò ibidi bààkuumukà mu Ejipitu abu, babidi baa kudibo mbaakabwela mu buloba bulaya. Muntu ne muntu wa kudibo wakadya cintu anu cimwecimwe aci, bônso baakaja maja mu Nyuma, bônso bavwa ne bintu byônso biteekela pamwe; kadi pakaavwabi ne dîbà dya kutapuluka ndyôdi edi, Dìyì ndivwa dyenze ditapulula adi. Ki mudibi kabidi



leelu ewu! Dìyì ndidi dyenze ditapulula! Paakalwa cikondo aci, yêyè wakamba ne: “Mona’s, mwab’ewu, tudi. . .”

<sup>125</sup> Bifwanangane bikole, tangilaayi, Bible mmwambe ne: “Mu matuku a ndekeelu nyuma ibidi ayi,” Maataayi 24.24, “neyiikale mifwanangane anu menemene, mu mushindu wa bifwanyine kuseeswisha ne Basungula mene bu ne bivwa mwa kwenzeka.” Cizubu aci ncifwanangane anu menemene ne blé, kadi kî m’blé to. Nwamonu anyi? Kî m’blé to, kadi ncifwanangane anu nende menemene. Nwamonu anyi? Cifwanangane bikole, mu mushindu wa bifwanyine kuseeswisha ne Basungula mene. Nudi badivwije dingumba ne nudi nupona mu dingumba adi, nuumunyina ne nufwa, kadi blé yêyè mmutungunuke anu kutungunuka too ne mudiye ukapatukila mu. . . Nwamonu anyi? Ncya bushuwa menemene! Ncitwadi, kadi kî m’blé to.

<sup>126</sup> Vulukaayi ne, blé yêyè udi anu mutungunuke ne kuya. Mu dibiika dya ku lufu dikanda dyônsò dya blé adi nedibande dibwele mu blé, padiye wenda uya bwa kwenza mutu apu, bwa kupatuka mu dibiika dinene dya ku lufu.

Kacya kacyiku cifwidiibwe luse to!

<sup>127</sup> Twänjààyi kwimana katanci kakese mwab’ewu. Ndi ntekemena ne ncyêna nnufudisha mupuuya wa munda to. Kadi, tangilaayi, ngänjì nnukonkebi cintu kampana. Twänjààyi kwangata cyôci aci. Twămbèbi, cileejilu ne, makumi aa mmafwanyine kwikala a cya bushuwa. Padi bilume bya kudi mulume ne bya kudi mukaji bilwa, piikalabi ne nukaadiku bamanye tulangi twa disangishila bivuba ne mayi anyi—anyi disanga dya mamiinu a nyama milume ne mikaji dya ngombe ne bikwabo, nenusangane ne difila dya bilume bya kudi mulume didi dipatula bivuba bitwe ku mùliyò mujima. Ne difila dya kudi mukaji didi dipatula mayi mùliyò mujima. Kadi nutuku bamanye ne kudi anu dimwepele dya kudiwu aku didi ne bufuke anyi? Twànà tukese twa ngombe atu, anyi nî ntwâ nyama kaayi yônsò atu, mu mùliyò ya bivuba eyi, mùliyò umwe wa bivuba ewu, nekwikale anu kaacivuba kakese kamwepele aku kààdìfìndà munkaci mwa tukwabo tuubivuba twônsò atu ne kubândila pamutu paatu too ne ku dikapeta dya diyi dya bufuke adi ne kudikoka kubwela munda mwadi, kadi bikwabo byônsò abi bifwa. Cimwe cya kudibi ncidi cilongolwela mwoyi, kî mbikwabo byônsò abi to, nansha mudibi byônsò bya mwomumwe. Umwe pa mùliyò mujima!

<sup>128</sup> Ambaayibi tŭng nî mmudibi diloolo edi? Kudi beena Kilisto mùliyò nkama itaanu, mudibo bacinka, ngeela meeji, pa buloba, cishiferi bu nanku, cidi anu cishiferi cya cijikè ne bijeengu cyanaana. Bu Dyambwibwa mwa kwenzeka diloolo edi pa dîbà adi, mu badi ne mwoyi badi ne cya kuya, s’nkufwanyine kwikala anu bantu nkama itaanu cyanaana. Ee, bantu kudi bŭngì abu badi bàjiminà dituku kana dyônsò edi, pamwe ne

bûngi abu, badibo kabayi mwa kumanya ne mbaye penyi to. Mukaji musela neambwibwe ne twêtù bafwanyine kudikonka ne ncinyi cidi cyenzeke; kadi eku bantu paabo batungunuka anu ne kuyiisha, bamba mudibo “bapeta *bikampanda*, ne *bikansanga*, ne *bikankenga*,” kadi monaayi ne ndyediibwa kaayi dya mâyi ku makàsà didi difwanyine kwikalaku adi. Twânji mene anu kwamba ne mbifwanyine kwikala nanku awu; ncyêna ngamba ne mmudibi to, ncyêna mumanye to, kî mmêmè udi ne bukookeshi bwa cyôci aci to. Nzambi ngudi Mulumbulwishi wa cyôci aci. Kadi anji monaayi mudibi bifwanyine kwenzeka anu bipeepele nunku ewu, mu bishiferi byônsò abi ne bikwabo, mudibi bifwanyine kujaadikiibwa.

129 Koola kaakamona Aci bwa cinyi? Datana kaakamona Aci aci bwa cinyi?

130 Aakaba kaakaCimonaku yêyè bwa cinyi? Pavwa Aakaba . . . Pavwa Yehoshafata mupweke kudi Aakaba aku apu, yêyè kwamba ne: “Aakaba, tudi mu lutatu. Udiku mumanye ne Nzambi ngwâkatupêêsha buloba ebu anyi? Yoshuwa ngudi mutwâbànyinebù. Udi mumanye citupa cya buloba cidi beena Suuliya bangate eci, kî mbuloba bwetu twêtù anyi?”

“Eyowa’s!”

131 “Beetu bânà balaala ne nzala, kadi beena Suuliya (beena lukuna beetu’s) badiisha baabo bânà, babuukucisha mafu ne blé uvwa ne cya kwikala wetu twêtù.” Aci’s ncilelela bilondeshile Mifundu. Yêyè ne: “Udiku mwa kunkwacisha bwa kuya kuntwaku ne kubunyenga anyi?”

132 Mpindyewu, misangu mikwabo muntu mwîmpè mwikale mu bwenzeji bwa bubu’s neadilekelele. Mbîmpè kutangilaayi, ekeleeziya, ikalaayi batangile ne ntema yônsò.

133 Mpindyewu, katanci aka, Yehoshafata, bu muvwaye mutendeledi munene, kwambaye ne: “Ee, bivwa bikengela anu twêtù kuyaku, cya bushuwa, bwa etu màkàlu a mvita, s’tudi bônsò anu bantu bamwe.” Kadi kabavwa bantu bamwe to! To! Yêyè ne: “Ee, etu màkàlu a mvita’s ng’enu màkàlu a mvita, bantu beetu’s mbantu beenu. Cya bushuwa, tuyaaya.” Yêyè ne: “Kadi twânji kukonkaku Mukalenge dyambedi’s.”

134 Ki yêyè kwamba ne: “Kaa . . .” (Aakaba’s) “. . . ee, kakuyi mpatà to, s’ki meeji avwa akengela twêtù kwikala beele ngôwò awu. Ee, netwikale mwa . . .”

135 “Kudiku muprofeta wa Mukalenge anyi?”

136 Awu ne: “Ndi naabo seminere mûle tente. Ndi naabo kî mbângi kî mbângi nkama inaayi mwaba ewu, baa batambe bwîmpè bādîku. Bwônsò bwabo badi ne mapolome abo a Ph.D., L.L.D., L. ibidi ne D. yabo, ne bikwabo byônsò bya ku byôbi abi. Badi muntu ne muntu . . .” Mpindyewu vulukaayi ne, bavwa baprofeta baa beena *Ebelu*, baa mu cilongelu cya baprofeta.

137 Yèyè ne: “Batwalaaku, twǎnjìbi kubateeleja.”

138 Musangu awu ngeela meeji ne ùvwa n’Zedekiya, mfumu munene uvwa kumutu kwa (mwepiskopo) bôbò bônso awu, kuseemenaye mwab’awu, ne yèyè uvwa ne disonsodiibwa. Ùvwa ne disonsodiibwa, kakuyi mpatà to. Kuseemenaye mwab’awu, ne yèyè uvwa mudyènzèle nsengu minene ibidi ya cyamu cifiike. Yèyè kwamba ne: “Udi mumanye’s, EMU MMUDI MUKALENGE WAMBA: ‘Newangate nsengu eyi ne neusake beena Suuliya too ne pambelu paa ditunga.’”

139 Ee, bakwabo bônso kwambabo biprofeta ne: “Aci ncyá bushuwa menemene!” Yônso wa kudibo, seminere mujima, ne diyì dimwe. Nwamonu anyi?

140 Aakaba kwambaye ne: “Wamonu anyi?”

141 Yehoshafata, bu muvwayeku wa nyuma, nudi bamanye’s, kavwa anu mumbe kuuminyina yônso to, kwambaye ne: “Kadi kakwenaku mukwabo nansha umwe cyanaana mwaba kampanda, utudi mwa kukonkelaku anyi?”

142 “Bwa cinyi bûdì ukebela kukonkela kudi bakwabo, padi Bukwântèndeleele bwônso nkòong butuule bupuwe (nsangilu mujima), s’mbwebu bwamba ne ‘Mbikumbane?’” (Mfwilaayiku luse, nwamonu’s.) “Cintu cyônso nkòong’s nyewu cyǎmbì ne: ‘Ki civwa cikengela twètù kwenza ncyôci aci.’” Nwamonu anyi? “‘Ki civwa cikengela twètù kwenza ncyôci aci.’”

143 Yèyè ne: “Kadi kakwenaku mukwabo mwine nansha umwe mwaba kampanda anyi?” Wa pabwende awu, nudi bamanye’s.

144 Yèyè ne: “Eyo, udiku. Kudi umwepele, Miika mwânà wa Imla, kadi mêmè ntu mumukine.” Bitu misangu yônso anu mushindu awu’s. “Ntu mumukine bwalu yèyè utu misangu yende yônso anu ukuma cisamba cyetu bisuus bya mèyì makole, ne ungeela mêmè mwine ewu milawu, ne ungamba mèyì anu a mabi awu. Ndi mukine muntu awu!”

145 Yèyè ne: “Aa, mfumu kaakuluku nanku to.” Yèyè ne: “Nda kamwangataayi.”

146 Pa nanku kuyabo kuntwaku kudi mwânà wa Imla awu, bamwe baa ku—ku beepiskopo abu, anyi, bamwe baa ku bakulu, ki kuyabo kuntwaku, kwambabo ne: “Mpindyewu, teejeja, udi muswe kwalukila cyakabidi mu bulongolodi anyi? Wǎmbè cintu anu cimwecimwe cidibo bôbò bamba aci, nebakwalujemu.”

147 Kadi kwenzekabi ne Nzambi uvwa ne muntu uvwabo bôbò kabayiku mwa kutwa byanza to; Nzambi ukaavwa ne Byende byanza pambidi pende. Yèyè uvwa anu muleeji wa Bulelela bwa Nzambi. Kwambaye ne: “Cya bushuwa,” mwakambaye, “nèmpwekèku, kadi nèngǎmbè mêmè anu cidi Nzambi uteeka mukana mwanyi aci.” Ki muntu wa Nzambi nyèyè awu. Yèyè ne: “Mpeeshaayi bufuku ebu.” Ki bufuku kulwabu, nenku

Mukalenge kwakulaye ne muprofeta awu, kaamuntu cyanaana aku. Nenku katanci aka, kupatukaye paakacyabu mu dinda.

Bôbò ne: “Bwalu budi cinyi, Imla?”

148 Yêyè ne: “Ndaaku,” yêyè ne, “kadi ndi mumone Izaleela mutangalake bu mikooko pa kakuna, kayiyi ne mulami to.”

149 Yêyè ne: “Mvwa mukwambile cinyi! Mvwa mukwambile cinyi pa bwalu abu!” Ki yêyè kwamba . . .

150 Pa dîbà adi mwepiskopo munene kusemenaye kadi kumunangulaye dipi ku mishiku pakalakaa, kwamba ne: “Njila kaayi udi Nyuma wa Nzambi muyiile? Bwalu mêmè ndi mumanye ne mvwa ne Nyuma; nkaadi muje maja mu Yêyè awu, nkaadi mwenze bintu byônsò ebi. Wamonu’s, mvwa—mvwa ne Nyuma pambidi paanyi. Njila kaayi udi Ye muyiile?”

151 Mpindyewu, monaayi, bu mvwa Imla mwânà wa Nzambi, anyi muprofeta mulelela wa Nzambi, wakakenketa cikeena-kumona cyende ne Dîyi. Cyôci kaciyi cikumbanangane ne Dîyi to, ncyá mashimi. Nwamonu anyi? Dîyi dya dîbà adi, nwamonu’s. Mpindyewu, yêyè wakamba bilondeshile Mifundu ne, buloba abu buvwa mbwabo bôbò, buloba buvwa mbwabo. Bilondeshile Mifundu, byônsò bivwa bimweke bijaalame pa kuumusha kantu kamwepele.

152 Vulukaayi ne, Dîyi dimwepele ndyakenza ne cimvundu cyônsò eci cilwe, Eva wakabenga kwitabuuja Dîyi dimwepele dya Nzambi; ku ntwadijilu kwa Bible, Dîyi dimwepele ndivwa dikebe lutatu. Yesu, mulwe munkaci mwa Bible, wakamba ne: “Muntu neikale ne mwoyi ku Dîyi dyônsò didi dipàtukà mukana mwa Nzambi.” Kundekeelu kwa Bible, mmwambe ne: “Ewu yônsò úmusha Dîyi dimwepele anyi wasakidilaKu dîyi dimwepele awu.”

153 Kî ncutupa cya Evanjeeliyo to. . . Ba-Méthodistes badi ne citupa, ba-Baptistes, ba-Presbitériens, ne bakwabo, badi ne citupa cya Dyôdi adi, Katolike badi ne citupa cyaDi, Bantemu baa Yehowah, bakwabo bônsò abu.

154 Kadi Cidi n’Dîyi mu kaabujima, Dîyi dyônsò, Dîyi dya dîbà; ki cìdi ne mushinga. Kadi katwadyakucyenzaku to anu too ne piikala Nzambi mulaabe muprofeta udi mwa kwimana ne kwamba Dyôdi adi, ne kuDishindika, ne kuDijaadika ne nDya cya bushuwa. Necedifinde cipicile buludi munkaci mwa bantu, mu mushindu wa kabayi baDimanyaku to, anu mukaadibi byenzekenzeke misangu yônsò.

155 Nwênù beena Katolike, bu Jeanne d’Arc, nwâkamwosha bamuswikile ku mucu ne mmuloji; pashiishe nwênù kajuula mibidi ya bansaserdose abu, paanyima paa bidimu nkama ibidi bimane kupita, ne kuyeela mu musulu. Kanwakamanya Patrick Munsantu ne bakwabo abu to.

<sup>156</sup> NeCinupicile cyakabidi buludi mu byanza, katanci kakese aka. Nzambi neàcyènzè, ne kanwakumanyaku nansha ne ncyenjiibwe to. Nwamonu's, Yêyè udi udifinda upita buludi ne wangata Mukaj'Ende musela ne ùbànda Nende, ne uMwiba uya, anu munkaci mwa bantu mene amu.

<sup>157</sup> Tudi tusangana ne, Miika mukese ewu kwambaye ne wakakenketa, wakamanya ne Nzambi ukaavwa mwambe, mwakwile kudi muprofeta mulelela kampanda kumpala kwende yêyè. Muprofeta wa kumpala kwende awu, wakamba cinyi? Wakamba nunku, wakamba ne: "Aakaba, bu muwèdì mashi a muntu mwakane panshi, anyi mashi a Naabota mwakane awu, mbwa neyilake ebe peebe mashi, ne a Izabela." Nenu aci's mmwômò menemene, bivwa bikengela cyenzeke bwalu Nzambi nguvwa mucyămbè. Mmunyi muvwa muprofeta awu mwa kwamba ciprofeta cimpè pavwabi ne bubi mbuvwa bùmupiišha?

<sup>158</sup> Mmunyi mûndì mwa kwambila Cikondo cya Ekeleeziya wa Laodikiya eci maalu mimpè padi Nzambi mwakule maalu acipiisha? Wèwè udi butaka, mwena dikenga! Udi wamba ne: "Ndi mubanji, ndi ne bitambe bwîmpè... Ndi ne maeleeziya bu mudi ba-Méthodistes, ne ba-Baptistes, ne ba-Presbytériens. Ndi ne *bikampanda*, ndi ne *bikansanga*; *bikampanda*, *bikansanga*, ne *bikankenga* bya bitambe bwîmpè." Aci ncyà bushuwa, kadi kuyi mumanye ne udi butaka, mpofo, mwena dikenga to, ku cintu cilelela cidì Nzambi umwenesha eci. Necinupicile anu munkaci amu, mushindu ewu, cipatuka buludi ciya. Nwamonu anyi? Itabuujayi, nwènù bantu, kumpala kwa dîbà kwikaladi dikaadi dimane kupita.

<sup>159</sup> Mpindyewu, tudi tusangana ne yêyè wakamunangula dipi ku mishiku, kwamba ne: "Njila kaayi udi Nyuma wa Nzambi...?"

<sup>160</sup> Miika kwambaye ne: "Ndi mumone Nzambi musòmbè pa Nkwasa wa butumbi. Ne bônso...Yêyè kubiikila baaminyampala baa mu Dyulu, kwamba ne: 'Nganyi utudiku mwa kutuma bwa kuyaye pa buloba kaseeswisha Aakaba?'" Yêyè ne: "Ki nyuma kampanda wa mashimi kubândayè ne kudyupwilaye panshi kumpala kwa Nzambi; mwena mashimi." Nenu vulukaayi ne, nyuma wa mashimi awu wakabwela munda mwa baprofeta abu, s'bivwa bikengela kwikalabo bamanye pa dîbà adi ne nyuma uvwa pambidi paabo awu kavwa bilondeshile Dîyì to. Kadi bavwa batambe kwikalaba basaluke bwalu bavwa baprofeta baa mfumu, bwalu bavwa ne bintu byônso byenda anu bilenga.

<sup>161</sup> Nenu ki cyôci aci cidì ekeleeziya mwenze leelu ewu. Nukaadi baye kule ne dilabula dya cyena kale dinuvwa naadi kukaadi bidimu panuvwa nwimanyina mu masangu a misèsù nuyiisha Evanjeeliyo apu.

Bapatuke mu malngolodi awu biikale nudibiikila "cisamba cidishikamine" (Ê!) s'mbwalu nukaadi badijngilemù cyakabidi,

bu mudi ngulube mwalukile ku bitoci byende anyi mbwa mwalukile ku bilushi byende. Piikalaci cimulùkìshe musangu wa kumpala, s'necimulùkìshè cyakabidi. Ncya bushuwa's! Nzambi mmunutwile mukana Mwende, Yèyè mmwambe ne: "Udi civumvu, kuyi luuya anyi mashika"; kwenza ndambu wa masangisha, pashiishe kwimbaku bisanji ndambu, mijiki, ne—ne kwimbaku ndambu mukese wa misambu, paabi, kakuyi mpatà to . . . ncyambe kushaala anu bu bundu's bwa bwena Kilisto.

<sup>162</sup> Mwanaanyi wa balume uvwa mumbiikile dîngà dituku bwa kuya kalandila ku television, cisumbu cya bimbi baa misambu muvwa bantu balwe. Musumbà wa tu-Rickys twimane mwab'awu, tuzunzuka twatwa eku twatwa eku byenze bu maja a bidùndadùnda aa, biikale bimba miyengà ayi, s'mbundu be bwa Yesu Kilisto! Kakucyena kabidi dísù dikole mu ekeleeziya to nansha kakese. Mbimweke anu bu ne byònsò bikaadi anu cintu kampanda cya maja a bidùndadùnda's, ne dileejangana dya mvwadilu, pamutu paa Ekeleeziya wa Nzambi udi ne mwoyi mudi Yesu Kilisto mwa kudimwenesha Yèyè mwine mu bukole. Bwanyi mêmè mbimweke anu bu ne, kudi cintu cipampalamuke mwaba kampanda. Badi munkaci mwa kusenunuka's. Ne Bible mmwambe ne mushindu awu nguwabi mwa kwikala. Nwamonu anyi? Tangilaayi numone kunukaadi. Nwadamukaayi, tabulukaayi kumpala kwa dîbà kwikaladi dikaadi dimane kupita.

<sup>163</sup> Mpindyewu tudi tusangana ne, Yèyè mmwambe ne: "Nganyi utudi mwa kutuma kuntwaku bwa kaseeswishaye Aakaba, bwa kamufikishaye ku diya kuntwaku bwa kuuja mêyi a muprofeta awu?" Nwamonu's, muprofeta yèyè anu mwambe Diyì, maulu ne buloba nebijimine kadi Dyòdi kadyena mwa kupangilaku to. Bikengela anu Dyenzeke. Pa nanku ki cyakenza ne, bivwa bikengela anu bwa bwalu abu kwenzekabu.

<sup>164</sup> Yèyè kwamba ne: "Elaayi muntu ewu mu buloko bwa munda, nwikalaayi numudiisha dyâmpà dya kanyinganyinga ne mâyi a kanyinganyinga. Pângààpinganà mu ditalala, mêmè ki wâlwa kutangila bwalu bwende."

<sup>165</sup> Miika kwimanaye mwab'awu kayi unyunga to, mumanye ne yèyè nguwwa ne Nyuma wa Nzambi. Ciprofeta cyende, bikeena-kumona byende bivwa bya cya bushuwa. Mukenji wende uvwa wa cya bushuwa, bwalu Úvwa EMU MMUDI MUKALENGE WAMBA wa ku cikeena-kumona, EMU MMUDI MUKALENGE WAMBA wa ku Diyì. Civwa ne cya kwikala cya bushuwa, civwa ng'EMU MMUDI MUKALENGE WAMBA. Kwambaye ne: "Wèwè mudidingeku anu mupingane, Nzambi kî mmwakuleku naanyi to." Ne nwènù's nudi bamanye cyàkenzekà, bushuwa's. Nwamonu's, nwènù . . .

<sup>166</sup> Ikala muumvwe, mwaneetu. Teeleja.

167 Bushuwa, Kaayifa, kavwa mwa kuCimonaku to. Bwa cinyi kaakatangilaku panshi...? Ûvwa—ùvwa mwepiskopo, ùvwa paapà wa ekeleeziya yònsò misanga ntete. Muntu awu kavwaku mwa kumona Yesu mwimane mwab'awu bwa cinyi? Kavwaku mwa kuumvwa bwa cinyi? Pavwabo bimba Musambu wa 23 apu, Musambu wa 22, eyowa's we, mu ekeleeziya amu, ne: "Nzambi Wanyi, Nzambi Wanyi, WàNdekèdì bwa cinyi?" piine apu ki Yèyè wawa mukudika ku nkuruse. Mifundu miine, Nzambi mwine uvwabo munkaci mwa kukuukwila awu, nyawu bavwa munkaci mwa kuMupiisha ne kuMushipa bu ne "mmukoleshi wa maalu." S'ki cyôci aci.

168 Ncifwanyine kunupapula bu mêmè mwa kunwambila ne cidì pabwipi menemene ne kwenzeka cyakabidi. Bible mmwambe ne Yèyè uvwa usanganyiibwa pambelu mwikale uteeta bwa kukookola bwa kubwela, kadi muntu nansha umwe kayiku muswe bwa kuMulekela abwele to: "Ewu ûndi Mêmè munange Ndi mmunyooka ne mmudyula, Ndi mmutandisha, Ndi mmunyukulula, kadi mbwalu Ndi mumunange. Unzulula Mbwele." Eyowa. Kabayiku bafwanyine... "Vulukaayi ne, Ncifwa muswe bwa kubwela mu ekeleeziya to; n'yèyè, muntu nkaaya awu." Kavwa ne mushindu wa kubwela mu ekeleeziya to, bavwa baMukangile pambelu ne kâlè. Anudingumb-... anu bulongolodi bumwepele bwa ku ôwò ônsò awu, mmu cikondo cya ekeleeziya eci, muvwaYe usanganyiibwa pambelu paa ekeleeziya. Mwediibwe pambelu! Mubengiibwe! Mudyombodiibwe! Bwalu... Wakamweneshiibwa anu bwa katupa kîpi mu ekeleeziya mikwabo ayi, mu mmwenekelu wa dibingishiibwa, ne bikwabo; kadi emu nunku mwaba ewu, cikondo cidì cilwa mpindyewu eci, ndimweshiibwa mu kaabujima dya dishindika dya Yesu Kilisto umwèumwè awu makeelela, leelu, too ne kashidi. Kaa, ndi ngiitaba ne tudi ne batentudi bûngi cyanaana, kadi kenketaayi cya kumpala, cya ku cibangidilu aci.

169 Mòsà wakatuuluka ne mikenji ya Nzambi, bwa kusungila Izaleela; ne paakenzaye aci, wakenza ndambu wa bishima. Batentudi kumulondabo. Bu ne bôbò abu mbaakalwa kumpala, nunku yèyè nguvwa mwa kwikala mutentudi. Nwamonu's, yèyè uvwa ne Dîyi dya Mukalenge, ne Mukalenge wakashindika; yèyè wakashaala anu kacya wapuwa.

170 Nenku, nudi bamanye ne, cintu cyôci cimwecimwe aci ncilaayiibwe mu matuku a ndekeelu anyi? "Anu muvwa Yambele ne Yane bakandameene Mòsà amu, ki mwikalabi kabidi ne bantu baa meeji mooneke aba pa bidi bitangila Bulelela." Nenku padi bulongolodi bulama... bupicishila muntu mu bwine bulongolodi abu, byaleeji anu ne kî mbufumine kudi Nzambi to; bwalu, Nzambi utu wenza bintu abi bwa kukoka ntema ya bantu, ki pasiishe Mukenji ubilonda. Kabiyi nanku to, pa dibà adi kî

n’Nzambi to. Kí n’Nzambi to! Nzambi utu Yèyè wenza anu aci misangu yònsò.

<sup>171</sup> Yudaase kavwaku mwa kuCyumvwa to. Wakenda pamwe Nende, kaakaCimonaku to.

<sup>172</sup> Kadi muntu mulelela, muteeka kudi Nzambi, ngiikadilu mulelela awu, mutoloku mulelela awu, musuuka wa Nzambi úvwà munda mwa Nzambi kumpala kwa difuka dya dyulu ne buloba awu; vulukaayi ne, nwênù badi cya bushuwa ne Nyuma wa Nzambi munda mwenu diloolo edi abu, nuvwa mwab’ewu mu Kilisto bwalu Yèyè uvwa kaabujima kaa Dìyì. Úvwa kaabujima kaa Bunzambi mu ciikadilu cya mubidi. Nzambi uvwa munda mwa Kilisto, upungisha baa pa buloba ne Yèyè mwine. Nudi nwitabuuja aci anyi? Tangilaayi, Yèyè uvwa munda mwa Kilisto. Nenku piikalabi ne wèwè uvwa munda mwa Nzambi, ngiikadilu kampana, dîyì kampana, cyambiibwa kacya ku cibangidilu, nanku wákenda Nende pa buloba apa, wákayiiikila Nende pa buloba, wákakènga Nende pa buloba, wákafwà Nende ku Kalvariyo, ne wákabiika Nende ku lufu; ne mpindyewu udi musòmbe mu myaba ya mu Dyulu mu Kilisto Yesu, ubwela Nende mu bwobumwe (Dìyì) padiDi didiisha musuuka webe apu, ne: “Muntu neikale ne mwoyi ku Dìyì dyònsò didi dipatuka.”

<sup>173</sup> Kî ndiyì dya ba-Méthodistes, dîyì dya ba-Baptistes to; vulukaayi ne, pavwaku kushaala kantu mu mulambu, kavwa ne cya kwoshiibwa kumpala kwa dinda, bwalu maalaba ncikwabo cikondo cya ekeleziya. Ncya bushuwa anyi? Ekesoode, nCilelela. Cimfwanyi, cifwanyikijilu cya Mulambu awu.

<sup>174</sup> Ciibi. Wakamba ne: “Nèngènzè mwaba umwepele. Kanwikadi. . . Kanwikadi nuNkuukwila mu ciibi kana cyònsò cìNdì munupeeshe to; kadi kudi Ciibi cimwepele, ne mu cyòcì Ciibi aci ki múNgàatèèkà Dìnà Dyanyi.” Nenku mu mwaba udi Mukalenge uteeka Dìnà Dyende awu, ki mwaba wikala Mukalenge mwa kwakidila mulambu webe. Twètù tukaadi benze biibi bya mishindu yònsò naka, kadi Nzambi mmwenze Ciibi. Nzambi mmwenze Ciibi, ne ciine Ciibi aci civwa. . . Yone Munsantu ku nshapita wa 10, Yesu wakamba ne: “Mèmè ki ciine Ciibi aci.”

<sup>175</sup> Nzambi mmuteeke Dìnà Dyende mu Yesu. Nudi nwitabuuja aci anyi? Yèyè nguvwa Mwànà wa Nzambi. Mwànà wa balume yònsò ewu udi ulwa mu dìnà dya tatwèndè. Yèyè wakamba ne: “Ndi mulwe mu Dìnà dya Taatù Wanyi, nwênù kanwena nuNgaakidila to.” Mèmè ndi mulwe mu dìnà dya tatwányì, wèwè udi mulwe mu dìnà dya tatwèbè. Yesu wakalwa mu Dìnà dya Tatw’Èndè, pa nanku Dìnà dya Tatw’Èndè’s n’Yesu; mmwòmò menemene’s, bwalu Yèyè wakalwa mu Dìnà dya Tatw’Èndè.

<sup>176</sup> “Kadi nwênù kanwena nuNgaakidila to. Mukwabo yèyè nealwe, bwa awu kaayi nenumwakidile.” Nwênù nenwangate mangumba enu ne nenutungunuke naawu. Ndaayi nwênù anu



kumpala, Bible mmwambe ne: “Bôbò baakajuudiibwa mbwa kuujabo kaaba aka. Bampofu, butaka, kadi kabayi bacimanye to.” Ekeleeziya, ntendeleelu, kaa, baa difwana dya Nzambi baa dikema, bya mwomumwe anu muvwa Kaayina amu; wenza mulambu, wenza kantu ne kantu anu kaa mwomumwe ne kààkenzà Abele. Kadi ku dibuulula nkwakabuuludiibwabi kudiye ne mushingà awu uvwa ncikampanda, kaciya bimuma bya mu mpàta ne cintu kampanda cyùdi wenza ne cyanza cyebe to.

<sup>177</sup> Mwena kwitabuuja udi mwa kumona Dîyi divwijibwe mubidi; bakwabo bôbò kabeena mwa kucimonaku to.

<sup>178</sup> Beena Izaleela bônsò abu, paanyima paa bamane kumona Môsà mwenze ciine aci ne mubafikishe ku nsangilu munene awu, kuvwaye ne cya kwenzekela aku, muntu ne muntu wa kudibo wakambaye ne: “Netuye ne Baalama, bwalu tudi twela meeji ne Docteur Baalama mmubinge. Yèyè mmutambe kwikala ne meeji matwe, mmutambe kulonga kalaasa, ne bikwabo byônsò, pa nanku butudi twètù naabu mbwa kucyangata’s.”

<sup>179</sup> Kadi Nzambi kaakabafwilaku luse to, Wakabutwila anu mwaba awu mu cipeela amu. Ne Yesu Yèyè mwine, wakamba ne: “Kabaadyakulwaku to, kakwena nansha umwe wa kudibo udi musungidiibwe to.” Yesu wakamba . . .

<sup>180</sup> Bavwa bôbò bamba ne: “Baataatù beetu baakadya manà mu cipeela munda mwa bidimu makumi anaayi.”

<sup>181</sup> Yèyè kwamba ne: “Bônsò muntu ne muntu mbafwe, batapuluke Cyendelele ne Nzambi. Bônsò muntu ne muntu mbafwe.” Cya bushuwa’s! Bwalu baakateeleja ntupakanyi. Pavwa Môsà, mushindika kudi Nzambi, ne mulombodi bwa kubaleeja njila wa ku buloba bulaya, ne bôbò bakaavwa baye ne ntanta bule kampanda anu bilenga, kadi pashiishe kabaciya baswe kutungunuka nende to.

<sup>182</sup> Mpindyewu, beena kwitabuuja bôbò badi mwa kuCimona, kadi beena bupidya kabeena mwa kumonaku Cyôci aci cishindika to.

<sup>183</sup> Tangilaayi numone muvwa Kaayifa ne difwana dya Nzambi. Tangilaayi numone baakwidi bônsò abu muvwapo ne difwana dya Nzambi. Kadi Yesu wakakudimuka, kwamba ne: “Nwênù nudi baa tatwênù dyabulu, ne byenzi byende ki binwenza.”

<sup>184</sup> Kadi kuvwa ndambu wa beena kwitabuuja basômbe kaaba aku. Nudiku nwela meeji ne bayiidi abu bavwa bafwanyine kwikala bumvwe paakamba Yesu ne: “Mémè ne Taatù Wanyi tudi umwe” apu anyi? Bôbò kabavwa bafwanyine kwikala baCyûmvwije to. PaakambaYe ne: “Nwênù kanuyi badye mubidi wa Mwânà wa muntu, kanuyi banwe Mashi Ende to, kanwena ne Mwoyi” apu, bavwaku mwa kuCyumvwija anyi? To. Kadi bôbò baakaCiitabuuja, bwalu baakamona Nzambi mushindikiibwe ne muvwijibwe mubidi.

185 Yesu wakamba ne: “Mémè Nciyi ngenza byenzedi bya Taatù Wanyi to, pa díbà adi kanuNgiitabuuji to. Kadi piikalabi ne Ndi ngenza byenzedi bya Taatù Wanyi, Dìyì dyàkambiibwà ne Mémè nèngènzè adi, pa díbà adi nwènù. . . Panwikala kanuyi mwa kungiiitabuuja Mémè to, itabuujaayi byenzedi bìNdi ngenza abi, bwa nwamona mwa kusungidiibwa.” Nwamonu anyi? Yesu wakamba ne: “Mikooko Yanyi mmimanye Dìyì Dyanyi. Mmimanye Dìyì Dyanyi, yidi yiDimona padiDi dishindikiibwe bwa cikondo aci.”

186 “Ee, Kaayifa’s uvwa pende anu mumanye Dìyì!” Kadi kadiyi Dìyì dya cikondo *aci* to. Yèyè uvwa ne dìyì dya civwa Bafaalesa bamupaye munda, kadi kadiyi Dìyì dishindika dya díbà adi to.

187 “Yòyì mmimanye Dìyì Dyanyi, mmimanye cimanyinu Cyanyi, mmimanye bwalu Bwanyi bwa kukema.” Mmunyi mpindyewu, bwa . . .

188 Kaa, twǎnji twalukilaayibi ku cyena-bwalu cyetu tǔng, bwalu yàbǔngi ya ku Mifundu eyi neyiikale anu mwa kutupicila twètù katuyi benze nanku, bwalu bidi bikengela bwa mémè kujikija mu ndambu wa tusunsa tùdì tùlondà etu nansha bishi, bwalu netwikale díbà dikumi jaaaja mu ndambu wa tusunsa emu. Mémè ndi muMunange.

189 Balunda baanyi, nwènù badi bapweke nwenda nulonda kajila kaka ne beele mulambu awu katanci kakese aka abu; nwènù badi bapeeshe bânà baanyi byakudya, badi babavwadike bilàmbà abu; nwènù bàkaadi beelele mfranga yenu (yinudi bapete ne lutatu ayi) mu dilongo dya disangishila milambu, nudi bamnye kuyaayayi anyi? Yidi yinkwacisha bwa kuya dyamwamwa dya mbù kudi bampangaanu batu kacya kabayiku bumvwe kantu nansha kamwe pa bidi bitangila Nzambi abu. Ki cìndi ngenza naayi ncyôci aci, dyeya dyônsò, Nzambi ngudi Mulumbulwishi wanyi. Mbôbò aba bamwe baa ku baanyi. . . muntu nyèyè ewu musòmbe kaaba aka mpindyewu mene utu mu—mu cibucilu cya ekeleeziya wanyi. Ntu mpeta ndola lukama ku lumingu, ne miine ayi ki yônsò; yidi yishàalakù yiyaaya ku dyanza dya masangisha a dyamwamwa dya mbù kudibo bôbò kabayi mwa kufika to.

190 Ekeleeziya kî mmiswe kungaakidila mémè to. Kî mminswe to. To. Aci’s ncyà bushuwa! Patudi twakulangana apa badi bǎntwà mènà ne: “Yèyè udi . . .” Badi bamba ne: “Yèyè mmwena ‘Yesu Nkaayende,’ anyi udi cintu kampanda cya mushindu awu, anyi mwabuludyanganyi kampanda, mukoleshi wa maalu, ne byônsò bya mushindu awu abi, Izabela ka—kampanda.” Ne mémè—mémè’s abi kabyena binkemesha to, s’baakabiikila Mukalenge wanyi ne, “Izabela,” ne baakaMutwa mènà ne. . . kî ny’Izabela to, kadi “Beelezebula.” BaakaMutwa mènà ônsò a mabi awu. “Piikalabo babiikile Mfumumu mwena nzubu

ne, ‘Beezezebula,’ ambaayaaku mwatambabo kubiikila bayiidi Bende?” Pa nanku aci kaciyena ne cidici cishintulula to.

<sup>191</sup> Nansha nwênù biine abu, ku dikwacisha dya Nzambi, nudiku peenu nwela meeji ne mêmè ewu ndi mufwanyine kwimana mwab’ewu, mwena lubombo munene, kadi kunwambila cintu kampanda...? Anyi, ncyênàku mufwanyine kuditeeka mu njila wa cintu aci bu mêmè mwa kwela meeji ne ncyà kudi Nzambi anyi?

<sup>192</sup> Kadi mêmè mununange ne mumanye cidi Bulelela... Kacya nukaadiku bangumvwe mwambe cintu kampanda mu Dìnà dya Mukalenge cidi kaciyi cyenzeke anyi? To. Ndi nkonka muntu kana yònsò. Bintu binunu ne binunu bikaadi byambiibwe, byònsò mbyenzeke. Nudiku bavuluke musangu wàkabiikidiishàbo Samwele awu, ngeela meeji ne uvwa ngwòwù awu, nenku kwambaye...? Izaleela uvwa muswe kudivwija muvwa matunga makwabo ònsò awu. Ki kunuyaaya kwobeka nwênù beena Mpenta aba. Nudi baswe kwenza maalu mudi bantu bakwabo bònsò benza. Nwênù kanwena bantu baa mushindu awu to. Disakaayi kule ne cyòcì aci. Ekeleeziya ya minene ne bintu bya binene bilenga, Èyì mwaneetu, kwenjiku nanku to. Tudi tuyiisha ne dilwa dya Mukalenge dikaadi pabwìpì, tuyaayi mu madimi a bwambi mwamwa tukambile bampangaanu. Nwamonu’s, enzaku cintu kampanda pa bwalu abu.

<sup>193</sup> Kadi, nudi numona’s, Samwele kwambaye ne: “Kacyakacya musangu nansha umwe nkaadiku mêmè ewu munwàngàte mfranga yenu bwa mêmè kudya anyi?”

<sup>194</sup> Bòbò ne: “To, Samwele, kacya kutuku mwenze aci to.”

<sup>195</sup> Yèyè ne: “Kacyakacya nkaadiku munwàmbile nî ncinyi nî ncinyi mu Dìnà dya Mukalenge cidi kaciyi cyenzeke anyi?”

<sup>196</sup> “Kaa, ncyà bushuwa, Samwele. Tudi twitabuuja ne wèwè udi muprofeta mutuma kudi Nzambi. Eyowa’s, mukalenge. Byònsò byùkaadi mwambambe bitu anu byenzeke, Samwele. Kadi nansha bishi cyòcì aci ncutidi takeba.” S’nudi bamone cyàkenzekà aci. Èyì mwaneetu, Mufundu awu’s mmutungunuke anu ne kwenzeka cyakabidi Wòwò mwine wmatu kumpala watwa paanyima mu Mifundu, bwalu mmushindu wa Nzambi wa dicyenza, nudi numona’s. Nudi numona’s, nudi nukapicila mu bikondo bya mushindu ewu abi.

<sup>197</sup> Tuyaayi lukasalukasa ku cyena-bwalu cyetu aci. Mpindyewu, mêmè mu cikondo cyònsò cìndì mwangate eci, nyewu nciyi anu mwanji kufika nansha ku dikalenga dya cyena-bwalu cyanyi to.

<sup>198</sup> Cidi pa mwoyi wanyi’s! Ndi mununange! Kanubutuku ne baa pa buloba to! Pawikala wa pa buloba, neubutuke ne baa pa buloba. Pawikala wa Nzambi, neuye Nende mu dibiika dya ku lufu. Pa nanku shintulula ngiikadilu webe diloolo edi uumuke

ku dinanga dya maalu a pa buloba ne bintu bya pa buloba, ne twitabaayi yônsò eyi ne bikwabo, nenku utangile buludi ku Kalvariyo ku Mulambu webe; katwilangane Nende kwôkò aku pa bishimikidi abi, bwalu ki mwaba umwepele wikala Yeku mwa kutwilangana neebe ngwôwò awu. Yêyè . . .

<sup>199</sup> Ba-Méthodistes badi bamba ne: “Cidi mu wetu ekeleeziya”; ba-Baptistes bamba, ne beena Mpenta, ne *bikampanda*, ne ba-Presbytériens, ne *bikansanga*.

<sup>200</sup> Kadi Yêyè mmwambe ne: “Nêntwilanganè naabo mu mwaba umwepele, Mwaba wûndi Mêmè nteeka Dîna Dyanyi awu.” Mbwena kwamba ne mu Yesu Kilisto. Ki mudi Nzambi mateeke Dîna Dyende mmwômò amu. Ki Mwaba umwepele mutewilanganaYe neebe ngwôwò awu; udi n’Kilisto, udi n’Dîyi, umwèumwè awu makeelela . . . Mmuye wenda ukola kuumukila ku makàsà, ku bibelu. Kadi mpindyewu ukaadi mu mutu, mwikale pabwîpî ne kuya; umwenesha Mukaji musela mu kaabujima kaa cipidi, umwèumwè mu mushindu wa Mubaki.

<sup>201</sup> Mpindyewu tuyaayaaku ku cyena-bwalu cyetu, ne lukasa lwônsò, bwa tusunsa tutwe ku dikumi, ne pashiishe netujikije. Mpindyewu cyena-bwalu cyetu, tudi bônsò baswe kucitangila. Cikaavwaku cyenzeke kabidi, bu mudi cyena-bwalu cyetu cileeja, bu mukaadici cyenzekezeke pa ciibidilu.

<sup>202</sup> Nzambi uvwa mutume muprofeta Wende bu muvwaYe . . . Dîyi divwa dilaye ku Maalaki 3 ne: “Nêntumè musanjeela kumpala Kwanyi,” bwa kudyanjidila dilwa Dyende.

<sup>203</sup> Mpindyewu nwênù baswe kushindika aci, bwa kucijaadika, Maataayi, nshapita wa 11, udi ushindika cintu cimwecimwe aci. Paakalwa bayiidi baa Yone ne kumonabo Yesu, baakamba ne: “Yone udi mu buloko.” Bôbò ne: “Tudi balwe bwa kuKukonka ní nyêyè . . .”

<sup>204</sup> Dîsù dya mukanku dya Yone dikaavwa dijibale. Ne yêyè ukaavwa mu buloko, ûkaavwa pabwîpî ne kufwa; yêyè kwamba ne: “Nda kaMukonkaayi.”

<sup>205</sup> Nwamonu’s, Yone wakamba ne: “Kaa, cipeepudi Cyende cidi mu cyanza Cyende, Yêyè neakezule mu cishiipwidi Cyende cyônsò nkôông.” Yêyè uvwa mwele meeji ne Bukalenge bwa bidimu cinunu buvwa bumba bubanga anu mwaba awu, ûvwa mwele meeji ne lutete lukaavwa lubobe. Kadi bivwa bikengela kufwalu ne kubwelalu mu cikolakola, kubànda cyakabidi bwa kwenzalu Mukaji musela mulelela. Pa nanku kwambaye ne: “Yêyè neakungwije blé Wende mu diyeeba, ne Neôshè, ne kapyà.” Tangilaayi numone awu—awu mudyanjididi wa Kilisto mu cikondo aci, cyakambaye ne necyenzeke aci. “Lutete . . .”

<sup>206</sup> Ne ndi ntekemena ne kanwena balaale tulu to. Lutete alu ludi apa! Nelukungwijibwe mu diyeeba. Luvwa m’Mukaji musela awu, citupa cyalu aci. Kadi cyakambaYe ne necyenzekele cikolakola ncinganyi? Necyoshiibwe ne kapyà kadibo kabayiku

mwa kujima to. Kebanganaayi ne lupandu mpindyewu panucidi ne mushindu apa. Ikala lutete, kwikadi cicolakola to. Wamonu anyi? Bwela mu Mwoyi, kî mmwenekelu mufwe wa kale awu to; bwela mu Mwoyi wa Kilisto, Dîyi dimweneshiibwe, didi...dimweneshiibwe ne dishindika ne didi nanku. Eci ki—eci ki cikondo cya dikungwija, katumba kaa dinowa naaku kalwalwa. Mbîmpè ubwele mu lutete, bwalu cizubu necishiyiibwe paanyima.

<sup>207</sup> Mpindyewu, tudi tusangana ne cyakenzeka, Yesu...Bwa kujikija mèyi àmwva nteela kaaba aka awu, Maataayi 11. Yèyè u-... kaakapeesha Yone... Yèyè kwamba ne: “Mpindyewu, indilaayi kakese, Nêmpeeshè Yone mukanda wa mushindu wa kuditwalaye bilenga wa ne, *Mwena Kwitabuuja Mu Bùlokò.*” Bwàlà! Yèyè wakamba ne: “Imanaayi anu mwab’awu kadi numone cidì cyènzekà. Nwalukile nukaleeje Yone cidì cyènzekà eci: balema badi bendela kuulu, mpofo yidi yimona, bafwe badi babiishiibwa, ne Evanjeeliyo udi uyiishiibwa kudi bapele.” Anu nemene cyakamba muprofeta ne necyenzeke aci. “Nenku baa disanka nnwènú bândi Mémè nciyi cilendwishì to.”

<sup>208</sup> Nenku paakaya bayiidi bende dya luseke lukwabo lwa kakuna, ki Yèyè kukudimuka, kwamba ne: “Cinuvwa baye kamona ncinyi panuvwa baye kamona Yone apu? Nuvwa baye kamona muntu muvwale bivwalu binefuke, ne bikwabo, nkooci wa nkoolo, ne byònsò ebi, binudi bamanye abi anyi?” Yèyè ne: “Abu batu mu nzubu ya makalenge ya bamfumu, batu batwa bânà baa mu maboko mishiku ne bajiika bafwe, kayi mumanye mwa kukwata mwele wa mvita wa nseke ibidi to.” Nwamonu anyi? Yèyè ne: “Cinuvwa baye kamona ncinyi? Di—dilenge didibo bàkùpa eku ne eku kudi lupeepele kana lwònsò anyi?” (“Lwâ kuneeku, Yone, mèmè nênkupèèshè mfranga mipite apu bu wèwè mwa kulwa kuneeku.” “Ee, Nzambi abeneshiibwe, mèmè ncicyena kabidi Méthodiste to, nêngìikalè mwena Mpenta, nêngìikalè Presbytérien, nêngìikalè *cikampanda, cikansanga, piikalaku* anu mfranga mipite apu.”) Yèyè ne: “Kanuvwaku baye kamona dilenge didibo bàkùpa eku ne eku kudi lupeepele to.” Yèyè ne: “Cinuvwa baye kamona kuntwaku ncinyi, muprofeta anyi?” Yèyè ne: “Eyowa, kabidi mutambe ne muprofeta.”

<sup>209</sup> Yone ucivwa ufuminaku ku dipa Yesu buneeme bwa bushaadile bwa kacyakacya. Manyaayi ne bivwa bikengela kulwabi mushindu awu. ÙMwela alu lukonko’s paanyima paa yèyè mumane kuMuleeja kudi bantu ne mumone Cimanyinu aci kumutu Kwende, mwambe ne: “Ewu *ki* Maasiya awu,” pashiishe kulwa kadi kwela lukonko ne: “Wèwè ki Yèyè awu anyi, anyi bikenglela twindile mukwabo?”

<sup>210</sup> Kadi, tangilaayi, bu muvwa Yesu mumanye ciine aci, Yèyè kukudimuka e kumupa buneeme, kwamba ne: “Cinuvwa baye kamona ncinyi, dilenge didibo bàkùpa eku ne eku kudi lupeepele anyi?” Yèyè ne: “Kacya kakutuku kwanji kwikala muntu nansha

umwe mulela kudi mukaji mwikale munene mudi Yone to, too ne ku leelu ewu.” Ncya bushuwa’s! Kaalumbandi kaayi kaa kwela muntu awu’s we!

<sup>211</sup> Kadi, nudi numona’s, s’ki bwalu mbwôbù abu, ciprofeta civwa cyûle anu kumpala kwabo mene, ne mudyanjididi uvwa ne cya kulwa awu, anu cyakamba Maalaki menemene. Mpindyewu, awu m’Maalaki 3, ki m’Maalaki 4 to.

<sup>212</sup> Yone Mubatiiji uvwa Maalaki 3, ki cyakamba Yesu. PaakaMwelabo lukonko, bamba ne: “Bwa cinyi bafundi badi bamba ne...”

Yèyè wakamba ne: “Yèyè ukaadi mumane kulwa. Mbenze cyakambabo.”

<sup>213</sup> Kadi, vulukaayi ne, Maalaki 4, dyakamwe paanyima paa muprofeta wa Maalaki 4, dilwa diinâyi dya Yone Mubatiiji mu, anyi, dya...dya Eliya, dilwa diitânù nediikale dya ba mu Bwakabuulwibwa babidi, bantemu abu, paalwaye bwa bashaadile baa beena Yuda. Kadi Nzambi mmukwate mudimu ne Nyuma umwèumwè awu misangu itaanu: ngâsà, Y-e-s-u, yônsò ayi yivwa n’Yesu dîbà dyônsò; d-i-i-t-a-b-u-u-j-a, n-g-â-s-à, ne bikwabo. Nudi numona anyi? Nomba ewu itaanu nnomba wa ngâsà ne Yèyè mmukwate nende mudimu. Kaakukwata mudimu anu ne isatu to, kaakukwata mudimu anu ne ibidi, isatu, inaayi to. Misangu itanu nyidiYe ukwata Nende mudimu.

<sup>214</sup> Mpindyewu, monaayi lukasalukasa bwa mpindyewu, patukaadi tujikija apa. Yèyè wakamba ne: “Yèyè ewu ngwâkambabò bwa bwalu bwende ne: ‘Ndi ntuma musanjeela Wanyi kumpala Kwanyi.’”

<sup>215</sup> Kadi mu Maalaki 4, dyakamwe paanyima paa *awu* muprofeta mumane kwamba ciprofeta, buloba bujima budi ne cya kwoshiibwa, ne baakane bendela pa butu bwa beena lwonji. Nwamonu anyi? Mmwômò menemene! Nwamonu’s, ki ciprofeta cya Maalaki 4 ncyôci aci.

<sup>216</sup> Kabidi monaayi mu Luuka 17, mwaba udiYe mwambe ne: “Mu matuku a ndekeelu, nebilwe cyakabidi bu Sodoma ne Gomola.” Tukaadi bacipete anyi? Tukaadi bapete cyakabidi Sodoma ne Gomola anyi? Matunga ônsò mu kaabujima, tangilaayi cintu aci. Tangilaayi cidiye ufuma ku dyamba bwa Angleterre, cintu cyônsò mu kaabujima’s ncinyanguke. Nansha byakudya biine mbinyanguke. Kabidi tangilaayi kuneeku cidi maalu a mamanya...Nudi numona mu cikandakanda cya *Reader’s Digest*, ngeela meeji civwa nngondo washaadi ewu, mbambe ne: “Bânà batekete baa balume ne baa bakaji bakaadi bapicila mu cikondo cya bukulumpe pankaci paa bidimu makumi abidi ne makumi abidi ne bitaanu.” Ntu ntwilangana naabo mu disangisha, bânà baa bakaji batekete bakaadi mu cikondo cya kabaciyi baya ku mashi to, baa bidimu makumi abidi, makumi abidi ne bibidi, bakaadi mu cikondo cya kabaciyi

baya ku mashi to. Mbifumine ku cinyi biine abi? Dinyanguka, disopakaja dya mamiinu. Cyôci aci menemene ncidi cifile dinyanguka, cintu cyônsò mu kaabujima ncinyange mubidi. Twêtù katucyena cingà cintu to anu mushiki wa—wa . . . byenze mudi mucu wa ku mamiinu masopakaja's.

217 Angata mucu wa ku mamiinu masopakaja uwuteeka pambelu pààpa, kîshì kônsò nekanyeemene anu kudiwu aku. Kadi mucu mushuwashuwale, wa ku cibangidilu awu, kîshì nekawunyeeme, kakeena mwa kutwala bwa kushaalapu to. Nenku ki lutatu ludi naalu ekeleeziya ndwòlù alu, twêtù mbadi bamuvwiye wa mamiinu masopakaja.

218 Ki lutatu ludi naalu kabalu kaa kale kaa Pearry Green ndwòlù alu, nkajuuke e kwela nsongaalume awu panshi dituku adi, kôkò's kadi anu kabalu keetu kaa kale kaa lubilu aka. Nwamonu anyi? Cintu cimwepele cidiku kôkò aku, kadi . . . Kadi menemene anu mudi kampundu amu, kadi—kadi . . . kampundu kakatu kamanye ne papa waku anyi maman waku nganyi to, kakeena ne cidiku kamanye to; kôkò kadi cyabibidi cimwe kampundu ne cyabibidi cimwe kabalu, ne cyabibidi *eci* ne mpunda; kî nkamanye ne kôkò kiine nkanganyi to . . . Kwênàku mufwanyine . . . Nkafwanyine kwindila mwoyi waku mujima anu bwa kufika ku dikutwa dya bikono. Ncya bushuwa's! Udi mwa kukabiikila, wamba ne: "Lwâku apa, kalumyana. Lwâku apa, kalumyana." Nekashaale anu kacya kajuula maci aku awu muulu, ne: "Howu! Howu! Howu!" Nwamonu anyi?

219 Byenze mudi bamwe baa ku aba badi bamba ne: "Matuku a bishima akaadi mamane kupita, Howu! Howu! Howu!" baa cipanda-nseke aba, paabu ne mbidimba bya ekeleeziya ne mbeena Kilisto. Ncyêna ngamba nanku bu bilele ngeela to, kadi m'Bulelela. Kadi, mwaneetu, wa mushuwashuwale wa dimiinu dya cya bushuwa, mmumanye ne tatwëndè uvwa nkampanda, mamwëndè uvwa nkansanga, kakwëndè mulume uvwa nkankenga, kakwëndè mukaji uvwa nkansanga, wêwê udi mwa kumulongeshaku cintu kampanda, yêyê ngwa kalolo.

220 Ne mwena Kilisto mushuwashuwale udi mulela kudi Nyuma Mwîmpè ne mùle tente ne bukole bwa Nzambi ne Dîyì, mmumanye ne tatwëndè nkampanda, ne mamwëndè nkansanga, kakwëndè mulume uvwa nkankenga, kakwëndè mukaji uvwa nkansanga, mmumanye byônsò pa bidi bitangila Cyôci aci. Udi mwa kumulongeshaku cintu kampanda.

221 Kadi wa cipanda-nseke yêyê, bôbò abu ki badi balwe mu maekeleeziya. Baa mamiinu masopakaja pankaci paa maalu a pa buloba ne malongolodi a ntendeleelu, nenku biikale beelamu ndambu wa Dîyì *apa*, ndambu wa Dîyì *pààpa*, mukumbane anu bwa kuseeswishangana. S'ncya bushuwa. Paudi umona Dîyì dya Nzambi dilelela diikale dimweneshiibwe mwakenzabo kudi

Kaayifa ne bakwabo amu, badi baDyepuka, kî mbamanye to. Baa mamiinu masopakaja!

<sup>222</sup> Mpindyewu tudi tusangana ne, mu mwine mukenji ewu, Yeshaayi 40.3 kabidi wakashindika Yone. Wakamba ne: “Diyi dya kampanda, muprofeta, udi wela lubila mu cipeela ne: ‘Longololaayi njila wa Mukalenge, lulamijaayi kajila Kende.’” Ekeleeziya kavwa umwitabuuja to, bwalu kavwa wa mu cisumbu cyabo bôbô to. Muprofeta awu uvwa mukolele mu cipeela, ulwa kayi mumanye muntu nansha umwepele to. Yêyê uvwa pambidi pende ne Nyuma umwèumwè uvwa nende Eliya awu: ùvwa muntu wa mu cipeela, ùvwa mukine bânà bakaji baa nsòmbelu wa masandi.

<sup>223</sup> Vulukaayi mushindu uvwa Eliya. . . Cyakenza ne bamukose mutu ncinyi? S’ùvwa ny’Izabela awu. Izabela nguvwa mukebi wa lufu lwende. Kumunyeemeshaci e kuyaye mu cipeela.

<sup>224</sup> Yone Mubatiji, mukwabo munangi wa cipeela, cilembi, muntu wa mwitu. Tangilaayi wendè. . . Ùvwa mufwànyine. . . kavwaku yêyê ne kalaasa kalonga to. Tangilaayi cyende—cyende cyena-bwalu, kavwa bu mwena teoloji to. Wakamba ne: “Nwênù lukongo lwa nyoka ya ntooka!” Cintu cididitambe kwikala cya bukooya cyùdi mwa kusangana mu cipeela, maalu a mwishimwinshi, civwa—civwa nnyoka. Nenku kubiikilaye baakwidi abu ne: “Nwênù lukongo lwa nyoka ya ntooka! Nganyi wanudimwiji bwa kunyeema ciiji cikole cilwalwà? Kanubangi kwamba ne: ‘Twêtù tudi beena *cikampanda*, ne tudi ne *cikansanga* anyi *cikankenga*’ to, bwalu nya’ nzwambila, Nzambi mmukumbane ku mabwe aa,” cipeela’s. Kabidi ne: “Cisuuuyi” (civwaye ukwata naaci mudimu aci’s) “nciteekiibwe ku muji wa mucu; ne mucu wònsò udi kawuyi ukwama mamuma mîmpè awu, udi uupudiibwa ne wediibwa mu kapyà.” Amen.

<sup>225</sup> Yêyê uvwa muyiishi wa mu bufuki. Muntu munene wa Nzambi, wâkashààla ne mwoyi citupa cîpi, kadi bulelela yêyê wakalakusha kapyà pa buloba bujima. Wakashiya cikuma pa lukongo alu munda mwa ngondo isambombo ya mudimu wende wa bwambi ayi. Nzambi wakamukolesha munda mwa bidimu makumi asatu, bwa kupeta kudiye ngondo isambombo ayi. Kadi Nzambi udi wenza mu mushindu Wende Yêyê mwine, Yêyê ngudi mumanye ne dinowa Dyende didi cinyi.

<sup>226</sup> Nenku tudi tusangana mpindyewu ne cyôci eci menemene ki civwa cyenzeke. Kabaakamwitabuuja to, bwalu kavwa wa ku bôbô to. Kabaakamwitabuuja to. Baakenza bu pa ciibidilu ne, kabaakaCimona to. Kabaakiitabuuja Dîyi dya Nzambi dya Maalaki 3 to, patupu nunku mbamone bitooke tòò, ku dileeta ne ku dileeta ne, yêyê ewu nguvwa mudyanjididi awu. Kabavwa bapete muprofeta to kukaavwa bidimu nkama inayyi, kadi umwe nyêyê ewu ujuuka mu cyalu dyakamwe. Nwamonu anyi? Kadi bantu, beena kwitabuuja, baakiitabuuja ne ki civwaye.



Nwamonu's, bôbò kabaakaCiitabuujaku to. Kabaakiitabuujaku to, bwalu paakamonabo dileeta dishindikiibwa anu menemene, civwaYe mwambe ne Yêyê neénzè aci, ne bikwabo byônsò, ne baCimone cishindikiibwe bitooke tòò paakalwa Dîyì kubwela buludi mu mâyi kudi muprofeta. Ki bôbò bavwa biimane baba.

227 Kudi bààbûngì batu bakokangana pa Mufundu awu pa bidi bitangila Yone. Nwamonu's, Yone wakamba ne: "Mémè ngudi ukengela bwa kubatiijibwa kùdì Wèwè, kadi mùkaadi Wèwè ulwa kùndi mbwa cinyi?"

228 Yesu kwambaye ne: "Twala bwa biikale nanku, bwalu mushindu ewu...kadi mushindu ewu mbujitu butwòmekela twètù, bidi ne mushinga kutudi (mbitwòmekela) bwa twètù kukumbaja. Eyo, Yone, wèwè bu muprofeta, s'udi mumanye ne bidi bikengela bwa mulambu usukudiibwe kumpala kwa wôwò kufidiibwa. Nenku Mémè ki mwine Mulambu awu, ne wèwè udi muprofeta ne udi mumanye aci." Ki kuMutwalaye ne kuMubatiizaye. Nwamonu anyi? Ne yèyè uvwa mumanye ne ki muvwabi.

229 Tangilaayi, baakamuseka, baakamubiikila ne "mukoleshi wa maalu wa cisuku, mwedi wa mbila, kayi mulonge kalaasa," bu mutubi amu, muprofeta uvwa udyànjidila dilwa dya kumpala dya Yesu awu.

230 Ncyèna ngamba ne badi...bôbò kabeena ne ditentula dimwedimwe adi leelu ewu dya—dya cishuwashuwale to. Badi naadi, kakuyi mpatà to. Kadi, vulukaayi ne, mwaba wùdì umona ndola wa mafi kudi ne cya kwikala ndola wa cya bushuwa kudibo benzele yèyè awu. Mwaba wùdì umona muntu utentula diikala mwena Kilisto, kudi ne cya kwikala mwena Kilisto wa cya bushuwa mwaba kampana; bwalu, bu kabiyi nanku to, *awu* uvwa mwa kwikala wa cibangidilu. Bidi bikengela ukafike ku cya cibangidilu aci. Kadi anji kenketa cya ku kumpala aci, kadi umone ní cya ku cibangidilu aci cidì cikumbanangana anu menemene ne mulayi. Piikalaci cikumbanangana ne mulayi, pa dîbà adi ùCìtàbùùjè: mulayi wa cikondo aci.

231 Pa dîbà adi ciprofeta cya Yone cyakashindikiibwa mu bulongame bwa Nzambi. Dîyì dyakalwa kudi muprofeta ne dyakamushindika bulelela bu mwine muntu awu.

232 Kabidi Yesu wakalwa mu...bishilangane ne dyumvwa dyabo bôbò dya ciine ciprofeta aci. Kabavwa bôbò baCyumvwa mushindu awu to. (Mpindyewu, tukaadi tupweka batangile kundekeelu mpindyewu.) Kadi bilondeshile Dîyì dya muprofeta, Dyôdì dyàkuula ku dileeta ne ku dileeta. Ciprofeta ncyùle; kadi mushindu uvwabo bôbò badyelela meeji ne ki uvwaCi mwa kwikala, kaCivwa mushindu awu to. Mpindyewu, mmushindu kaayi uvwabo mwa kwikala bumvwe ne bamanye civwà cya bushuwa ne civwà cya mashimi? Bwa kumona ní civwa cishindika kudi Nzambi, ní n'Nzambi uvwa uumvwija

civwaYe mwambe. Kukaavwa kujuuke ba-Yesu baa mashimi, ne balombole muntu, musumbà wa...nkama inaayi, baye naabo mu cipeela ne bikwabo; kadi yêyè kaakajaadikaku bwa kudijaalamija yêyè mwine mu Diyì to, nwamonu's, muvwa Yêyè mwambe amu.

<sup>233</sup> Yesu, paakalwaYe, Ûvwa ne cya kwikala Muprofeta. Aci ncyà bushuwa! Ne leelu ewu, kumpala kwa Yesu kulwaye cyakabidi, bidi bikengela bwa dimweneshiibwa mu kaabujima dya Mupersona wa Yesu Kilisto dimweneshiibwe mu mubidi. Elaayibi meeji ku bwalu abu! Yesu wakamba ne: “Anu mwakadibi mu matuku a Sodoma, ki mwikalabi kabidi ku dilwa dya Mwànà wa muntu, piikala Mwànà wa muntu munkaci mwa kubuuludiibwa.” *Mubuuludiibwe* ncinyi? “Muvunguludiibwe, mumanyishiibwe.” Munsokontu ukaavwa mumane kwediibwa patooke, mubuuludiibwe. Mu dituku diikala Mwànà wa muntu mwa kubuuludiibwa, buloba nebwikale mu ngiikadilu wa Sodoma. S'tukaadi nende, kî mmwômò anyi? Eyowa's! Mbanganyi badi biitabuujá nanku? Bukaadi mu ngiikadilu wa Sodoma. Ne aci ncyà bushuwa menemene! Tangilaayi mwaba ukaadibu busanganyiibwa, patudi twakulangana apa.

<sup>234</sup> Vulukaayi ne, kutu misangu yônsò anu bisumbu bisatu bya bantu mu musumbà kana wônsò wa bantu unudi nukungwija awu, badi, beena kwitabuujá baa budingibudingi, beena bupidya, ne beena kwitabuujá. Tudi naabo mu cisumbu ne cisumbu cyônsò. Bakaadi babapetepete dîbà dyônsò edi. Kuvwa beena Sodoma, kuvwa—kuvwa beena Lota, ne kuvwa Abraham.

<sup>235</sup> Beena Abraham bavwa kasumbu kabiikila bwa kupatuka, yêyè kavwa mu Sodoma to anu kwine kwônsò aku. Mpindyewu tangilaayi numone wabo Mukenji! Bôbò bavwa bindile mwànà mulaya, bamwindile kukaavwa bidimu. Nzambi ukaavwaku mulejeleeje Abraham bimanyinu binene byàbúngi ne maalu a kukema, kadi ki Nzambi nyewu mutuuluke Yêyè mwine bu muntu!

<sup>236</sup> Wêwè udi wamba ne: “Awu's uvwa m'Mwanjelo.”

<sup>237</sup> Abraham wakaMubiikila ne, “Mukalenge,” ne dileeta dinene M-u-k-a-l-e-n-g-e. Mubadi kana yônsò wa Bible mmumanye ne awu M-u-k-a-l-e-n-g-e ne dileeta dinene ng'Elohim. “Ku cibangidilu Nzambi,” Mukalenge Nzambi, Elohim, Ewu udi mukumbane mu byônsò. Abraham wakaMubiikila ne, “Mukalenge Nzambi, Elohim.”

<sup>238</sup> Mpindyewu monaayi, kuvwa bantu babidi bàakapwekà mu Sodoma biikale ne mukenji, nenku bôbò kuyiisha beena Sodoma. Bôbò kabaakenzaku kaacishima nansha keetu kaa i aka to, anu kubafofomija; mudibi ne, diyiisha dya Evanjeeliyo ditu difofomija mwena bupidya anu cya bushuwa eci.

<sup>239</sup> Kadi tangilaayi numone ne ncimanyinu cya mushindu kaayi cyakapetabo kudi kasumbu kaa Abraham!

240 Mpindyewu, twètù tudi ne cya kwikala Dimiinu dya bukallenge dya Abraham, Izaka nguvwa dimiinu dya mubidi. Kadi Dimiinu dya diitabuuja, diitabuuja mu Dìyì dilaya, Dìyì *dilaya* (kaCinupiciku to) divwa n'Dimiinu dya bukallenge adi; ki divwa Dimiinu mene, diitabuuja dya Abraham. “Twètù biikale bafwe mu Kilisto, tudi Dimiinu dya Abraham, bapyanyi pamwe nende bilondeshile mulayi.”

241 Monaayi pavwa byònsò abi munkaci mwa kwenzeka apu, mwamwa mu Sodoma muvwa bambi babidi muntwamu biikale bayiisha mukenji munene.

242 Kuvwa Kampanda musòmbè apa ne kasumbu kaa Abraham kavwa kakayi kakutakanangana ne cisumbu cìvwà mu cibanda mwamwa aci to. Mpindyewu tangilaayi numone Kampanda ewu uvwa mushaale ne kasumbu kaa Abraham awu, ne cimanyinu cya mushindu kaayi cyakabapaYe. Yèyè wakamba . . . Mpindyewu, vulukaayi ne, dìnà dyende divwa Abram ndambu wa matuku kumpala kwa cyòcì aci; ne divwa S-a-r-r-a, kadiyi S-a-r-a-h (mwànà wa bakaji wa mfumu) to. Kadi Muntu ewu, ne nyima Wende mwela ku ntenta . . .

243 Bakaji musangu awu bavwa bashiilangane ne mukaadibu mpindyewu emu. Bikaadi bikengela bwa kwikalabo bapatuka bakabwelakana mu myanda ya baabayaabo ne bikwabo byònsò, nudi bamanye's. Kadi kabavwa bacyenza musangu awu to; bavwa bôbò bashaala basòmbèle kumfundu.

244 Pa nanku bôbò . . . Pa nanku Mwanjelo awu musòmbè mwab'awu, Musanjeela awu, ki Yèyè kwamba ne: “Abraham, mukajeebe Sarah (S-a-r-a-h) wèpì?” Mmunyi muvwaYe mwa kucimanya? Wakacimanya munyi?

245 Abraham ne: “Udi mu ntenta paanyima Peebe apu.”

246 Yèyè kwamba ne: “Nènnùmwenèkèlè mu cikondo cìMvwà munulaye aci. Nènnùmwenèkèlè.” Ki Sarah kwenzaye bu wadisekedi mundamunda.

247 Mwikale ne nyima Wende mwela ku ntenta, ki kwambaYe ne: “Sarah waseki bwa cinyi, wamba ne: ‘Biine bintu ebi nebyenzeke munyi?’” Bu ne kavwa munda mwa Abraham to, mukajende musela awu pa diine dîbà adi, nunku Nzambi's mmumushipe. Ki mutuvwa twètù peetu bafwanyine kwikala leelu ewu ne bupidya bwetu bwònsò ebu, bu ne katuvwa munda mwa Kilisto to. Aci ncidi citukwata mwaba awu mene, nwamonu's. Kavwa mwa kwenzela Sarah bibi anyi kumwangata kayi wenzela Abraham bibi to. Nwamonu anyi?

248 Nanku vulukaayi ne, Yesu mmwambe ne: “Anu mwakadibi mu matuku a Sodoma, ki mwikalabi kabidi ku dilwa dya Mwànà wa muntu.” Tudi tumona, muntu yònsò udi witaba, ne buloba bukaadi mu ngiakadilu wa Sodoma. Mvwa mwangate cibejibeji cya ku Los Angeles mwab'ewu anu abidi adi panshi aa, cyamba, ngeela meeji ne cidi ne: “Dibakangana dya mulume ne mulume

ne dya mukaji ne mukaji ndilwe kuvulangana ne bya pa lukama makumi abidi anyi makumi asatu mu Los Angeles, ku cidimu ne ku cidimu diikale divulangana mu bûngì abu.” Cidi . . . Kaa, s’bidi byenza bwôwà’s! Mu bukalenge bwetu emu ne myaba yônsò, byônsò bikaadi anu binyanguke. Aci’s ncyà bushuwa! Cintu cyônsò mu kaabujima, ndongolwelu yônsò mu kaabujima, ekeleeziya ne bikwabo byônsò bikaadi anu binyanguke. Cidi mu cikondo cya dinyanguka.

<sup>249</sup> Mpindyewu ndi muswe kunukonkaku cintu kampanda nwênù beena teoloji, baa ku bânà beetu. Kî mbwena kwamba ne ndi ngamba bwa kukulwisha to, wêwè mwaneetu wa balume munanga; ndi mwaba ewu mbwa kukukwacisha, mwaneetu. Ndi mwaba ewu mbwa kwimanyina cidi Diyì dya Nzambi dyamba ne ncyà bushuwa, kukukwata wêwè ku cianza kadi kupatula musumbà wa bantu ewu mu cintakanyi eci. Cya bushuwa’s!

<sup>250</sup> Kadi tangilaayi kuneeku, kacya katutuku banji kupeta musanjeela mupweke mu Sodoma kwônsò eku uvwa mwikale ne dînà dishiikila ne h-a-m to anu mpindyewu ewu. Tukaadi bapete Spurgeon, Wesley, Luther, ne bikwabo byônsò, kadi kacypu musanjeela wa mumanyike buloba bujima mwikale ne dînà dishiikila ne h-a-m, kwônsò eku. Aci’s ncyà bushuwa! Nwamonu’s, G-r-a-h-a-m, maleeta asambombo, G-r-a-h-a-m, Billy Graham; mutangadiki mumanya bimpè awu, mudimu munene wa Nzambi, muntu awu’s mmutumiibwe kudi Nzambi. Yêyè mmumanye dibingishiibwa adi ne mu kakanu, ne yêyè udi unyungisha naadi ditunga, nwamonu’s, mushindu awu. Kakwenaku . . .

<sup>251</sup> Tangilaayi Oral Roberts bwa dingumba dya beena Mpenta. Kacyakacya kukaadiku wa bu yêyè awu dîbà kaayi?

<sup>252</sup> Maleeta asambombo, kaayi mwandamutekete to. Abraham udi A-b-r-a-h-a-m, mwandamutekete. Billy Graham udi G-r-a-h-a-m, asambombo.

<sup>253</sup> Mpindyewu tangilaayi baamisanjeela aba. Tangilaayi cikondo citudi tusanganyiibwa, kacya kakutu kwanji kwikala cikondo bu nanku mu maalu malonda to. Tangilaayi bimanyinu bimwebimwe byakalayaYe ne nebipeeshiibwe kudi kasumbu ne kasumbu. Tangilaayi numone ne bakaadi penyi. Bimwebimwe abi, menemene, bilondeshile myaba, bateekiibwe anu mu bulongame. Bufuki, buloba, byônsò, biteekiibwe anu pa dîbà menemene.

<sup>254</sup> Mpindyewu kaCinupiciku to, patucidi tulonda lukasalukasa citupa cikwabo cya Mufundu ewu apa. Lukasalukasa mpindyewu, bwalu nyawu nnulama ntanta mupitepiteme. Dibiikila . . . Tangilaayi kuneeku. Nenku bilondeshile muprofeta, wakalwa anu mu byôbi menemene bilondeshile Dîyi, anu pa dîbà menemene.

<sup>255</sup> Mpindyewu tangilaayi cikondo citudi mpindyewu ne mwoyi. Katwena ne mwoyi mu cikondo menemene anu cya Sodoma aci anyi? Tangilaayi musanjeela uvwa mutùmina kasumbu kaa Abraham. Tangilaayi nomba ayi, maleeta, ne búngì bwa maleeta a dyende dîná. Wèwè udi wamba ne: “Kakwena bwa nsongo bwine mu dîná to.” Muntu kakwambidiku aci to. Bwa cinyi Yèyè ushintulwile dîná dya Abram, kulwadi Abraham, dya Sarra kulwadi Sarah? Bwa cinyi Yèyè ushintulwile Simona kulwaye Peetelo, ne makwabo ònsò awu? Nwamonu anyi? Ncya bushuwa ne bwa nsongo budi anuku. Mmwômò menemene!

<sup>256</sup> Ki bwa cinyi ndi ngamba ne, kudidingi wabiikilaku mwaneebe ne “Ricky,” anyi ne “Elvis,” anyi cintu kampanda to. *Elvis* mbwena kwamba ne “kampuusu,” *Ricky* yèyè “mmpuku.” Nwamonu’s, paudi wamba ne... Ncya bushuwa menemene. “Les,” anyi cintu kampanda, kudidingi wînyikakù nansha umwe wa ku bâná beebe . . . bâná beebe dîná adi to. Piikalabi ne bikaadi nanku, udishintulule ne lukasa lwònsò, balumyana wa yaaya. Kudidingi . . . Nwênù bàdì . . . Pawikala ungiitabuuja mêmè bu musadidi wa Nzambi, kulamikiku dîná adi pa mwâna mukwate ne bya luse awu to. Wamonu anyi? To, mukalenge, umwinyikeku dîná dya cyanaana didi kadiyi adi to. Ekelekele! Kabivwa bikengela mêmè kulalukila apu to, bwalu nyewu ndi mupatuke mu cyena-bwalu cyanyi, kadi ngaamanyi mene anu kucyamba’s ne kwòkò kwine kwamanyi kujika. Ndi . . . Ki mutubi’s, kuyi umanya ne ndîbà kaayi dyùdì ucyamba to. Nwamonu anyi?

<sup>257</sup> BaakaMubiikila ne: “Mwenyi, mwena lubuku, démon, Beezezebula,” bamba ne: “Ùdi udivwija Yèyè mwine Nzambi.” Kaa, ekelekele!

<sup>258</sup> Yeshaayi muprofeta kaakambaku ne: “NebaMubiikile ne Nzambi Wa bukole” anyi? Yeshaayi 9.6: “Mbatulelele Mwânà, mbatupe Mwânà wa balume, ne bukalenge nebwikale pa makaaya Ende, ne Dîná Dyende nedibiikidiibwe ne Mubedyanganyi, Mukalenge wa Ditalala, Nzambi wa Bukole, Taatù wa kashidi.” Ncya bushuwa! Kabidi, Yone Munsantu 1.1: “Ku cibangidilu kwakadi Dîyi, ne Dîyi dyakadi ne Nzambi, ne Dîyi dyakadi Nzambi. Ne Dîyi dyakavwijiibwa mubidi ne dyàkasòmbela munkaci mwetu.” Nudi nwitabuuja aci anyi? Yèyè kavwa anu . . . Yèyè uvwa Muprofeta, kadi Ùvwa mutambe ne muprofeta; Ùvwa Nzambi-Muprofeta awu. Byakakengela bwa Yèyè kulwa bwa cinyi?

<sup>259</sup> Vulukaayi ne, Yèyè udi ulwa mu mènà asatu a mwânà. Wakalwa dyambedi mu dîná dya Mwânà wa muntu. Kacya Kaakadibiikilaku Yèyè mwine ne “Mwânà wa Nzambi” to. Aci nudi bamanye. Nwamonu’s, Yèyè wawalwa mu Mwânà wa muntu, Muprofeta. Yehowah Yèyè mwine, Taatù, wakabiikila Yelemiya ne, “mwânà wa muntu”; muprofeta mmwânà wa muntu. Yèyè wawalwa . . .

<sup>260</sup> Mpindyewu Yêyè wakalwa, paanyima paa Dituku dya Mpenta, Wakaalukila mu mmwenekelu wa Nyuma Mwimpè, Nyuma mutambe-mfukilu. Mpindyewu Yêyè udi Mwânà wa Nzambi.

<sup>261</sup> Mu Bukalenge bwa bidimu cinunu Yêyè neikale Mwânà wa Davidi, musòmbe pa nkwaswa wa butumbi wa Davidi. Nwamonu's, Yêyè mmulwe mu . . . Yêyè udi Mwânà wa Nzambi, Mwânà wa muntu, Mwânà wa Davidi.

<sup>262</sup> Kaa, Bible s'mmûle tente ne bimpòkòtò bya ngôlò ebi. Katwena mwa kubimana byônsò mu diloolo dimwepele to. Kadi bidi anu bikumbane bwa kujaalamija eci mpindyewu. Bidi mwa kwenzeka ne maalaba kabûyi mwa kucyaku to. Bidi mwa kwenzeka ne twikale bamane kuya kumpala kwa kucyabu maalaba. Bidi mwa kwenzeka ne ngiikale munkaci mwa kuyiisha muntu kampanda wîkala mumane kufwa kumpala kwa kucyabu mu dinda. Mbifwanyine kwenzeka ne mêmè ngiikale muye kumpala kwa kucyabu mu dinda. Mwaneetu wa balume, mwaneetu wa bakaji, aci kî mbwalu bukwatakaja to, maalu malelela adi enzeka! Katwena bamanye ne netuye pa dîbà kaayi to, ne wêwè kwakupetaku mpunga nansha mukese paanyima paa mweyelu wà ndekeelu awu mumane kukuumuka mu mubidi amu to. Longolola bwalu abu patudi twakulangana apa, kwindidi too ne paacyabu mu dinda to, bidi mwa kwenzeka ne dîbà diikale dimane kupita.

<sup>263</sup> Monaayi mpindyewu, baakaMwenzela menemene anu cikaavwa baprofeta bambe ne nebénzè aci, anu menemene mudibo munkaci mwa kwenza mu dituku dimwedimwe edi mu Cikondo cya Laodikiya emu. Pawikala muswe kucitangila, balà Bwakabuulwibwa 3: "Mpofo, butaka, kadi kayi mucimanye to. Wipata Kilisto . . ." PakaadiYe ubanga kuDibuulula cyakabidi mu mmwenekelu wa dimiinu, dyôdî dimwedimwe dyàkayà mu buloba adi ndyalukile bwa kwikala Mukaji-musela; anu Mukaji musela ne Mubaki, biikale musunya umwe ne mashi amwe, mudimu wa bwambi umweumwe awu, ne bintu bimwebimwe abi, wenza anu menemene cyakenzaYe aci; Nyuma.

<sup>264</sup> Kadi's ki bôbò aba munkaci mwa kutentula ne kwenza bikwabo byônsò, ne muntu ne muntu udi ne wende mukanda ne muvukute lubilu, ne *bikampanda*. Kaa, kacya kanutu banji kuumvwa masaluka bu nanku. Ne, sniff, sniff "Ndi muumvwe mupuuya wa démon mpindyewu." Byônsò bya bikampanda, bikansanga abi, kabiyiku bya mu Mifundu to nansha kakese!

<sup>265</sup> Kadi paabi cintu cishuwashuwale citeeka anu panshi mwab'awu kumpala kwabo's, buumuka baya ne: "Abi kî mbya mu bwanyi bulongolodi to." Ekelekele, ekelekele, anu, nwamonu's, mpofo anu yetu eyi menemene yilombola mpofo naayi. Bwônsò bwabo kabaakudishindaku mu mukidi anyi? Bafofomija kudi bilele bya bantu bya cyena mangumba, badi

baMwipata pambelu paa ekeleeziya wabo mwakamba Nzambi ne nebènzè amu, mu Bwakabuulwibwa 3; mutubi pa ciibidilu, mwakambiibwabi mu ciprofeta amu.

266 Monaayi muvwa Yesu mudi-...muDimanyishe kudi bayiidi aba, mpindyewu, nenku netujikije. Bayiidi babidi aba, Kaayifa...Keleopa's we, eyo, ne mulunda wende. Mpindyewu tudi mu dibiika dya ku lufu, dinda dya paanyima paa dibiika dya ku lufu, dibiika dya kumpala dya ku lufu; dinda dilenga kaayipu's we, Yesu mujuuke ku bafwe ne mwikale ne mwoyi munkaci mwa bantu Bende. Meeji malenga kaayipu's we!

267 Yèyè udi kaaba aka leelu ewu umwèumwè awu anu muvwaYe diine dituku adi amu, bwalu Yèyè udi umwèumwè awu makeelela, leelu, too ne kash-... Ne mwikale uDibuulula leelu ewu kutamba ne mukaadiYe mwenze mu cikondo kana cyònsò kacya ku diine dituku adi; mupicile mu blé ne mu cikolakola ne mu cizubu (byònsò abi bikaadi bimane kupita mpindyewu), tukaadi babwele cyakabidi mu blé. Nwamonu's, tukaadi baalukile babwele mu lutete.

268 Mumanyike bu...kumanya...Tangilaayi mushindu wakaDimanyishaYe kudi bantu aba, mpindyewu, vulukaayi ne, mbu Maasiya wabo (kumpala kwa twètù kujikija) wa Dìyì dilaya dya cikondo. Monaayi! Wakamweneka kudi, kudi... mudiYe mwambe ne Neamweneke, kudi baprofeta. Monaayi: "Bakutakane, ne baa myoyi mineeme bujitu bwa kwitabuujja ne bivwa bikengela bwa byònsò byakafundabo bwa bwalu Bwende kudi baprofeta kuulabi."

269 Mutangilaayaaku Yèyè! Ùdi uleedila buludi ku Dìyì dya Nzambi, kacya Yèyè kaakabambilaku ne: "Kanwena baMmanyè anyi? S'ki Mémè ewu Maasiya awu udi mubiike ku lufu." Kaakambaku nanku awu to. Nwamonu's, Yèyè wakabapa anu Mifundu pa yôyi; bu mwakenza Yone, ne bakwabo bònsò. Nwamonu anyi? Ùvwa anu...Bikengela bwa bàdyängwìlèci nkaayaabo. Bikengela badikenketele bòbò nkaayaabo. Mpindyewu, kwikadi walaala tulu's, udikenketele wèwè nkaayeebe.

270 "Bakutakane, ne baa myoyi mineeme bujitu bwa kwitabuujja ne bivwa bikengela bwa byònsò byakambabo kudi baprofeta kwenzekabi." Kadyuwu kaayi bwa biine bavwa balaka mukana bamba muvwabo baMumanyè. Nwamonu anyi?

271 Monaayi mwakafikaYe ku dilenga dya cyena-bwalu aci. Kaakapatukaku buludi, mûngăfumu ku dyamba kukaadi ndambu wa tusunsa amu, wamba ne: "Ee, kanwena bamanyè ne Mémè ki Maasiya wenu bwa cikondo eci anyi? Kanwena bamanyè ne Ndi Yèyè awu anyi?" Musadidi mulelela wa Nzambi katuku udimanyisha mu mushindu awu to; Mufundu ngudi umanyisha ne yèyè awu nkampanda. Cya bushuwa, ki mwenzaye. Kadi kukokaYe anu ntema yabo ku civwa baprofeta

bambe bwa kukeba mu cikondo cya Maasiya. Nwacyũmvù anyi? KwalukilaYe buludi ku ne: “Bakutakane, ne baa myoyi mineeme bujitu, bwa kubenga kwitabuuja ne bivwa bikengela bwa byònsò byakambabo kudi baprofeta bwa Maasiya kwenzekabi.”

<sup>272</sup> Yêyè, bu Yone, wakalekela Dìyì dya mu Bible diMumanyishe, civwaYe kudibo aci. Bivwa bikengela bwa cyôci aci kutookeshiibwaci mu mushindu mukumbane. Piikalabi ne Dìyì dyakaMumanyisha, s’bivwa bikengela ne aci ciikale citooke tòò ne Yêyè uvwabo batangile awu ki uvwa mwena mulayi mwine. Bavwa bamanya ne bivwa bikengela bwa yêyè. . . bwa muntu kampanda kumataye mu cyalu pa ðìbà adi.

<sup>273</sup> Mona’s, Yêyè kwamba ne: “Mpindyewu lekelaayaaku Mêmè nuleeje cidi Dìyì dyamba ne ki cidi ne cya kwenzeka mu ðituku edi.”

<sup>274</sup> Mêmè, diloolo edi, ncyênàku munkaci mwa kuteeta kunwambila, ku Dìyì ne ku Dìyì (nansha mwaba mene, ne mpenyi piine apu, mênà, nomba miine, bikwabo byònsò, ne bimanyinu byònsò, misangu, ne byònsò) ne, tukaadi mwab’ewu mene ku nshikiidilu aku anyi? S’ncyà bushuwa ne nudi mwa kumona cîndi ngamba aci. Nwamonu anyi? Tangilaayi! S’mbitooke tòò mu mushindu wa kabiyi bikengela nansha dimanyishiibwa dipite apa to. Yêyè wakamba, pavwaYe pa buloba apa ne: “Kenketaayi Mifundu, mu Yôyi ayi mmunudi nwela meeji ne nudi ne Mwoyi wa Cyendeleele, Yôyi’s ki yidi. . . Yôyi’s ki yidi. . . Yidi yifila bujaadiki bwa ne Mêmè ndi cinyi,” nwamonu’s, “ne Mêmè ndi Nganyi.”

<sup>275</sup> Monaayi, Yêyè kubanga ne Mòsà muprofeta ne: “Muprofeta. . .” Dutelonoma 18.15. Ndi munkaci mwa kutabaleela Mifundu kaaba aka, Dutelonoma 18.15, Mòsà wakamba ne: “Mukalenge Nzambi webe. . .”

<sup>276</sup> Nwamonu’s, Nzambi wakaakula nende ku lusongo lwa mukuna. Nenu, kaa, ekelekele, mikungulu; bôbò kwamba ne: “Mukalenge kaa—kaakulu. . . Mòsà akule yêyè, Nzambi to, bwa katwikadi twâlwa kubutuka.”

<sup>277</sup> Yêyè kwamba ne: “Bôbò biine bãmbì anu bilenga. Nêngiikalè. . . Ncyakwakulaku kabidi naabo mushindu ewu to, kadi Nêmbàjuudilè muprofeta.” Nenu ki civwa mukenji Wende ncyôci aci ku ntwadijilu too ne ku ndekeelu. Cyôci aci’s ncidi cikengela bwa kukosa bwalu bwònsò nkòong ku nshikiidilu. Bikengela anu cyôci aci cikose bwalu, bwalu bidi bikengela bwa Dìyì dya Mukalenge dilwe kudi muprofeta. Ki cintu cimwepele kudiDi mwa kulwa’s. Kabiyi nanku to, aci cidi cinyangakaja Dìyì dya Nzambi ne cidi ciMwambishisha cintu cidi kaciyi cyôci to. Nwamonu anyi? KaDyakuyaku ku seminere kampanda to. Didi diya kudi muprofeta. Ne muprofeta mmutumiibwe kudi Nzambi, muteekiibwe. Ne mushindu unudi numanya ne bidi nanku, ne kaciyi cidi muntu mwambe to. . .



278 Tukaadi bapetepete ba-Eliya, ne binkooci, ne bikwabo byònsò, ne binkutu, ne lukutukutu lwa mishindu yònsò, kadi balaluke e kuya kabwela mu malongolodi ne bikwabo byònsò.

279 Kadi nekulweku pa buloba apa, ku mulayi wa Nzambi, musadidi mushuwashuwale wa Nzambi, mumanyisha kudi Nzambi (ku Dîyì Dyende diikale dyandamuna dya dituku edi), watèèka Mukaji-musela mu bulongame (banyààbanyà balelela bakese menemene baa ekeleeziya) ne kuMwambula. Ncya bushuwa! Yèyè awu ki wàleeja ku bantu ne: “Monaayi, ki Yèyè ùmwà ngamba wawa, nwamonu’s, wikala ne cya kulwa.”

280 Nenku byònsò byákambà baprofeta bwa bwalu Bwende abi, ne bwa cikondo eci, kaa s’bivwa bulelela bifwanyine kusankisha bwa kwikala baMuteeleje wamba cyòci aci. Kanwenaayiku peenu bafwanyine kujinga kwikala baMuteeleje ucyamba anyi? “Byònsò byakamba baprofeta abi bwa . . .” Vulukaayi ne, Yèyè wakamba bivwa baprofeta mwa kwamba bwende Yèyè mwine, Mwikale uDiteela Yèyè mwine, bivwaYe mwambe abi (ne Yèyè uvwa Dîyì); uteela’s.

281 Mpindyewu tuteelejaayaaku Mèyì akateelaYe. Nudiku bajinge kuteeleja cyakabambilaYe anyi? Twänjààyi kulondaku anu muyiiki wabo mpindyewu, kumpala menemene kwa twètù kwimanyika.

282 Mpindyewu, bakaavwaku babalondele maalu ònsò acìvwà afuma ku dyenzeke pa bivwa bitangila dipoopediibwa dya pa nkuruse, a bwalu buvwabo balonde bwa ku lukita ne bwa ku majambu abu, ne bya ne bakaji abu bavwa baMumone, ne mukwabo uvwa pende mwambe ne bavwa baMumone, ne bikwabo. Yèyè kwamba . . . Bòbò—bòbò kuMulondela byòbi abi. Nenku Yèyè kutungunuka buludi ne Dîyì pa bivwa bitangila . . . uditeela Yèyè mwine mu Dîyì amu ne:

“Mpindyewu tangilaayi mu Zekaayi 12.” (Ùvwa ne cya kwikala muteele Zekaayi 11.12.) “Bwalu Wakasumbishiibwa ku bicycle bya mfranga makumi asatu. Kabivwaku bikengela bwa Maasiya asumbishiibwe ku bicycle bya mfranga makumi asatu anyi?”

“Mu Misambu 41.9, baakaMutungila kudi balunda Bende. Nwamonu anyi?”

“Zekaayi 13.7, mulekela kudi bayiidi Bende.

“Mu Misambu 35.11, mufunda kudi bantemu baa mafi.

“Kudi Yeshaayi 35.7, kayi ditama kumpala kwa baMufundi, kayiku mutubule Mwende mukana to.” (Eyo, mukalenge.)

“Yeshaayi 50.6, Wakeediibwa mfimbu.

“Misambu 22—22, Wakeela lubila ku nkuruse ne: ‘Nzambi Wanyi, WàNdekèdì bwa cinyi?’ ‘Mifuba Yanyi yònsò yikaadi miNtangile.’ ‘Mbatubule byanza Byanyi ne makàsà Aanyi.’” (Tangilaayi biprofeta bivwaYe mwa kwamba!)

“Yeshaayi 9.6, ‘Mbatulelele Mwânà,’ ‘Virgo neimite difu,’ ne bikwabo.

“Kabidi ne mu Misambu 22.18, bôbô—bôbô—bôbô kwabanyanganabo bivwalu Byende munkaci mwabo.

“Mu Yeshaayi 7.14, ‘Virgo neimite difu.’

“Misambu 22.7 ne 8, pàmwápa . . . musekiibwe kudi beena lukuna Bende, (Bende, biine bàvwà ne mbalunda Bende abu), beena lukuna Bende, ekeleeziya.

“Kabidi mu Misambu 22, Yèyè uvwa . . . mufuba nansha umwepele kawuvwa ne cya kucibudiibwa to, kadi baakatubula byanza Byende ne makàsà Ende.

“Yeshaayi 53.12, mufwe pamwe ne benzavi.

“Mu Yeshaayi 53.9, muzaaza, ne mujiikiibwe pamwe ne mwaneetu wa balume mubanji.

“Mu Misambu 16.10, Wakabiishiibwa ku bafwe. Davidi ngwákamba nanku ne: ‘Ncyakutwala bwa Wa Cijila Wanyi amone dibola nansha, anyi Ncyakulekela musuuka Wende mu iferno to.’ Yèyè’s mmubiishiibwa ku bafwe.

“Maalaki 3, Yone Mubatiiji nguvwa muMudyanjididi.”

<sup>283</sup> Ne bimfwanyi byònsò bivwaYe mufwanyine kwikala muteelele abi! Too ne ku Izaka muvwaye cimfwanyi Cyende pa Mukuna . . . pa mukuna pavwa tatwëndè Abraham muye nende apu, mu Genese 22.

<sup>284</sup> Mpindyewu ki wákabangabò kumona ne Nganyi mwine awu uvwa muuje Mifundu yivwa milayiibwe bwa dituku adi eyi. Pàvwa mpa dîbà adi, paanyima pàà dîbà dimane kuya bikole. Kubangabo kumona ne, “Kaa! Ee, anji indilabi kakese tũng! Udi mumanye mudi bwalu anyi?” Baakamanya pa dîbà adi ne Mulunda wabo uvwabo bapoopele pa nkuruse awu, Yesu, ki uvwa Muprofeta uvwa mulayiibwe awu. Baakamanya bwalu . . . Nwamonu’s, kabavwa babalondele maaluu pa bivwa bitangila Mifundu to.

<sup>285</sup> “Kadi, mwab’ewu, bintu byònsò bivwa ne cya kwenzeka ku nkuruse ebi, bintu byònsò ebi. Bakutakane, baa myoyi mineeme bujitu bwa kuumvwa byònsò bidi baprofeta bambe; muvwa Maasiya ne cya kukenga, ne kubwela mu butumbi Bwende, ne kubiika ku lufu mu dituku diisàtu.”

<sup>286</sup> Bacidi anu benda baya’s: “Kaa, eyowa’s. S’ncya bushuwa’s. Mêmè ndi ngamba ne Yèyè—Yèyè . . . Myoyi yetu kayivwa yilakuka kapyà munda mwetu anyi?” mwakambabo. Kabivwa bya bikemesha to muvwa myoyi yabo miteeme kapyà! Biprofeta bivwaYe ufila bivwà byùle abi.

<sup>287</sup> Pa dîbà adi kubangabo kuumvwa ne Mulunda wabo, Muntu uvwabo badye nende, bayiikile nende, baswikakane nende, balobe nende mishipa, balaale nende mu meetu, ki uvwa muuje

Diyì dyónsò dya díbà dilaya adi! S'ki bwalu mbwòbò abu. Bakaavwa bende lwà makàsà ntanta wa kilomeeta citeema ne citupa, bimweke anu bu katanci kakese menemene, mûndì ncinka's, kadi bateeleje diyiisha dya mēbà asambombo pa ciprofeta cishindika (dileepa ndambu kutamba ditudi bateeleje diloolo edi edi, nwamonu's). Díbà mpindyewu dikaavwa bu dibange kupita pa díbà dya diloolo adi, Makênkè a diloolo akaavwa malwe.

<sup>288</sup> Ndíbà dyòdì dimwedimwe adi patudi twakulangana apa, ekeleeziya! Makênkè a diloolo akaadi malwe! Ebelu 13.8: "Yèyè udi umwèumwè awu makeelela, leelu, too ne kashidi." Kaa, maalu àdì ènzekà matookeshiibwe kudi ciprofeta, bya mwomumwe leelu ewu. Bukênkè bwa diloolo bulaya kudi muprofeta wa Nzambi, mu Zekaayi 14.7, adi mwa kutabaja cyakabidi mēsù a mwena kwitabuuja ku maalu adi munkaci mwa kwenzeka leelu ewu, adi majaanika kudi biprofeta bwa ne tukaadi ku cikondo cya nshiikidilu. Yesu ulwalwa.

<sup>289</sup> Mwine...Bidi...

<sup>290</sup> Mmwambe ne: "Nekwikale dituku diikalà kadiyi dya dibiikidiibwa ne mbufuku anyi mmundaamuunya to." Yèyè ne: "Kadi ku díbà dya diloolo nekwikale Bukênkè." Mpindyewu, tutu bamanye ne, bilondeshile mudi buloba busòmbe, díbà ditu dijuuka ku esete dikabwela ku wesete. Mpindyewu, muprofeta mmwambe ne: "Nekwikale cipòlò cya díbà cileepa ciikalà cibwicidile, cyenze bu...cidibo kabayi bafwanyine kubiikila ne mmundaamuunya anyi mbufuku to; ncyenze bu dituku dya midimà, dya dibungama."

<sup>291</sup> Mpindyewu, Mwànà wakajuukila penyi? Ncinyi...Awu ki uvwa M-w-â-n-à utudi twamba mpindyewu awu. Mbwa ne m-w-â-n-à wa mu bufuki utu ujuuka ku esete awu utu ukabwela ku wesete. Nzambi anu umwèumwè awu, anu umwèumwè awu...*Dibà's* we, eyo. Ne M-w-â-n-à wa Nzambi wakajuukila dyambedi ku esete, kudi bantu baa ku esete.

<sup>292</sup> Nenu mpindyewu paanyima paa Yèyè mumane kuumuka, cyakenzabo ncinyi? Paanyima paa bidimu nkama isatu, baakabanga bulongolodi bwabo bwa kumpala, ekeleeziya wa Katolike wa cyena Loomo. Kupicilabo mu Cikondo cya Mîdimà, ne bôbò kumupatuka. Cyakenzabo ncinyi? Cintu anu cyôci cimwecimwe aci. Civwa ndituku dya...Dyòdì adi kadyakabiikidiibwa ne mmundaamuunya anyi mbufuku to. Bavwa ne bulongame bukumbane, ne baakiitabuuja ne Yèyè uvwa Mwànà wa Nzambi, ne baakendela mu bukênkè bwine buvwabo paabo naabo abu, kwenzabo ekeleeziya yabo, kwibakabo mpitaadi ne tulaasa ne bikwabo, ne maaseminere, kutumabo bânà baabo balela mu tulaasa.

<sup>293</sup> Kadi muprofeta mmwambe ne: "Nekwikale cyakabidi Bukênkè lwà ku díbà dya diloolo. Mwànà neapatuke cyakabidi

patooke, nekwikale Bukênkè.” Cinyi? Mwânà anu umwèumwè (M-w-â-n-à) wâkabuuludiibwa mu mubidi pa dîbà dya dinda awu, kuntu kwaka, neabuuludiibwe cyakabidi ku ib’a muloolo.

<sup>294</sup> Mpindyewu fwanyikijaayi ne Luuka Munsantu 17:30: “Nenku mu dituku adi, anu mwakadibi mu matuku a Sodoma amu, ku dikuupuka dya maalu a pa buloba, mu cikondo cîikalà Mwânà wa muntu munkaci mwa kubuuludiibwa.”

Nekwikale Bukênkè lwà ku dîbà dya diloolo,  
Njila wa ku Butumbi nenumupete bulelela.

<sup>295</sup> Kaa, ekelekele! Balumyana wa yaaya, tukaadi penyi?

Matunga adi akosoloka, Izaleela udi utabuuluka,

Bimanyinu byâkadyànjlà baprofeta kwamba;  
Matuku a baa Bisamba bya bende mmabala ku minu, mûle tente ne bintu bidi bikwacisha bwôwà; (Mutangilaayi numone mudiye ufinunukila mu mbû!)

Alukilaayi, Éyì nwênù badi batangalake, kudi baa kwenu.

Dituku dya bupikudi dikaadi pabwîpì,  
Myoyi ya bantu yidi yamba kwimana bwa bwôwà;

Ikalaayi buujiibwe ne Nyuma, ikalaayi ne myëndù yenu milongolola ne mitookesha,  
Bandulukaayi! Bupikudi bwenu bukaadi pabwîpì. (Bikengela úcyènzè.)

<sup>296</sup> Mwaneetu wa balume, mwaneetu wa bakaji, cikondo’s ncyà cikwacisha bwôwà’s. Tangilaayi numone bintu bidi byambiibwe mu ciprofeta, tangilaayi numone mudi bintu byenzeka. Tangilaayi numone mudi ciprofeta cyônsò munkaci mwa kuula, pa dîbà adi mpatudi tumona cidì byônsò ebi byumvwija. Kî mmusumbà wa mulongolongo wa dikolesha dya maalu to. Cidi n’Nzambi mwikale ushindika Mêyì Ende anu menemene, menemene. Lubwebwe ndutuuta, balunda baanyi, nyeemenaayi kudiLu lubilu ne mwenu mwônsò. Ciprofeta nyewu cidì munkaci mwa kushindika dituku ditudi ne mwoyi.

<sup>297</sup> Twinyikaayaaku mitu yetu. [Mwaneetu wa balume kampana udi wakula mu mwakulu mukwabo. Mwaneetu wa bakaji kampana udi ufila dyandamuna. Mwaneetu wa balume kampana pa cibumba cya ku cyambilu udi wamba ne: “Tudiku mwa kushaalaayi pôlàà katanci kakese cyanaana anyi? Nzambi wâkwidì neetu kudi Mwaneetu Branham, ne dilaabiibwa didi pambidi paa Mwaneetu Branham, ne yèyè kî mmwanji kujikija to. Ne . . .” Katupa kaa mukaba wa mèyì munda mutupu—Muf.]

<sup>298</sup> Nzambi munanga! Nudiku nufika ku dimona dituku ditudi ne mwoyi edi anyi, balunda baanyi? Nudi bafwanyine kupeta dikamakama dya kukokangana ne Nzambi anyi?

Nudiku bafwanyine kwamba ne “Yèyè kî mmubinge,” padiYe muCijaadike apa anyi? Yèyè mmuDyumvwijidi wa Yèyè mwine. Nudiku baswe kuMukwacila mudimu anyi?

Mpindyewu ne mitu yenu miinyika, ne myoyi yenu miinyika, mwaneetu wa balume, mwaneetu wa bakaji.

<sup>299</sup> Bidi mwa kwenzeka ne ewu wikale wetu musangu wa ndekeelu wa kudisangisha. Bidi mwa kwenzeka ne kashidi keetu katuciyiku mwa...Même mufwanyine kwalukila mu cidimu cikwabo kubangila ku leelu ewu, bu mêmè mwa kwikala ne mwoyi, nkufwanyine kwikala bààbûngî baa ku badi kaaba aka mpindyewu aba biikalà kabaciyipu to mwine musangu awu. Nenku nebikengele bwa mêmè kutwilangana neenu ku Cibasa cya Cilumbulwidi bwa kulumbulula bwa byònsò bìndi mwambe diloolo edi ebi.

<sup>300</sup> Kumpala kwa Nzambi, paucidi ne meeji ebe pa ôwò apa, udiku mwa kwenza bwalu ebu bwa Nzambi anyi? Pawikala mumanye ne udi...Ditangilaku anu mu lumwenu lwa Nzambi, Bible, nansha wèwè mwikale nganyi, wâmbè ne: “Ndi mumanye ne ndi mupangile bikole bwa kwikala mwânà wa bakaji wa Nzambi, mona anu mushindu wûndi ngenza maalu ewu. Ndi mupangile bikole bwa kwikala mwânà wa balume wa Nzambi, mona anu mushindu wûndi ngenza maalu ewu. Kadi, Nzambi, mêmè ncyêna muswe bwa kwikala apa nansha, ndi—ndi muswe kulwangana bwa kufika pa kaaba aku.” Ndi muswe bwa wèwè kwela cyaanza cyebe muulu kudi Nzambi, nansha wèwè mwikale nganyi, nansha mwikale usanganyiibwa mwaba kaayi mu citanda cijima emu ne: “Eyowa, ndi muswe kwikala mwânà wa balume wa Nzambi. Ndi muswe kwikala mwânà wa bakaji wa Nzambi. Ndi muswe kukumbaja kantu ne kantu kadi Mukalenge wanyi mulombe.” Mpindyewu udi...Nzambi anubeneshe. Ndi ngeela meeji ne mmakumi citeema pa lukama a bateeleji.

<sup>301</sup> Mpindyewu tangilaaku kuneeku, wèwè mulunda wanyi. Amba tûng bu ne uvwa mwa kwikala ne mwoyi mu matuku auvwa mwa kuteeleja Yone uyiisha awu? Amba tûng bu ne uvwa mwa kwikala ne mwoyi mu matuku awwa Yesu mwikale usanganyiibwa panwapa awu? Uvwa mwa kwikala mwangate luseke lwa nganyi? Bu ne wèwè uvwa ne mwoyi mu...a Yesu. Vuluka ne, bu ne Yèyè...Bu ne uvwa ne mwoyi mwine musangu awu, s’bivwa mwa kwikala anu mudibi mpindyewu emu. Yesu umwèumwè awu ngudi uDimanyishila ku Dîyî Dyende ewu, wamonu’s, ne Dyôdi kî nditambe kwanyishiibwa to.

<sup>302</sup> Kadi lekelaayi nnewâmbilèku ne, ncyêna mêmè nteeta kwambila bantu bwa kuumukabo mu ekeleeziya anyi...Ekelekele, mêmè ntu muswe bwa nwènù kwikala nuya mu ekeleeziya: “Kanulekedi kudisangisha to.” Kadi cîndi nteeta kunwambila bwa kwenza nkwenza ne mwenu mwònsò bwa

kubwela mu Bukalenge bwa Nzambi. Umushaayi bintu ebi, maalu a pa buloba, ekeleeziya. . .

<sup>303</sup> Beena Mpenta, nwênù nudi nutamba kwenda kulwa baa ngiikadilu ya maalu a pa buloba be. Nudi nutamba kwenda kulonda maalu a pa buloba bibi be. Bidi anu bipeepele, nudi anu batungunuke ne kwikala kubandila télévion ne bintu byônsò ebi, ne mushindu udibo benza, ne *bikampanda* byônsò, nenku katanci aka. . . Maaseminere, bilongelu bikaadi bibange kudya cibanga apa ne pààpa, ne *bikampanda*, *bikansanga*, ne *bikankenga*, nenku katanci aka. . . Bikengela bilwe mushindu awu. Ekeleeziya wa beena Mpenta, s'utu dyanyi dikwacisha dya ditambe bunene, nciyi mwa kwamba cintu cibi nansha cimwe bwende yêyê awu to. Kadi's ki cîndi ngeelela mbila ne: "Bànà beetu wanyi, patukaayi!" Dibiikila. . . Kanucyena kabidi nwenza masangisha a bwena anuvwa nwenzenzenza awu to. Bantu kabacyena kabidi muvwabo to. Kadi Yesu Kilisto udi umwèumwè awu, tubwelaayi munda Mwendé.

<sup>304</sup> Mpindyewu, nwênù badi ne byanza byela muulu abu, vulukaayi ne, kuvwa Lubwebwe lutuuta mu cipeela, ne mwine Mpokolo awu uci di anu washu diloolo edi. Lubwebwe lwabo alu ndutuuciibwe, Kilisto, Yêyê ngudi Lubwebwe lutuuta alu.

<sup>305</sup> Nenu diloolo edi, bwa ku dyanyi paanyi dimanya, ekeleeziya udi mwa kwikala. . . Cikondo cya dibiikila cidi mwa kwikala cikaadi cipite, ncyêna mumanye, ncyêna mwa kwamba aci to. Vulukaayi ne, bantu baakatungunuka anu ne kwenza masangisha, anu mwabo ne kale, paanyima paa dipoopediibwa dya Yesu pa nkuruse. Nenu. . . ne bantu bônsò abu, bôbò—bôbò nebalwe, bôbò. . . Tangilaayi numone! Bôbò—bôbò nebatungunuke anu ne kuyiisha, biikale bamba ne badi "basungidiibwa" ne bikwabo byônsò, anu bu ne. . . "Buloba's mbutungunuke anu mwabu ne kale," mwambababo. Kadi's dîbà nediikale dimane kupita mwine musangu awu.

<sup>306</sup> Paucidi ne mpunga apa, mwaneetu wanyi wa balume; paucidi ne mpunga apa, mwaneetu wanyi wa bakaji; bwela mu Bukalenge bwa Nzambi. Kabyena bikukengela bwa kubwelela ku cintu kampanda cikwabu to pa kuumusha anu ku diitabuuja dya dipeepele edi bwa kwitabuuja Dîyì Dyende. Yêyê udi Dîyì adi! "Mukalenge Yesu, ndi mumanye ne ndi nditangila mpindyewu mu lumwenu lwa Dîyì dya Nzambi; kaa, mushindu mwine wûndi mupangile's we. Kadi, Nzambi munanga, mwab'ewu diloolo edi, mu diloolo dya mu dimwe edi, muneemu mu San Bernardino, mu Californie emu, mu dibalaasa edi emu, eci ki—eci ki cyônsò paanyi cîndi naaci, Mukalenge, kadi nènKupèshèci. Udiku mwa kuswa bwa kungangata mûndi emu anyi, Mukalenge? Udiku mwa kundekela nyeemena ku nkuruse ne lukasa lwônsò anyi? Ndi mene mmona baamisanjeele. Ndi mmona cikondo, ndi mmona dibiikila dya kupatuka mu Sodoma. Ndi mmona bimanyinu. Ndi mmona kasumbu kaa Abraham

munkaci mwa kupeta Bukênkè. Ndi mmona dimweneshiibwa, Yesu munkaci mwa kumweneshiibwa cyakabidi munkaci mwetu mene anu mwakadibi amu. Ndi mmona bintu byônsò biWakalaya abi. Ndi mmona batentudi; ndi mmona Wêwè mwambe ne: ‘Anu mwakadibi mu matuku a Mòsà,’ muvwa Yambele ewu ne Yane mwa kwalukila bwa bôbò kutentula, kadi batungunuke anu ne kushaala mu diyaala dimwedimwe muvwapo amu adi.”

<sup>307</sup> Nwamonu’s, bôbò kabavwa mwa kulonda Mòsà ku Dìyì adi ne kupatula bânà abu muntwamu ne kubwela naabo mu cipeela to, bwalu bôbò bavwa baswikakane ne Ejipitu. Kabavwaku mwa kucyenza to, nansha muvwapo paabo benze byenzedi bimwebimwe bivwaye mwenze abi. Kadi dikutakana dyabo dyakamweneshiibwa. Ne Bible udi wamba ne, aci ng’EMU MMUDI MUKALENGE WAMBA: “Necyenzeke cyakabidi mu matuku a ndekeelu.”

<sup>308</sup> Nenu nyawu nucimona ne enu abidi, panwikala baa nyuma. Mémè ndi . . . Mémè ncyèna mwa kuCyumvwijaku to. Kabyena ne mushinga bwa mémè kuCyumvwija to. “Mikooko Yanyi yidi yumvwa Dìyì Dyanyi.” Tuyaayi kudiYe mpindyewu, patucidi ne mpunga apa. Kì mmwômò anyi?

<sup>309</sup> Pawikala dijinga ne dibatiiza dya Nyuma Mwîmpè, pawikala dijinga ne didilambula dya cyakabidi, nsômbelu mupyamupya; mpaasata webe kaakukudyombola nansha, yêyè neakunange bwa cyôci aci. Udifile anu wêwè yônsò kudi Nzambi diloolo edi, patucidi kaaba aka apa. Lekela . . . Eyowa, ndi mumanye ne bivwa bikole, bya bitapa ku mwoyi, bya pabwabi, ncyèna ngenza aci bwa kwikala ne lwonji to, ndi ngenza aci bwa kwikala ne meeji matooke. Ndi ngenza aci bwalu ndi mununange, ndi munange Nzambi, ne ndi ncyenza bwa kuteeta kunukwacisha. Ne cya bushuwa, mulunda wanyi, ndi—ndi—ndi ngiitabuuja . . . Kabidi ne mwoyi wanyi wônsò, ne diitabuuja dyanyi dyônsò, ndi ngiitabuuja ne Mukenji wanyi mmufumine kudi Nzambi. Wôwò—Wôwò mmunujaadikile aci, munda mwa bidimu.

<sup>310</sup> Mpindyewu teejeaaku, diloolo edi lekelela byônsò byûdi naabi abi, byônsò byûdi naabi dijinga abi. Mémè ndi ngiitabuuja ne, ne mwoyi wa lulamatu, mulâmbula, bu wêwè anu mwa kujuukila kuulu cyanaana, ne kwela byanza muulu kudi Nzambi, ne kwamba ne: “Nzambi munanga, ki mémè ewu. Ngangataaku, Mukalenge. Ncyakwikala kabidi nkwata mudimu ne meeji aanyi mémè mwine ne didyumvwijila dyanyi mémè mwine to. Dìyì Dyebe didi dyamba ne ndi ne cya kwikala ‘wa cijila, ndi ne cya kulediibwa cyakabidi, ne cya kuujiibwa tente ne Nyuma, ne pa dibà adi Nyuma neandombole mu Bulelela bwônsò.’ Nzambi munanga, ki mémè ewu, ndombolaaku.” Udiku mwa kuswa bwa kwenza nanku anyi? Pawikala muswe kwenza nanku, ela cyanza muulu, wâmbè ne: “Ndi muswe bwa kwenza nanku, ndi muswe.”

<sup>311</sup> Nanku tujuukilaayaaku bônsò kuulu.

Anu mûndì emu, nciyi ne cya kudilumbulwila  
 naaci,  
 Kadi anu ne Mashi Ebe akeediibwa panshi  
 bwanyi mêmè,  
 Ne Wêwè udi umbiikila bwa kulwa Kûdi,  
 Éyi Mwânà wa mukooko wa Nzambi, (Ciibi  
 cimwepele cya Nzambi) . . . ndwa! Ndi . . .

Mpindyewu angata mudimu webe wônsò awu, bikwabo  
 byônsò, dicyoka dyebe adi, byônsò abi! Amba tũng bu ne wêwè  
 uvwa munkaci mwa kupùnga ne lufu mpindyewu?

Anu mûndì emu, Wêwè neũngaakidilè,  
 Neũnjingilè difika dilenga, neũmfwilè luse,  
 neũnzezulè, neũngaakidilè;  
 Bwalu ndi . . .

Udiku mwa kuswa bwa kwela cyanza muulu anyi, mu eci  
 cituminyi mpindyewu?

. . . mulayi Webe, ndi muswe kwitabuuja,  
 Éyi Mwânà wa mukooko wa Nzambi, ndi  
 ndwa! Ndi ndwa!

<sup>312</sup> Mpindyewu padi mwimbi wa cisanji cya orgue mucikàle  
 utungunuka ne kwimba apa, muntu ne muntu wa kutudi  
 ikale . . .

<sup>313</sup> Nwênù bansonga, nudi baswe kushaala mushindu ewu mudi  
 badi pambelu apa mu mùsèèsù aba, musumba wa bangondavi  
 aba ewu anyi?

<sup>314</sup> Wêwè mwaneetu wa bakaji, udi muswe kwikala ne nsuki  
 mîpi, padibi buneeme bwa Bunaazi bwebe kudi Nzambi mbwa  
 kwikala ne nsuki mile anyi? “Bidi bundu kudi mukaji bwa  
 kukosa nsuki yende.” Udi muswe kuvwala tuujipè tukese  
 twa kale etu ne bikwabo bidibo bavwala leelu ewu ebi,  
 nkanzu wa usalulangana masandi ewu, mubidi webe mwikale  
 mumwenekelemu, pambelu pààpa mu mùsèèsù anyi? Utuku  
 mumanye ne mulume yônsò udi ukutangila udi wenda neebe  
 masandi munda mwa mwoyi wende anyi? Kadi peebe nyawu  
 udizanjika wêwè mwine mushindu awu. Nutuku bamanye,  
 nwênù bakaji, nwênù batu badilaaba bilaabu bya kwîsù abu, ne  
 kuvwa mukaji anu umwepele mu Bible ukaavwaku mudilaabe  
 bilaabu bya kwîsù anyi? Kadi Nzambi wakamufila kudi mbwa  
 bu cyakudya. Izabela kampanda, dîna dikaadi dikinyiibwe  
 anu kacya ku dituku dyende adi, bwa byenzedi byende bya  
 ciine aci abi. Nutuku bamanye ne Eliya muprofeta ngwâkeela  
 cyôci aci mulawu ne wâkamutândisha patooke mushindu awu  
 anyi? Nutuku bamanye ne Helodyasa ngwâkalumbatanganabò  
 nende kudi Yone Mubatiiji anyi? Nutuku . . . Wêwè kwêna muswe  
 kwikala cintakanyi cya pa buloba cya Hollywood aci to. “Wêwè  
 munange maalu a pa buloba anyi bintu bya pa buloba, dinanga  
 dya Nzambi kadyena munda mwebe to.”



315 Mwaneetu, mwambi naanyi, cintu nansha cimwe... Bu wêwê mwa kuswa ungumvweku, mêmè ndi mwaneenu. Udi muswe kwikala muswikakane, ne nwênù bidimba bya ekeleeziya bya ekeleeziya kampanda (Méthodiste, Baptiste, anyi cyônsò ciine cyûdì mwa kwikala aci), udi muswe kwikala munanukile mu dingumba adi anu bwalu mamwèbè ne kakwèbè mukaji bavwa bananukilemu anyi? Yêyè awu's uvwa mukapatuke mu cintu kampanda bwa kulwaye kubwela mu cyôci aci, civwà ciikale Bukênkè bwa diine dituku adi aci; cyôci aci, bu mu bikondo bya Noa. Edi ndituku dikwabo.

316 Wêwê udi wamba ne: "Ee, mêmè mvwa ne . . ."

317 Edi kî ndituku dya Mpenta to. Cikondo cya beena Mpenta cikaadi cimane kupita. Mpenta ukaadi mumane kuya, eci ncikondo cya dinowa. Nwamonu anyi? Nenu cikondo cya dinowa, lutete; ne mâyi akaadi mamana kupongolola, lutete lukaadi lwenda luboba. Lwâ ubwele mu lutete, wêwê mwaneetu wa balume munanga. Nteelejaayi mêmè, ngiitabuujaayi mêmè, panwikala nungiitabuuja ne ndi musadidi wa Nzambi, muntu ne muntu, mu mushindu wetu wa sungasunga, twinyikaayi mitu mu kudipwekesha kwônsò bwa kulambula disambila ditudi—ditudi bamanye ne ki divwa dikengela twètù kulambula adi ne: "Nzambi, ngangataaku mûndi emu."

318 Nenu mwaneetu wa balume, mwaneetu wa bakaji, nyewu ndyadija pa cyoshelu diloolo edi, mêmè paanyi: Nzambi, mfwimbeku umvwije mushiilangane. Enzaku cintu kampanda, Nzambi, ungenzeku mu mushindu Webe Wêwê.

319 Nudi nwela meeji ne mbipeepele bwa kwimana kaaba aka ne kusunzulula bantu tupese tupese mushindu awu anyi? S'ncintu cikole cya dyenza. Kadi dyakabi diikale kûndi mêmè pângiikalà nciyi ncyenza.

320 Nzambi munanga, padi bateeleji aba biinyike mitu yabo ne myoyi yabo apa, mu bikondo bidi kabiyi bya tuseku bya dyoya dya muyiiki wa dilongesha dya Bible edi ebi; patudi tumona dishindika dya Nyuma Mwîmpè udi munyungishe ditunga edi mpala ne nyima, ne mpala ne nyima, matabuluja manene ne bimanyishilu binene, bamanye ne bikengela cintu kampanda cilonde cyôci aci. Ne pashiishe kumona Banjelo abu mwandamutekete bapweka pa lusongo lwa mukuna wawa mu Arizona, pavwa nansha bikandakanda biCipatule mu ditunga dijima. Pa kumona Yesu Yêyè mwine mu maulu mwamwa, mutangile panshi, wamba ne: "Mu Bwakabuulwibwa 10.7, mu Mukenji wa mwanjelo wa mwandamutekete, Bitampi ebi bivwa mwa kukangudiibwa, Maalu masokoka a Nzambi avwa mwa kumanyishiibwa," biine bivwa balongolodi kabayi balaale ntanta bule bukumbane bwa—bwa kubipatulabo to. Kadi apa, Bitampi Mwandamutekete ebi bivwa bikange cintu cyônsò mu kaabujima abi bivwa ne cya kukangudiibwa mu

dituku edi. Pa kumona bimanyinu byônsò binene ne maalu a kukema bidi byenziibwe ebi, bishindikiibwe, bidyanjila kwamba kumpala kwa kwenzekabi, ne musangu nansha umwe Wêwè kuyiku mututekeshe mu maboko, kadi mubifikishe ku dyenzeke menemene anu mwakambiibwabi.

<sup>321</sup> Nzambi munanga, tudi bamanye ne Yesu Kilisto udi munkaci mwetu. Tudi bamanye ne Yèyè udi kaaba aka. Ûdi kaaba aka diloolo edi, Nzambi utu kayi umweneka awu udi neetu kaaba aka, ne udi mwa kushindika mulayi ne mulayi wônsò wakambaYe mu Dìyì Dyende. Mushindu mwine wuwimànyì kadi kubajaadikila's we, mubèlè nyima, mu ntwadijilu wa ku mbangilu kumpala mene kwa batentudi kubwelabo mu cyalu, Mukalenge, anyi kwa kubwelabo mu lu—lu—lubilu alu, bu mutudi mwa kwamba. Wêwè kuleeja ne kujaadika, kudyanjila kwamba anu mu byôbì menemene mushindu uvwabi mwa kwenzeka, kadi nyewu tubimona byenzeke mushindu awu. Nenku, Taatù Nzambi, tudi bamanye ne kacyna mwa kwikala muntu to, cidi ne cya kwikala Nzambi. Pa nanku tudi tumanya ne ng'Wêwè mwab'ewu diloolo edi. Utufwileku luse ku mpekaatu yetu.

<sup>322</sup> Nzambi munanga, Wêwè nyewu watwôndòpù mabeedi etu, mpindyewu tufwi—tufwilaaku luse ku mpekaatu yetu, Mukalenge, ya kubenga kwikala mwena Kilisto wa mushindu uvwa ukengela kwikala awu, katuyi...Tulaka anu mukana twamba mutudi mulume anyi mukaji wa Evanjeeliyo mu kaabujima, kadi nyewu tudisangana twètù biine badyùpwile mu tulu bu nzoolo wa cyena mangumba. Watukwacishaku, Nzambi munanga, ùtwàngàtè ne utunyukulule ku Nyuma Mwîmpè Webe. Ne kwòkò kwikale nî ncinyi nî ncinyi munda mwetu cidi kaciyi cifwanangane neebe Wêwè to, uciapatuleku munda mwetu, Mukalenge. Nenku ushimikeku makàsà etu pa Dìyì dya Cijila dya Nzambi, ne wènzèku bwa Nyuma Mwîmpè òshè too ne munda mwa mwoyi wetu ne umushe bisota byônsò bya bupidyà ne dibùngà dya tulu twa dicyokakana dya dituku edi; kaa, tujuukeku bwa tudinyukulule twètù biine. Enzaku nanku's, Nzambi. Tùkezùlèku! Tùfwimbèku! Tùsongèku! Nzambi, enzaku nanku.

<sup>323</sup> Piikalaku nî nganyi nî nganyi munda emu diloolo edi, Mukalenge, udi mulame munda mwa mwoyi wende lwòlò lutete alu, mutoloku wa Nzambi udi mulongolwela Mwoyi kacya ku difuka dya dyulu ne buloba awu; ndi mumanye, Mukalenge, bwa ne yèyè awu mmwenzejiibwe bwa kuteejeja pa dîbà edi. Pa nanku, nyewu ndomba, Nzambi, bwa Wêwè kuuja musuuka wende ne kumukenkeshila ne dibatiiza dipyadipya dya Nyuma Mwîmpè, ne kumutuma mu njila wende, wenda ucyonkomoka ne mwikale ne disanka.

<sup>324</sup> Mukalenge Nzambi, udi...Nyewu mmufila kùdì Wêwè. Ncyèna mumanye mwine awu ne nganyi to, Wêwè ngudi

mumanye. Mémè ndi mwambule bujitu anu bwa kuyiisha Dìyì Dyebe, Mukalenge, paudi Wèwè uDibuulula apu. Wèwè ngudi mwambule bujitu bwa bidi bishaala abi: mwaba udi Dimiinu dimata awu. Mémè ndi nDikupa anu cyanaana. Mukalenge Nzambi, ndi ndomba bwa Diikaleku dimate mu buloba bwîmpè, bubanjike diloolo edi. Bwa bààbúngì kuDimonabo, Mukalenge, ne kujuukabo bu beena Kilisto baa bakenka mu matuku a ndekeelu aa, bwa cintu cinene citudi bindile bwa kulwaci aci, cyalwaku lukasa.ENZAKU NANKU'S, Mukalenge. Nenku Wèwè newangate Ekeleeziya Webe, Mukaj'Ebe musela, uye Nende kumbelu. Tudi tuCimona cyònsò citeekiibwe mu bulongame. Lwâku's, Mukalenge Yesu. Nyewu tulambula byònsò kùdì Wèwè, mu Dìnà dya Yesu Kilisto, bwa bipeta. Amen.

Ndi muMunange, ndi muMunange  
Bwalu Yèyè wakannanga kumpala  
Ne wakampetela lupandu  
Ku . . . wa Kalvariyo.

325 Nudi baMunange anyi? Ee, nanku bikengela nunangangane muntu ne mukwende. Labulanganaayi ku cyanza muntu ne mukwende panudi nuwimba cyakabidi apu:

Ndi muMunange, ndi muMunange  
Bwalu Yèyè wakannanga kumpala  
Ne wakampetela lupandu  
Ku . . .

326 Mpindyewu tumupaayi Yèyè butumbi. Mbanganyi badi bamanye musambu ewu wa ne:

NêmMupè butumbi, nêmMupè butumbi,  
Tumbishaayi Mwânà wa mukooko mushipa  
bwa bangenzàmpèkààtù;  
Mupaayi butumbi nwènù bantu bònsò,  
Bwalu Mashi Ende mmasukule dikeji dyònsò.

327 Tùwîmbàayi mpindyewu:

NêmMupè butumbi, nêmMupè butumbi,  
Tumbishaayi Mwânà wa mukooko mushipa  
bwa bangenzàmpèkààtù;  
Mupaayi butumbi nwènù bantu bònsò,  
Bwalu Mashi Ende mmasukule dikeji dyònsò.


328 Kanwenaayiku nudyumvwa basukudiibwe munda munda mwònsò amu anyi? Elaayi byanza muulu nwâmbè ne: "Kaa, aci's cidi cyenza ne ndyũmvwè bilenga." Mwaneetu, mémè ntu munange misambu ya cyena kale ayi. Kanwena peenu bayinange anyi? Yidi yipweka too ne mu mwoyi's.

NêmMupè butumbi, nêmMupè butumbi,  
Tumbishaayi Mwânà wa mukooko mushipa  
bwa bangenzàmpèkààtù;

Mupaayi butumbi nwênù bantu bônsò,  
Bwalu Mashi Ende mmasukule dikeji dyônsò.

<sup>329</sup> Twèlààyi anu byanza muulu cyanaana mpindyewu tutumbishe Nzambi, muntu ne muntu wa kutudi, mu mushindu wetu wa sungasunga.

<sup>330</sup> Mukalenge Yesu, nyewu tudi tuKwela twasakidila. Tudi tuKutumbisha, Mukalenge. Tudi tuKupa butumbi bwa cisamba cibiikidiibwe bwa kupatuka, kupatuka mu Babuloona. Tudi tuKwela twasakidila bwa Mashi a Mwan'Ebe, Yesu Kilisto. Tudi tuKwela twasakidila bwalu Yèyè udi utuvwija batooke mu kasunsa emu. Tudi tufwa lus-...Tudi tulomba luse ku bilema byetu, ku dikutakana dyetu, Mukalenge, ditetukatetuka dyetu dya mu mîdimà. Èyì Nzambi wa yaaya, swaku bwa tjuuke ne tukenke, ne twendele mu Bukênkè bwa ib'a muloolo, ne twikale mamuma a Muci udi upatukila ku Makênkè a ib'a muloolo awu. Enzaku nanku's, Nzambi munanga. Nyewu tudilambula twètù biine kùdi Wèwè, mu Dîná dya Yesu Kilisto.

<sup>331</sup> Mpindyewu ne mitu yenu miinyika, ndi nnupa bampaasatu badi batwe disangisha edi nyama ku mikolo abu. 

*MAALU ÀDÌ ÈNZEKÀ LEELÙ MMATÒOKESHA KÙDÌ CIPRÒFETÀ* LUA65-1206  
(Modern Events Are Made Clear By Prophecy)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dimwe dilòòlò, mu matuku a6 a ngondo wa dikumi ne mwibidì, cidimu cya 1965, bwa didya dya Bwobumwe bwa Buloba bujimà bwa Beena Kantu-ku-byanza bàà Evanjeeliyo mu Kaabujimà ku Orange Show Auditorium mu San Bernardino, Californie, U.S.A. Ndyumusha pa mukaba wa mēyì ne dituuta ku cyamu mu kaabujima kààdì mu Anglais. Nkudimwinu wa mu Ciluba ewu mmutuuta ku cyamu ne mwabanya kùdì Voice Of God Recordings.

CILUBA

©2021 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)